


**DE VITA ET
MORIBUS
IOANNIS DE
ALMEIDA
SOCIETATIS...**

Antonio : de Macedo





*R²
29*

M

Ex Bibliotheca
majori Coll. Rom.
Societ. Jesu



I-7-f.

DEVITA
Et Moribus
IOANNIS
DE ALMEIDA
SOCIETATIS IESV

PRESBYTERI

ANTONIO
DE MACEDO,
Lusitano Conimbricensi

Eiusdem Societatis Authore.



VENETIIS. M.DC.LXIX.

Apud Nicolaum Pezzana
Superiorum permissu, ac Privilegio.

ATTEST

in presence of

JOHN A. O'NEILL

DEPUTY

CLERK

of the

COURT

of the County of

Alameda

State of California

do hereby certify that

the within and foregoing

is a true and correct

copy of the original

filed in my office

this 1st day of

January 1901

IOANNI³

PAVLO OLIVAE

Præposito generali Societatis
IESV.

Epistola nuncupatoria.



I mihi uti iustum est votum, ita par voto facultas esset, non dubitarem, quin officio erga te meo, Pater Optime, cumulatissimè satisfacerem. Quid enim æquiùs, quàm, qui ex meorum tibi debentur studiorum contentione, fructus, eos illi à quo possunt exigì, reddere, & à te suscipi quæ sunt tua? Rursum quid iniùs, quàm illud afferre, quod cum rude ac impositum sit, dignitati ac splèdori tuo minimè respondeat? Sed curandum potius quid oporteat, quàm querendum

an congruat? Erit benignitatis
 tuæ si humile sit opus, attollere:
 si tenue, augere: si obscurum,
 illustrare. Et quidem tam abun-
 das ornamentis & naturæ, & artis
 ut nihil sit ingenio tuo congruen-
 tius, quàm ornare eos quos vel
 natura destituit. Natus ad bonum
 commune Reipublicæ studia tua
 omnia eò retulisti, ut orbi vniuer-
 so proficeres. Hoc nomine inisti
 Societatem, quòd ex instituto alio-
 rum salutis se addixit. Romæ com-
 moratus, unde quasi à capite per
 mundi partes se virtus diffundit.
 Idcirco inter alia, quæ obijsti do-
 ctrinarum munia, Oratoris impri-
 mis Sacri suscepisti, ut latius, & libe-
 riùs tua ad omnes documenta ma-
 narent. In quo te excellentem
 adeò præbuidisti, ut summi te Pontifi-
 ces tres Innocentius, Alexander,
 & Clemens IX. tanto viri ingenio
 & iudicio, oratorem esse iusserint:
 quibus & toti purpurato Senatui
 operam tuam vehementer proba-
 sti,

sti, & magnos apud cæteros dicendo clamores fecisti. Extant tuæ, eæque typis mandatę conciones præclaræ, quæ vel lectæ docent, delectant, mouent, & iustam Perfecti concionatoris ideam exhibent. Itaque eis qui vniuersæ Christianæ Reipublicæ præerant, ac proderant quodammodo profecisti. Ex hoc te curriculo laudis & gloriæ ad se Societas reuocauit *ut Vicegeneralis* esses eius, cui per valetudinē non licebat munere suo fungi. Paruisti imperio & necessitati, nec tamen quidquam de proficiendi studio remisisti. Iam quippe antea priuatus & toti Societati consulebas, & vniuersi, per quam illa funditur, mundi salutem curabas: quod quidem hodie propriè, ac ex integro præstas, postquam, eo defuncto Societati generalis præes, ea expectatione, vt nemo sit quin ei summam deinceps felicitatem auguretur. Equidem tibi in hoc publicæ dignitatis & virtutis fasti-

gio constituto. Vitam priuati nostræ Societatis hominis afferre vix audebam, cum præsertim ille non in media Christiani populi luce, sed in semoto Brasiliæ angulo vixisset, & laborasset. Sed nullos ego magis ad Societatem pertinere arbitror, quàm eos quos studium & ardor proferendi Euangelij, & propagandæ fidei longius auexit. Hi quò magis sunt ab Europa nostra remoti, eò propiùs ad nostrum institutum accedunt. Hæc mihi ratio animæ fecit, atque hoc nomine Operarij excellentis spero fore ut à te, humanissime Pater, beneuolè excipiatur. Eum certè eximia virtus, indefessus labor, incredibilis animorum profectus, non sine specie mirabilium operū clarum ubique, & gloriosum reddiderunt. Id confirmo tam me esse legendo ad omnia pietatis officia commotum, vt existimem quicumque in eam inciderint, non minùs ad eadem commotum iri. Quare illam è vulgari

gari idiomate in latinum verti, & multis auctam partibus, recto, ni fallor, ordine digessi, & nomini tuo dicaui, vt plures ad lectionem allicerem. Curaui quippè, vt quos nec res gestæ ignoti hominis, nec stylus inelegantis authoris trahere poterat, eos obiecta in primo aditu operis eximia excellentis tuæ virtutis species incitaret. *Paternitatem tuam* Deus immortalis ad sui nominis gloriam, & Societatis decus, & ornamentum quàm diutissimè seruet incolumem.

*Obsequentiss. in Christo Filius, & Seruus
Antonius de Macedo.*

PRÆFATIO

AD LECTOREM.



ITAM Ioannis de Almeida
Societatis IESV presbyteri
Simon Vasconcellus eius-
dem Societatis Sacerdos
vernacula idest, Lusitanica lingua, scri-
pserat; quæ cum pro magnitudine impe-
rij, & armorum gloria angustius habi-
ret, & minus sit exteris gentibus perspe-
cta, eam latine (qui sermo communis
est) reddere statui. Et verò decebat, ut
quæ gesta per se magna, & clara erant
ab angustijs linguæ, & à tenebris bar-
baræ regionis liberata palam fierent; &
in locis conspicuis latini operà calami
eminerent. Atque is mihi scriptionis
finis propositus est, ut quæ homo priua-
tus, & in remotissimo loco gessit, ijs pu-
blici iuris factis omnes quarumlibet re-
gionum ad exemplum facile uti possent.
Ac nostri homines in primis, quorum
officij fore duco ad eam se conferre effi-
ciem,

giem, quam suis ac veris coloribus re-
presento: domesticis enim magis, quàm
externis exemplis afficimur; & ad cõpa-
randas virtutes, quibus maiores nostrì
floruerunt, iustiùs & vehementiùs inci-
tamur. Et quia non minùs ille virtuti-
bus, quàm prodigijs, mirabilis fuit, ea
vti se in Historiæ decursu obiecerint, ob-
lata vendicabo, & suis intexam locis,
habita maximè temporum, & locorum,
in quibus vixit diutiùs, ratione. Cete-
rùm & si interpretis in hoc opere officio
fungor, interdum Scriptoris partes ago:
vbi verto, fidelis: vbi narro, sincerus es-
se studeo: nec quicquam vel admitto, vel
profero quod non sit idoneis testimonijs
nixum: & quod caput est, Proepiscopì
Brasiliæ auctoritate firmatum: quare ni-
hil est quod moretur fidem legentium.

10
P R O T E S T A T I O

A V T H O R I S .



Ancitissimus Dominus
Noster Urbanus VIII.
Anno M. DC. XXV. in
Sacra Congregatione
Sanctæ Romanæ, & Vniuersalis In-
quisitionis decretum edidit, idem-
que confirmauit Anno 1634. quo
inhibuit imprimi libros hominum
qui Sanctitate, seu martyrij famâ
celebres obierunt, gesta, mira-
cula, vel reuelationes, seu quæcum-
que beneficia tamquam eorum in-
tercessionibus a Deo accepta con-
tinentes, sine recognitione, atque
approbatione Ordinarij; & quæ
hactenùs sine illa impressa sunt, nul-
lo modo vult censeri approbata .
Idem Pontifex anno 1631. ita ex-
plicauit, vt nimirum non admittan-
tur elogia Sancti, aut Beati absolu-
tè; & quæ cadunt suprâ personam,
benè

bene tamen ea, quæ cadunt supra
mores, & opinionem, cum prote-
statione in principio, quòd ijs nulla
ad sit authoritas ab Ecclesia Roma-
na: sed fides tantùm sit penes Au-
thores. Huic decreto, & illius de-
clamationi insistendo, profiteor
me sensu ijs prorsus conformi om-
nia & singula quæ in hoc opere
scribo, accipere, atque ab alijs ac-
cipi velle.

IOANNES PAVLVS
 Oliua Societatis Iesu
 Præpositus Ge-
 neralis .

C*um Vitam Ven. Serui Dei Ioan-
 nis de Almeida ex lusitano idio-
 mate in latinum conuersã à P. Antonio
 Macedo nostræ Societatis Sacerdote, ali-
 quot eiusdem Societatis Theologi reco-
 gnouerint, & in lucem edi posse proba-
 uerint, potestatem facimus, vt typis
 mandetur, si ita ijs, ad quos pertinet, vi-
 debitur. In cuius rei fidem has literas
 manu nostra subscriptas sigilloq; nostro
 munitas damus Romæ 13. Decembris.
 1664.*



DE VITA
ET MORIBVS
IOANNIS
DE ALMEIDA

S.I. Presbyteri.

LIBER PRIMVS

CAPVT PRIMVM.

*Ioannis natales, educatio, infantiae
pericula.*



Ondini, quod florentissi-
mi Angliæ Regni caput
est, Ioannes, Anno à partu
Virginis M. D. LXXII.
lucem vidit, Parentes illi
contigere Catholici, pietate, quàm
genere nobiliores. Patri nomen fuit
Ioan-

Ioannes Mada; qui plurimis ex legitima coniuge susceptis liberis, huic natu minimo Ioannis indidit nomen, eumque cæteris dilexit tenerius, tum quòd altam præ se ferebat indolem; tum quòd sibi simillimum natura fecerat. Vixdum filius cæperat viuere, cùm mater desijt, quasi quæ talem genuisset filium, nihil ei deinceps inter mortales agendum superesset.

Regnabat per id tempus in Anglia Elisabetha, virilis animi fæmina, dubia rerum & morum famà, quæ nefarium Romanæ Sedi bellum indixerat, & multorum hæresum pestes in omne suum Regnum inuexerat; sequè, nouo portento, Anglicanæ Ecclesiæ ferebat caput. Idcirco Ioannes Mada, vt erat antiquæ religionis amans, satisque intelligebat, quantum esset in optima educatione momenti, rectè se facturum putauit, si cubi virum aliquem pium & grauem, bene Catholicum nancisceretur, cui filium sana doctrina, Romano ritu, probisque moribus imbuendum committeret. Auiæ etiam paternæ fæminæ prudenti, & in paucis religiosæ nepotis curam demandauit, vt
eum

cum matris sollicitudine & amore ad pietatem informaret . Et quidem puer vt erat candida & cerea à natura indole, tradita à Magistris virtutum documenta reddebat moribus; & probitate ac modestia maiorem præ se ferebat ætatem: & vti ferè viris ad egregia natis, quò quemque celsa indoles, & diuini Numinis prouidentia ferat, prima statim argumento est ætas, iam tum ab infantia imitandis Ecclesiæ Sacris, & suis ad Deum fundendis oratiunculis Ioannes prodidit, quod olim viuendi institutum sectaturus esset. Nec verò illi defuit elegans totius corporis forma & constitutio: adeò animo, pulcherrimo corporis hospiti, pulcherrimum etiam hospitium prouidentia diuina fabricauit.

Vix octauum ætatis annum attigerat, cùm Satanæ quantus tandem vir esset futurus certò prælagiens, eum de medio tollere cogitauit. Ergò nocte quadam, assumpta nigerrimi felis specie, dormientis fauces comprimere, & gulam interstringere, conatus est: quo in discrimine excitus à somno puer, vt se a timore collegit, signo crucis frontem munivit,

niuit, & Sanctissima I E S V M A-
R I Æ nomina inuocauit: ijsque
munitus armis selem abegit: ac su-
bitò delapsi è cælo affuere Angeli
multa perfusi luce, qui partam de
tartareo hoste victoriam musicis con-
centibus celebrarunt.

Vbi se illa bellandi arte nihil pro-
ficere intellexit humanæ salutis ho-
stis, longè diuersam pugnandi ratio-
nem iniit. Habitabant in eadem do-
mo puer & fæmina quæ se virginem
ferebat; huic malus dæmon faces
subdidit, vt per eam pueri virgini-
ratem expugnaret: facile concepit
ignem mulier, vt potè dæmonis
fraudibus obnoxia, neque iam aliud
meditabatur, quàm quomodò pue-
rum in sui amorem pertraheret: cre-
brò ac libenter in eius conspectum
se dabat: sermonem auidè captabat:
adiiciebat cæteros cupiditatis igni-
culos; sed quòd minùs ijs profice-
ret, tandem solum in loco remoto
ab arbitris deprehensum vltro verbis
& factis ad turpe flagitium prouocat:
at ille certus fugam, eamque matu-
ram optimum ad vincendos pudici-
tiæ hostes esse remedium, celeris
indè fuga proripuit, & periculo ex-
pli-

plicauit. Porrò cùm suis ille viribus parùm confideret, & hæreticos inter Catholicum se gerere rem periculi plenam esse duceret, grassante eo maximè tempore per Angliam hæresi, & continentis incendij more cuncta depalcente, patriam domum, Angliamque relinquere, & in Lusitaniam traicere decreuit, vt inter Lusitanos Catholicam religionem palàm profiteretur; & comperto idoneo aliquo instituto vitæ honestè, ac tutò ætatem traduceret. Hoc igitur sibi constituto, onerariam, quæ per id fortè tempus Londino soluebat in Lusitaniam, repentè conscendit: transmissoque mari ad Vianæ portum appulit. Celebre id est, & opulentum in ea Lusitanix prouincia, quam vocant *Interamnensem* a duobus Minio, & Durio fluuijs, qui illam claudunt, Emporium, viginti ferè milliarijs Brachara Augusta disiectum, aperto ad Galletiæ mare portu nobile, virorum imprimis fortium, illustriumque natalibus clarum.

CAPVT SECVNDVM.

*Ioannis pueritia Viana; & in Brasiliam
nauigatio.*

MOrabatur id temporis Vianæ
Benedictus Rocha Bezerra,
vir honestus & copiosus, qui Ioan-
nis parentem Londini quondam no-
uerat, eoque familiariter vsus fue-
rat, dum illa in Vrbe mercaturæ cau-
sâ versaretur. Is veteris amici me-
mor venientem ex Anglia filium om-
ni prorsus humano subsidio destitu-
tum, domi benignè excepit, & pa-
terno fouit amore: mox ei proba-
tum magistrum quæsiuit, qui cùm
puerum ad omnem virtutem forma-
ret, tum instituta & mœurs simul
cum sermone Lusitanæ gentis perdo-
ceret: vsu enim constat quanti refe-
rat eorum quibus cum agas ritus &
linguam tenere. Accessit quòd fæ-
mina magno natu Benedicto consan-
guinea, egregiâ pueri forma, & in-
dole capta, illius matrem agere,

& magistram voluit: ac vt erat eximie pia, hoc vnum imprimis egit, vt Ioannes non minus disceret sanctè viuere, quàm rectè loqui. Nec irrita spes docentis fuit; enimuerò cum esset puer ingenio docili, facile magistros sequebatur quocumque ducerent.

Contigit paulò post quod vix miraculo eximas. Altam conscenderat arborem ea fortasse mente vt inde decerperet poma. Cæterùm vestigio fallente delapsus ad terram, præceps venit, & grauitè dextrum latus iacenti fortè saxo allisit: mortuo similem familiares domum retulerunt, & coniecerunt in lectum: ibi iam sibi redditus opem a Deo implorauit; & præsentem confestim expertus est: sedatis quippè repentinè doloribus sanum se sensit & confirmatum, integris non solum membris, sed etiam viribus.

Illo defunctus uitæ periculo, pueritiam iam egressus, & tractandis seculi negotijs habilis, siue ut morem gereret Benedicto Rochæ Bezerre, quem parentis loco habebat: siue inanis lucri dulcedine allectus,
mer-

mercaturam facere cæpit ; atque ad illam quæstuosius exercendam, in Brasiliam, opulentam noui orbis regionem Lusitanorum imperio subiectam, nauigare instituit. In quo diuini Numinis prouidentiam mirari iure debemus, quæ Ioanni pecuniarum lucris inhianti, & idoneum ad illa comparanda modum perquirenti, transmittendi in Americam mentem immisit, ut ibi studio repente conuerso è fluxis seculi rebus ad æternas animum reuocaret ; & alter Brasiliæ Apostolus, demortuo Iosepho Anchietæ non minùs prodigijs quàm uirtutibus (si fas est dicere) par existeret.

CAPVT TERTIVM.

Brasiliæ situs & fertilitas, maximè Pernambuco ; incolarum item mores attinguntur.

Brasiliam nobilem Americæ Australis prouinciã esse constat, quam

quàm Petrus Alures Capralis Lusitanæ classis Præfectus dum in Orientis Solis Indiam cursum dirigeret, longiore, quàm par erat, ambitu ad Austrum facto, felici nauigationis errore, primus aperuit, Anno salutis humanæ M. D. Americus postea Vespucius Florentinus, Emanuelis Lusitanæ Regis auspicijs, eandem accuratiùs explorauit. Initium a Septentrione capit duobus infra Æquatorem gradibus: Austrum versùs ad gradus quinque suprâ triginta excurrit. Orientalem oram immani tractu Oceanus Atlanticus alluit. Ad Occasum altissimos spectat montes, qui illam a Peruuia, ditissima Hispanæ ditionis prouincia, determinant. Oræ maritimę ductus amplo sanè gyro ad mille ferè leucas protenditur. Præcipuè ad mare Vrbes, arcesque munitæ visuntur aduersùs hostium classes a Lusitanis extructæ, quarum caput *Omnium Sanctorum Bahia* dicitur, non minùs opibus, quàm armis potens, propria Brasiliæ Episcopi, & Regij Præfecti sedes; Regio inprimis amæna est, & fertilis; cæli admodum iucunda, salubrisque temperies; abundat vbique
fon-

fontibus & amnibus inclytis. Semina terræ credita multiplici prouentu reddit, Saccari præsertim ferax, quod multis inde nauibus in Europam euectum ingenti mercatorum lucro longè latèque diuenditur. Hæc verò soli sæcunditas, & cæli clementia cum indigenarum feritate, & morum turpitudine ex equo videtur contendere. Sæuissima quippè sunt Brasilis ingenia, ad cædes prona, & humanis vesci carnibus assueta; nec minùs in crapulam, veneremque soluta. Tam alta ijs incumbit barbaries, vr sola corporis formà homines præferant, cætera belluas representent. Adeò deprauati mores rationis lumen extinguunt. Assiduo tamen cum Lusitanis vsu, cōmercioque, detrita iam magna ex parte barbarie, cultiores in dies mores accipiunt; & ad Christianam humanitatem nostrorum maximè opera hominum informantur, & poliuntur.

Colonię quatuordecim, quas Præfecturas appellant, vniuersam distinguunt regionem, vti Scriptores Lusitani communi consensu tradunt; quibus tanquam suarum rerum peritioribus, certa fides habenda est; quid-

quidquid scribant , re minùs benè
 examinata , Antonius Herrera , Re-
 gius Castellæ Historicus , Atlas no-
 uus , aliique Authores externi . Om-
 nium Coloniarum florentissima Per-
 nambucensis habetur , vel certè nulli
 secunda , cùm cæli temperie , tum
 soli fæcunditate . Olinda (sic oppi-
 dum Lusitani vocant) totius Præfe-
 cturæ caput , in edito sita eminet ,
 quòd pulcherrima sit , & spectatu di-
 gnissima , adusque maris littus per
 inæquales vallium tractus , & longos
 platearum ductus effusa ; ciuibus ho-
 nestis & opulentis frequens ; ædibus
 magnificis , templisq; augustis con-
 spicua . Sacrarum præterea familia-
 rum nobilitata cænobijs . Societatis
 præsertim I E S V collegium in su-
 mo montis vertice erectum Urbis
 maiestatem auger , & primum se ex
 alto terræ adnauigantibus ostentat .
 Fertilissimus verò ager rerum omni-
 um abundat copia , ad delicias etiam
 & voluptates ; quas indè magno
 cum Brasiliæ , & Europæ vniuersæ
 bono negotiatores exportant . Hęc
 tamen fusius describere nostri institu-
 ti non est . Illud silentio præterire
 non possumus . Procedente die , An-
 no

no videlicet M.D.CXXX. Pernambucus ab Hollandis instructa eò classe delatis, capta est, & Olanda solo æquata: huius erecta loco Mauritiopolis, nobilis, & frequens Hollandorum Colonia, cui Ioannes Mauritius, Nassouiæ Comes, qui multis Pernambuco annis suprema cum potestate præfuit, nomen dedit. Creditum est à viris prudentibus captam ab hostibus Coloniam, vt Lusitani meritis ea ratione irato deo pœnas luerent; prospero quippè fortunæ cursu ad ingentes opes, nimiamque euecti potentiam, Christianæ honestatis parùm memores in magna rerum omnium licentia vitam agebant, Lusitano indignam nomine, indigenasque ipsos in diram seruitutem per grauissimas abducebant iniurias.

Affecit ea clades pari ferè damno ac dedecore Brasiliam, & Lusitaniam, quod illius maximè Præfecturæ commercio vtraque ad immensas excreuerat opes, & integrum Brasilici tenuerat maris imperium; quod fauente Batauis fortuna belli,

ijs, ceu victoriæ appendix, cesserat.

Decurrente tempore, Sceptrum Lusitaniæ iam tenente Ioanne Rege, huius nominis IV. de repetenda armis Colonia Lusitani cogitarunt. Igitur Anno Christi M DCLIV. collectis vndique in Pernambucum viribus, & toto aduersus hostes impetu belli verso, magnis eos attriuerunt cladibus, & ex omnibus Coloniae finibus expulerunt. Ita malè ab Hollandis parta, breui amissa.

CAPVT QVARTVM.

Ioannis studia, & pericula Pernambuci.

VBi primùm attigit Pernambucum (is primus venientem è Lusitania Brasiliæ portus excepit) in alterum penè virum, Dei beneficio, repentè mutatus, in Nouo illo Orbe, veteri exuto homine, nouum induere visus est, & sanctius quoddam instituire vitæ genus. Primum omnium mercaturæ negotijs se expediuit, ne sibi impedimento essent ad meliora tendenti: mox ad confessionis, & Eucharistiæ Sacramenta frequenter accedere, cum religiosi vi-

ris agere, singulis diebus missæ sacrificio interesse; Deiparam præcipua religione colere; multisque ab illa, precibus exposcere, ut quod vitæ genus Deo gratius, sibi que utilius foret, id ipsi vellet significare. Pauci decurrerant à suo in Brasiliam aduentu menses, cum ad litterarum studia animū appulit, ut illarū præfidijs instructus facilius postea, & fructuosius in sui, & aliorum salutem incumberet. Prima in Societatis Gymnasio Grammaticè rudimenta posuit, humanioribus deindè litteris non sine ingenij laude, vacavit: iisque iam probè instructus, & humanarum rerum tædio affectus ineundæ religionis consilium cepit, in qua rerum omnium possessione exutus diuinæ gloriæ seruiret, salutique animorum. Ac ne de re tanti momenti solius sui ingenij viribus confusus temerè deliberaret, confessorium suum adiit, virum pium, ac prudentem è Societate IESV, cum quo de eligendo vitæ instituto per aliquot dies contulit: eoque religionis ingressum multis rationibus suadente, eandem Societatem elegit, cui nomen daret, illa potissimum ratione motus, quòd egregiam ubique gen-


gentium propagandæ religioni Catholicæ nauaret operam, cuius in ipsa Brasilia præclarum dabat specimen. Hac igitur mente Martialem Beliar-tem, Prouinciæ Brasiliçæ Præpositum, qui per eos dies inspiciendi causa collegij Pernambuci versabatur, conuenit; ab illoque, vt se Socijs adscribe-
ret, multis cum lacrymis postulauit. Nequaquam tamen obtinuit: nam etsi Prouincialis eum peramanter exceperit, & seruiendi Deo in Societate consilium probauerit; adolescentiæ tamen veritus inconstantiam, ingressum in aliud tempus differendum censuit, dum & ætatis imbecillitati plus roboris, & suscepto religionis consilio plus firmitatis accederet. Spe igitur ineundæ Societatis in longum extracta, humanitatis studia repetijt, & alacrius ad discendum incubuit vtilitati ducens ingenium eo litterarum genere magis excolere.

Paucis post diebus ingens vitæ discrimen adiuit. Olindam propè arx medio assurgit mari, natura, & arte munitissima *Recifii* nomine, & fama celebris, quæ obiectis in mare cautibus procurrens sinum efficit multarum capacem nauium: huc se Ioan-

nes, voluptatis causa, aliquandó retulit: dumque è summo impendentis Oceano rupis, prono incumbens vultu curiosiùs, quàm par erat, aduentantes spectaret naues, allisus magno impetu ad rupem fluctus, ingenti fragore spectantem primùm exterruit; deindè abripuit; tandem præcipitavit in mare; & quia natandi peritus non erat, & præ metu vix constabat animo, ad extremum venerat vitæ periculum; ac prorsùs periisset fluctibus haustus, nisi in tam præsentì discrimine a Deo auxilium implorasset. Mirum dictu: de repenti, qua ratione id fieret omninò inscius, à medijs fluctibus in littus deuehi inopinatò se sensit. Id non vulgare aliud excepit diuinæ clementiæ argumentum. Brasilius quidam procero corpore, aspectu toruo, ardentibus oculis (speciem haud improbabilem Satanæ furentis præbebat) ab schola domum redeuntem nodoso baculo ex insidijs repenti aggressus brachium in altum extulit, vt violentiùs in prætereuntis caput ictum dederet; verùm auertente Deo aliò manum ex ipso iam intento capiti baculo mirabiliter ereptus est.

His

His a Patre cœlesti deuinctus beneficijs, quod antè ceperat consilium, id ipsum denuò resūpsit ardentius, vt Societatem ingrederetur, in qua perfectum se, atque integrum Deo holocaustum offerret. Rem iterum vrgerē, & Deiparæ patrociniū ad eam obtinendam multis institit sollicitare precibus. Die quadam cū solito vehementius in solitario oraret loco, sensit se ad petendam Societatem acrioribus quibusdam stimulis impelli. Erecto igitur in certam spem animo lætus, & alacris ad Collegium se contulit: ibique participato Prouinciali, quod sibi altè infederat amplectendæ religionis proposito, multis & supplicibus verbis orat, vt se voti compotem faciat: moræque omnis impatiens ad eius pedes abiectus, ita rogans, obtestansque perseuerauit, vt continuò domum admitteretur.



CAPVT QVINTVM.

*Bahia tyrocinium ponit: inde in Spiritus S.
Coloniam tendit.*

ANno post Christum natum
MDXIII. die prima Nouem-
bris, omnium Sanctorum dicata,
solemnij, Societati IESV se aggre-
gauit, in ipso iuuentutis flore, cum
paucis diebus alterum supra vicesi-
mum superasset annum. Pernambu-
co, vbi tum habitabat, relicto, Ba-
hiam, Urbem totius Brasiliæ Princi-
pem, concessit, vt religiosæ militiæ
rudimenta in illius Collegij tyroci-
nio poneret. Iter virtutis ingressus
eum in Nouitiatus stadio impetum
cepit, vt freno contineri, non calca-
ribus incitari opus fuerit. Tria sibi
potissimum proposuit; amorem re-
rum diuinarum, humanarum con-
temptum, odium in se. Eò curas om-
nes, & neruos contulit; auocare à
caducis, & mortalibus mentem: ad
cælestia, & diuina transferre: collige-
re sese; meditationi insistere; reuo-
care ad calculos animum; instare
precibus; silentium sibi indicere,
cum

cùm loqui permittebatur, non nisi de rebus diuinis habere sermones. Duriter, & asperè se accipiebat; oculorum licentiàm frenabat modestia; appetentiàm gulæ frangebat, interdum ieiunio, interdum detractò quod acriùs gustum mouebat, & suauius prouocabat; noctu, vti erat vestitus, in nudo cubabat solo: cilicio perpetuò ferè vtebatur: flagris quotidie se cedeat acerrimè. Nil tamen illi fuit antiquius, quàm prauos animi motus comprimere, impetus naturæ frangere; affectiones, & perturbationes mentis componere; inquirere in se sapius, in speculis esse, vt si quos conatus, aut commotiones a ratione abhorrentes deprehenderet, ijs, ne temerè se proderent, aditus præcluderet, & in ipso ortu opprimeret. Despicientiam rerum humanarum testabatur sordidus habitus, humilis incessus, officia abiectissima, victus ostentatim mendicatus, mensa cum pauperibus communis, itiones in forum cum sportula: & quauis alia abiiciendi sese occasione, vel oblata, vel quaesita, perspiciebatur, quàm verè, & ex animo honores negligeret. Nec ijs contentus, in reliquarum etiam vir-

tutum studium tanto proficiendi ardore incubuit, vt suos post se comites longo interuallo relinqueret: nec dubitabat tyronum Præfectus, qui tum erat Marcus à Costa, insigni probitate, ac doctrina vir, eum pro forma cæteris ad imitandum proponere. Primo probationis, vti vulgò appellant, anno iam exacto, Spiritus Sancti Coloniam, non sine ingenti labore, contendit, vt secundum ibi annum decurreret, eaque ratione integrum bienij spatium, quod emittendis de more votis præmitti solet, iuxta proprias Societatis leges impleret.

Laborabat eo tempore graui operarum inopia Brasilia Prouincia, neq; Societatis homines vlla magis agebat cura, quàm vt multi ex Europa Socij ad tam amplum excolendum campum mitterentur: nonnulla quidem singulis ferè annis subsidia Lusitania submittebat, sed maior quàm pro numero venientium messis erat. Porro ex ijs, qui in Brasilia versabantur, alij erudiendis iam ad fidem conuersis, atq; in suscepta religione confirmandis diligentem nauabant operam; nec minori cura iuuandis Lusitanis exemplo, sermone, & Sacramentis

mentis instabant. Alij in regionis abdita alios atque alios faciebant excursus: & Gentis vicos, sparsaque per montes mapalia, venatorum more, explorabant, & Euangelij lucem in mediam illam, & tenebris inuolutam barbariem inferebant: & quæ summa votorum erat, ab inueterata vagandi licentia ad stabiles propè mare sedes, & cultiorem viuendi modum incolas traducebant. Ad id opus erat nostris sui rationem nullam habere; totos se in aliorum commoda effundere; grauissima subire pericula, famem, sitim, frigora, æstum perpeti; denique vitam ipsam pro Christi gloria, & Barbarorum salute contemnere. Verùm in tam alacri animorum procuratione, in prospero rerum cursu, illa, vti diximus, Euangelij præcones angebat cura, operarum inopia in tanta incolarum copia. Idcirco Societatis Præpositis è re Christiana visum in operis partem Ioannem vocare, iuuenem licet, ac tyronem, solidarum tamen exercitatione virtutum emeritis iam viris parem.

Præerat tùm Spiritus Sancti Collegio Ioseph Anchieta, illustrior

luis & virtutibus, & prodigijs, quàm
vt commendatione indigeat. Hunc
Ioannes virum celestis viæ ducem, ac
magistrum nactus, morum ideam
sibi proposuit, ad quam se compone-
ret: seruare illius dicta, & gesta; mo-
destiam oris; assiduitatem orationis;
cibi abstinentiam; sensuum custo-
diam; cordis munditiem: hæc prius
adumbrare; deinde ad se transferre,
ad viuum exprimere. Domi in abie-
ctis culinæ officijs se exercere; infir-
morum curam gerere; grauiter labo-
rantibus diu noctuque præstò esse,
animo semper hilari, ac læto, cuius
pax, & iucunditas in oris perpetua
ferenitate emicabat. Foris, Lusita-
nos ad odium vitiorum, amoremque
virtutis; ad frequentem Sacramento-
rum vsum, priuatis sermonibus, qui-
bus multum valebat, compellere:
controuerfias, rixasque dirimere;
mutuam illos inter, & indigenas fo-
uere concordiam: indigenas ipsos de
fidei mysterijs erudire; pauperes elee-
mosynis iuuare; morientibus adesse;
afflictos recreare; nihil prætermitte-
re, quod vel ad vtilitatem corporum,
vel ad animorum salutem pertineret.
Mirabatur Anchieta maturos in viri-
di

di ætate virtutum fructus, & senili prudentia, ne impetum animi quem ceperat, remitteret, stimulabat: sed interdum festinantis ardorem temperare opus erat, ne præcipiti gradu ad culmen properaret, & præ nimia contentione in medio cursu, vt sæpè contingit, deficeret.

Confecto iam tyrocinio, & magna suæ virtutis opinione concitata, Superiorum mandato, liberiùs cepit excurrere in proximos Brasilorum pagos, qui Sociorum curæ, ac fidei sunt commissi, magno, & Fidelium comodo, & Ethnicorum. Aliquot in ijs menses singulari cùm industriæ, tum modestiæ laude versatus, virtutem suam genti vniuersæ, & Societatis maximè Præpositis ita probavit, vt eum ad curandas in posterum animas, & obeundas prædicandi Euangelij causa missiones natum, factumque iudicaret omnes.

Est in hisce Brasilis ad Christianam pietatem formandis certa iam à nostræ Societatis operarijs præscripta ratio quam Ioannes, quantum licuit homini nondum sacris ordinibus initiato, ad vnguem seruauit. Appetente scilicet die, ære campano ad Salu-

tationem Angelicam signum datur; illo excitati pueri, ac puellæ celeriter accurrunt, in binosque partiti ordines ad templum, supplicantium ritu, procedunt. Ad portam tandiù morantur, donec alternis psallentes tertiam rosarii partem percurrant: mox templum ingressi missæ Sacrificio interfunt: missam brevis Catechismi expositio consequitur patrio sermone, omnibus communi; quibus ritè peractis, puellæ ad lanificium demum redeunt; pueri ad scholas se recipiunt, in quibus, pro cuiusque ingenio, ac propensione, partim in litteris, partim in varijs opificijs exercentur, ut ex eadem disciplina simul cum honestæ vitæ ratione viuendi accipiant facultatem. Diebus festis mos est rem diuinam solemni ritu celebrare harmonico cantu, & [varijs generis symphonijs, quæ rerum sacrarum dignitatem augent, & venerationem conciliant. Constat Brasilos nullare ad pietatem magis, quàm modis musicis permoueri; eam ob causam pleraque fidei Christianæ mysteria, quò suauius asperis mandentur ingenijs à Societatis hominibus pijs cantibus inferuntur. Sub vesperam rursus e-

dito

dito campanà signo pueri , & puellæ, seruato inter se ordine, sexusque discrimine, ad templum confluunt, ipsæque explicatur pars altera Catechismi. Ad Crucem denique modico à templo intervallo erectam alternis canentes supplicationem instituunt, ibique in genua flexi pro animis purgatorias pœnas luentibus preces fundunt, quibus expeditis domos repetunt. Huiusmodi exercitationibus Brasili pueri ad Christianam finguntur religionem; & quò tenerior illa est ætas, eò facilius ad pietatem flectitur, & multiplici culturæ Sociorum fructu respondet. Adulta verò iam ætate viri, foeminaeque, etsi institutum iam patrijs moribus vitæ cursum difficilius deserant, assiduè tamen nostrorum laboribus ab innata feritate, corroboratisque per longam ætatem vitijs ad religionem pariter, & humanitatem traducuntur: harum certè sunt indicia, quòd statim horis quotidie antequam ad rustica & fabriha opera se conferant, rei diuinæ interfint; quòd menstruas confessiones non omittant; quòd pacem colant; quòd fidei magistros obseruent; quòd augustissimū Eucharistiae

Sacramentum, & B. Virginem singulari studio prosequantur. Hebdomadæ potissimum Sanctæ dies toti ad mærorem compositi in lacrymis, & oratione consumunt; variisque pænarum modis eo tempore corpus discruciant. Dies verò iustitiales, præcipuè Desiparæ sacros, vt solemnes, & religiosos colunt, magno ad templum concursu, & pietatis sensu. Itaque iam percrebuit inter Lusitanos, nostrorum operâ hominum factum esse, vt Brasili primæuæ Ecclesiæ fideles, vel adumbrent, vel etiam referrent cum morum candore, tum vitæ integritate.

Hanc ferè cum Neophytis agendi rationem Ioannes tenuit, quandiu in illorum pagis moratus est. Cæterum quamquam multum in ijs ad pietatem excolendis operæ collocasset, plus tamen insigni probitate, ac modestia, quàm rebus alijs valuit ad continendos in officio Fideles, Ethnicosque ad fidem perducendos: quò liquido constitit ad animarum salutem procurandam maiori momento esse, sanctimoniam, quàm doctrinam.

CAPVT SEXTVM.

*Litteris operam nauat in Fluuio Ianuariq:
Babie Sacris Ordinibus initiatur.*

Grauioribus disciplinis nondum
studuerat Ioannes, amœniori-
bus contentus, quas didicerat in
Gymnasio Pernambuci antequam
Societati nomen daret: multum quip-
pè de comparandis animi virtutibus,
parùm de ingenio litteris perficiendo
cogitabat; satis gnarus maiori apud
Deum in pretio virtutem esse, quàm
sapientiam. Cæterùm Prouincię Bra-
silicę præses ad Dei gloriam magni
interesse iudicauit, reliquis, quibus
excelebat, virtutibus doctrinæ splen-
dorem, & altiorum scientiarum co-
gnitionem adiungere; quòd illarum
commendatione tutius, & fructuosius
posset in proximorum salutem in-
cumbere. Ioanni ergò præcepit vt in
Fluuium Ianuarium se conferret (no-
bile id est ad Austrum tendentibus
Brasilæ Emporium sub ipso Capri-
corni tropico, ad vicesimum tertium
gradum cum dimidio, inter Sancti
Vincentij, & Spiritus Sancti Colo-
nias

nias situm) ibique in Societatis Collegio, quod optimarum artium studijs iam tum florebat, Theologiæ, quam vocant de moribus, vacaret. In eam cum peruenisset Urbem litterarijs exercitationibus totum se tradidit pari constantia, curaque. Nihil tamen illi fuit antiquius, quàm ad vnius Dei gloriam studiosum cursum, laboremque dirigere; nihilque de orandi consuetudine, & de viuendi asperitate remittere. Inter ipsum discendi ardorem non tam discipuli, quàm magistri partes egit, editis tum raræ modestiæ, tum præstantis ingenij documentis; quibus ita se domesticis, & externis probauit, vt ab illo, veluti à communi magistro, virtutem discerent; & ad eum suis de rebus, dubijsque referrent: tantum est in virtute momenti, vt præ illa doctrina lateat; & animi demissio, & modestia oculorum omnium ad se animos, oculosque conuertat. Itaq; non minùs sibi, studendo litteris, quàm alijs virtutù exempla tradendo profuit: & rectè viuendi documenta nō tam descripsit calamo, quàm expresseit moribus.

Emenso studiorum curriculo, & multa rerum, quæ ad conscientiæ questione.

stiones pertinent, cognitione comparata, dignus qui sacris ordinibus initiaretur, ab omnibus est iudicatus; Bahiam igitur nauigatione transmissit, propriam Brasilię Episcopi sedem; is erat eo tempore Constantinus Barradas præstanti virtute, ac doctrina præsul; qui Ioannem per omnes ordinum gradus ad apicem Sacerdotij euexit. Ad obeundum pro dignitate susceptum munus perenni ferè dierum multorum oratione animū præparauit; seque ab hominum colloquijs longè abiunxit, vt proximè ad Deum accederet; intentiusquē audiret, quid in se loqueretur Dominus; identidem videlicet orans, & quidquid erat otij in sacrorum lectione librorum, & pia cælestium rerū meditatione consumens. Primum Kalendis Nouembris hostiam diuinę Maiestati, mixtis gaudio lacrymis, immolauit; quo die Omnium Sanctorum anniuersaria celebritas agitur; hoc ipso Societatē paucis antè annis fuerat ingressus; apta sanè in rem præsentem significatione, vt sui ipsius sacrificium quod Deo quondā in religione obtulerat, Agno in altaris sacrificio immolato respōderet. Solēnius illud redidit

& templi ornatus, & adstantium frequentia, & pietas facientis.

Nova Sacerdotij dignitate auctus nouum quendam spiritus ardorem concepit, & in procuranda proximorum salute maiori deinceps contentione elaborare instituit. Itaque Spiritus Sancti Coloniam repetere decreuit, vt inchoatos in vicinis Brasilorum pagis labores strenuè persequeretur, impensiusque, & pietati suæ, & alienæ saluti seruiret. Hic vnus, multorum Sacerdotum animos, ac vires gerens, omni cura institit rem Christianam pro virili promouere. Dominicis, ac festis diebus conciunculas Brasilica habebat linguâ, Symboli capita pueris, & Christianæ doctrinæ rudibus explicabat; infantes, exterosque ad veram fidem accedentes baptismo abluebat; sponso, ac sponsas ritè in matrimonio collocabat: inimicos ad pacem, discordes ad concordiam reducebat. Præcipuè verò teneram puerorum ætatem ad religionem informare studebat, haud ignarus plurimum momenti esse in Epheborum institutione, & populorum conformationem ex illorum potissimū disciplinâ penderè. Nec verò
ani-

animorū salute contentus, corporum etiam commodis quoad eius fieri poterat, consulebat. Ille ægrotantibus medicamenta conquirebat; ille egen-
tibus res necessarias suppeditabat; ille afflictoſ solabatur; ille viduarum, & pupillorum habebat curam, eorum-
que inopiam corrogatis à viris pijs, & opulentis eleemoſinis, ſubleuabat. ille demum omnium amantiffimum parentem agebat: quo fiebat, vt cha-
rus, & acceptus ſummis æquè, ac in-
fimis eſſet, cunctique illum vt Sanctum colerent; vt parentem amarent.

Biennium ferè, & eò ampliùs, ijs in pagis exegit Almeida, non minòri aliorum bono, quàm propriæ cum-
acceſſione virtutis: neque enim in-
tantis laboribus ſuum ipſe corpus in-
dulgenter habuit. Solitus erat humi cubare; tenui, & malè condito victi-
tare cibo: bis corpus ſingulis diebus flagellis cædere, illiusque motus ferro domare cilicio: triduum ſepè inedia traducere: nec rarò totā hebdomadam, excepto die Dominico, quem ſumma religione colebat, ieianare: purgataque in hunc modum mente, & carne cum vitijs affixa cruci, liberior orationis alis ſubuectus ad Superiores

ros euolabat animus, totusque in cælo, in maximis etiam occupationibus versabatur. Ab ijs Brasilorum pagis maiorum iussu discedens, magnum sui desiderium cunctis, magnam suæ sanctitatis opinionem reliquit.

CAPVT SEPTIMVM.

Fluuiam Ianuarium repetit: indè ad oppidum S. Pauli, Carigicæ missionis causa, se confert.

ANnus decurrebat à Christo nato MDCVII. cùm Emanuel de Lima à Generali Societatis nostræ Præposito designatus Prouinciæ Brasilix Visitator, ad Bahiæ portum Vlisypponensi naui secundis ventis applicuit. Huius imperio Almeida in Fluuium Ianuarium redijt Sacerdotio iam insignitus, & litteris probe instructus; quibus se muniuit præsidijs ad obeundas, prædicandæ fidei causa, per Brasiliam missiones. Quinto ferè postquam eò peruenerat mense, Sancti Pauli domum concessit, vt Societatis munia exerceret, ijsque oppidanos ad pietatis studium inflammaret. Ex itinere à Visitatore iussus inspicere domicilium, quod habet Societas

cietas in oppido Sanctorum in ipso penè Brasiliæ extremo ad gradus quatuor suprâ viginti Austrû versûs condito, vt siquid in eo vel mutandum, vel corrigendum esset, id vicaria potestate præstaret. Tantam in non grandi ætate de illius prudētia opinionem maiores conceperant. Sub finem ver-
tentis anni S. Pauli domum sospes intravit. Distat id Oppidum à sinu Ianuario leucas circiter quinquaginta; à Sanctorum verò portu quadraginta ferè milliaria mediterranea versûs recedit. Cōstituta ibi Societati sedes est anno salutis humanæ MDLIV. Emanuele Nobrega, viro doctrina pariter, & religione conspicuo, Brasiliæ Pro-
uinciam moderante. Primum in nouo Collegij tēplo sacrû fecit Ioseph Anchieta die 25. Ianuarij B. Pauli Apostoli Conuersioni sacrâ; hanc ob rem Oppido ipsi S. Pauli nomen impositû.

Circumiecta regio optima celi tēperie, & soli vbertate præstat: fructiferis arboribus, maximè pinubus, abūdat, quę pineas nuces melopeponibus magnitudine pares ferunt. Syluæ densissimæ, ac frequentes folijs nunquam deciduis perpetuò vernant, peregrini generis feris, auiibusque
facun-

fecunde. In scissuris petrarum, arborumque hiantium truncis apes libero vagantes aere aluearia sibi parant, ex quibus purissimi mellis riuus passim defluunt, illoque victus genere interficientes Brasili famem pellunt, & fractas inedia vires reficiunt. Ea est soli fecunditas, ut triticum ex Lusitania non ita pridem allatum parca admodum, & rudi cultura satum, curatun-
 que, supra quam credi possit maiori quam in Europa copia fundatur: ferunt mensurae unius fructum in centenas multiplicari. Accedit quod generosum vinum profert, aliaque frugum genera ex Hispania nuper aduecta.

Qua mare spectat regio, & incolae Carigy Pati sedes habent, in immensa altitudinis montes assurgit, accessu difficiles, aditu asperos, & sylvis imperuios: cumque ad altissima tandem cacumina summo cum labore, reptando manibus, pedibusque peruenis; videas inde libero circumquaque oculorum deiectu alios alios montes, iustis quasi graduum intervallis, impositos, altissimis arboribus coronatos: hinc prata varijs distincta floribus, herbisque perpetuo virentibus.

con-

conuestita : illinc fufas camporum planities pifcofis lacubus, & fluuijs maximis intercifas omnium denique confufa rerum, fed grata oculis varietate beatas. Auri, atque argenti ferax regio perhibetur efle : & sæpè contingit vt è terræ vifceribus eruantur saxa aureis intercurrentibus venis fplendētia, non obfcura latentium auri fodinarum indicia . Hæc tamen Lufitani metalla conflandi auri, argenti- quē non benè periti, & ad alias minoris pretij merces comparandas intenti, artis beneficio, hominumq; industria egerere nō curant, acfi parū referret ad publicam vtilitatem auro atque argento Lufitaniam abundare .

Illud hic reperitur animal quod iufto, ac idoneo Lufitani vocabulo *Pigritiam* appellant; vulpis magnitudine, colore cineraceo, capite rotundo : auriculis meritò caret, quòd tardum ad obediendum natura finxit: tanta quippè tarditate fe mouet, vt non incendētis inftar pergat, fed torpentis, in eodem loco inertia membra explicet; & longiffimo fpatio temporis vix lati vnguis terminum excedat.

Aliæ atque alię regionem nationes
inco-

incolunt communi cunctis vocabulo *Carigiorum* dictæ, sed impositis ob varias causas cognominibus, a Lusitanis discretæ. Quà mari imminet præruptis vndique munita rupibus, ijs, ceu muris, Patos (sic dicunt) natura cinxit, & a finitimis gentibus separavit. His proximi inhabitant Aabacui, barbari, ac feri homines, non modò Christiano, & Lusitano, sed humano infesti nomini; latrocinijs maximè dediti, nec minùs in crapulam, veneremque proiecti. Quà verò in mediterranea recedit regio, alia *Carigiorum* natio sedes habet mitiori cæteris ingenio, captuque meliori. Aliæ alios terræ tractus gentes occupant saginandis ad escam hominibus vorandisque illorum carnibus assuetæ, maximè vbi se vino factitio obruunt, & mentem ebrietate perdunt, quas enumerare superuacaneum ducimus satis constat Petrum Corream, & Ioannem de Sousa Societatis IESV alumnos sagittis olim a Carigijs fuisse confixos, eoque mortis genere a Barbaris illatæ, martyrij palmam adeptos esse, vt eiusdem Societatis Scriptores fusiùs narrant ad Annum MDLIV.

Iam-

Iamdudùm Prouinciæ Brasiliæ Præsides de mittendis ad Carigios, qui remotiores à mari sedes habent, Euangelij præconibus agitabant; magnæ quippè conuersionis spem fecerat gentis indoles ad Christianam disciplinam capeffendam idoneæ, & Lusitanis commercio, fœdereque coniunctæ; sed variæ, & graues inciderunt occupationes, quæ illorum cogitationes aliò auocarunt. Tandem cùm Emanuel de Limà Visitatoris officio per Brasiliam fungeretur, re maturè discussà, decretum, vt ad illam gentem Euangelij doctrinà imbuendam nonnulli è nostris Socij mitterentur. Duo præter cæteros, qui eam sibi prouinciam deposcebant, fuere delecti, Ioannes de Almeida, cuius vitam moresque describimus, & Alphonsus Gagus, magno rerum vlu vir, & Brasiliæ linguæ benè peritus.

Pedibus iter conficere solent nostri cùm huiuscemodi peregrinationes suscipiunt (nisi mari sit nauigandum) viatorio nixi baculo, tenui viatico instructi, & idoneo Brasilorum, qui in subiectis Societati pagis viuunt, numero comitati, quod Euangelij operarijs percommodum contingit;

nam Brasili cùm sint venandi, & piscandi apprimè periti, ijs maximè artibus per viam sibi, & Patribus vitum quærunt, quem Sylvæ, & fluuij passim obuij facilem præbent: & quod caput est, cùm itinere iam confecto ad suorum gentilium venere pagos, morum similitudine, communisque vsu sermonis, in illorum se animos, & voluntates insinuant; munusculis deindè alliciunt vt nostris, de quorum moribus, & doctrina præclara commemorant, in disciplinam se tradant, & ab illis de Christianæ legis mysterijs erudiri velint. Mitigata his artibus gentis ferocia, opportunè de religione sermonem inferunt Patres, & rationibus eorum sensibus accommodatis initio præcipua fidei capita exponunt; mox de ciuilibus vite commodis, de rerum omnium abundantia in maritimis, cultisque Lusitanorum oppidis multa subiiciunt; in eaque suas transferre sedes idoneis suadent rationibus; quibus demùm efficitur, vt illi non parùm de innata barbarie deponant, deducantque ad maris oram colonias, vbi in pagos, & villulas distributi, nostrorum hominum curâ, facile Christianos discant ritus

ritus , & induunt mores .

Hoc igitur consilio Iohannes , & Alphonsus itineri se commiserunt . Arduum id , & densis impeditum sylvis erat , ferarum etiam gentium incursionibus obnoxium : ijs tamen difficultatibus Deo benè fauente superatis , ad destinatam sibi regionem peruenierunt : nec paululum quietis à multa contentione , & lassitudine corporibus dandum rati , annuntiandi confestim Euangelij initium fecerunt ; & quidem non exiguo operæ fructu : nam ingens Ethnicorum numerus animis sitientibus ad sacrum fontem ex omni ætate sexuque venit : & quò altius in Neophytorum cordibus Christiana imprimeretur religio , quod eos docebant verbis , id ipsum confirmabant exemplis . Præcipuo gentis pago Christi iam legi subiecto , alios Ioannes cæpit regionis viros percurrere ; modestia , & comitate obligare sibi incolas , eaque ratione facilius ad veram religionem adducere : magnos infantium , puerorum greges baptismo abluere ; non paucos ex ijs breui defunctos ad cælum transmittere ; ingentes vbique capere animorum fructus : nam vitæ

species modesta, & religiosa non gratiam modò, sed etiam admirationem conciliabat Euangelizanti: illique libenter se quisque tradebat formandum, cuius perinde amabat, & suspiciebat virtutem.

Tantis fidei incrementis inuidebat Satanas, tantamque à Dei famulis animarum prædam sibi eripi non ferebat; ipsis igitur rerum initijs obuiam ire non distulit, & secundum Euangelij cursum morari suis, vt solet, artibus non omisit. Aabacuos, de quibus supra meminimus, non minùs acres Christiani nominis hostes, quàm natura, moribusque immanes, impulit, vt ijs Brasiliis, in quibus ad fidem adducendis nostrorum desudabat industria, repentè bellum inferrent, & subita incursione illorum vicos, qui nullo ferè, aut perexiguo monimento septi, hostium furori patebant, armis inuaderent. Ingens confestim ab incolis clamor tollitur; cuncta fæminarum lamentis, & eiulatu complentur: alij inauia fugam arripiunt; alij consilij inopes, incerti quid agant, hâc illâc errabundi discurrent: multi
bar-

barbarorum aduentu interclusi à fuga, sagittis confixi mortem oppetunt. In summa illa omnium trepidatione stetit animo Ioannes inuictus, & omni prorsus timore superior, acsi in amicos, & Socios incidisset: periculi tamen conscius, & Neophytorum salutis memor, alacer procedit in medium, & bono illos animo esse iubet, & certa spe victoriæ iniecta ad pugnam erigit, magnisque hortatur vocibus, vt fiducia in vno Deo collocata, impauidi ruant in hostem. Factum vt præceperat: ipse prælato manu Sacrosanctæ Crucis vexillo, in medios sese hostes intulit, fide, non ferro protectus; iisque tantum terroris iniecit, vt continuò dare terga coegerit, multis illorum in fuga cæsis, paucis è Carigijs desideratis.

Is tum summæ admirationis cæsus victoriam est consecutus. Aabacui Christianæ gentis odio innatam feritatem acuate, antequàm inirent prælium, nonnullos teneræ ætatis pueros, in quos fortè incurrerant, sagittis confoderant, & illorum cadauera per agros strata feris, auiisque voranda.

reliquerant. Affecit ea miserorum cædes graui dolore Ioannem, illa potissimum ratione, quod sacri baptismi expertes decesserant certæ damnationi obnoxij. Ergò, cælesti haud dubiè instinctu motus, se dedit in preces, nec prius ab illis destitit, quàm intellexit fore, vt omnes ad vitam, salutis æternæ obtinendæ causa, reuocarentur. Hac concepta fiducia, singulorum in brachia defunctorum corpora accipit, & ad se colligit arctius; mox pectori appressa infuso fouet spiritu: mirum visu, dictumque: omnes ad vitam mortui continuo redierunt; eatenus tamen quoad sacro abluti fonte, & candida innocentiae veste induti ad beatam vitam ex ipso penè lustralis vndæ regenerantis vtero peruolarunt. Hæc à pluribus, & idoneis testibus sacramento adactis litteris prodiderunt Brasiliæ Prouinciæ Socij, de quorum fide dubitare nefas esset. Non alia res magis Ioannem apud Fideles, Ethniosque reddidit sanctitatis famam illustrem; effecitque, vt Carigij illius moti consilij patrias desererent sedes, & in proximam Lusitanorum Coloniam confestim iter arriperent.

CAPVT OCTAVVM.

Redit cum Neophytis ad S. Paulum: nonnulla in itinere edit prodigia.

Igitur vbi Neophytis deliberatum nouas ad S. Paulum sedes quærere, in quibus commodiùs viuere Lusitanorum tecti præsidio, & nostrorum opera hominum utiliùs excoli possent, ingens virorum, feminarum, & puerorum turba, Ioanne duce, & authore, in viam se dederunt. Cœterùm quia per infesta barbararum gentium incurfionibus loca transiturent, seruata inter se militari more iusti exercitus specie, & instructo veluti ad pugnam agmine, procedere opus fuit, nequã hostibus obnoxij forent. Confecto iam magna ex parte itinere syluis vt plurimum densissimis impedito, & altissimis montium iugis immenso labore superatis, ventum in campos floribus varijs, herbisque odoriferis vestitos, vnde facilis ad S. Paulum, & expedita via ducebat: ibi loci commoditate allectum sacris operandi desiderium vehemens Ioannem cepit. Ara igitur

raptim à Socijs excitata , solo circum circa floribus , ac frondibus , palmarumque ramis , ornatùs gratia , instrato , Missæ Sacrificium inchoauit : aderant omnes intentis in facientem oculis : ecce tibi sacram in altum attollente hostiam , vt ab omnibus conspici , & adorari posset , de repente mouere se loco frondes , agitari tripudiantium more flores , palmæque visæ , & susurrum quemdam edere iucundissimum , ceu gestirent illa Deum ratione laudare , & Ioanni applaudere sacrificanti . Omnium eò conuersi oculi prodigio fidem fecerunt . Attonitos spectaculum circumstantes tenuit : primùm insolitæ rei aspectu commoueri ; mox latari ; demùm superis gratias agere , quòd felici illo omne confirmati pergerent alacres reliquum viæ conficere , & benè de euentu sperare discerent .

Erectis ibi pro tempore tugurijs paulùm substiterunt , tum vt fractas à longi & insueti itineris labore vires reficerent ; tum vt ferarum venationi , quibus vicini abundabant saltus , vacarent . Accidit interim importunè , vt iniecto de industria in proximam syluam

ſyluam igne, quò feræ ſuis è latibulis
in medium prodire coactæ, facilè in
iacula venatorum, qui omnes ſylua-
rum aditus, exituſque præcluſerant,
inciderent, præſens ſibi crearent,
ſuiſque rebus periculum; nam cùm
venatio feliciffimè procederet, &
magnus iam ferarum numerus con-
ſectus eſſet, flante vehementiùs ven-
to, perlatus vltra quàm vellent,
ignis, totam latè ſyluam, tuguria
etiam tumultuaria operà excitata,
& arborum contecta ramis, fædo
vastaui incendio, & impedimenta
corripuit, & conſumpſit: vnum
ſuperfuit in medijs flammis Almei-
dæ breuiarium, quod hæ vixdum
attigerant, cùm reſilierunt; & quæ
ſe audaciùs obtecta fumo eiecerant,
attonitæ hæſerunt primùm, deindè
refugerunt, ceu Numen ſentirent,
& verſo in religionem lauſu, coi-
ere in Orbem, & coronæ inſtar
circumfuderunt ſe ſe; & in va-
cuum, quem reliquerant, ſinum,
medium receperunt: mox arcuato
ductu molliter erectæ in altum,
more Iridis, cinxere codicem: pu-
tares flammæ innati aſcendendi
appetitùs oblitæ alieno impetu

cieri: nec illud erat moueri, sed gen-
tè: nunc ire, aggredi: nunc redire,
ac cedere: rursum conglobari, & den-
sari iterum explicari, & solui: inter-
dum se fumo inuoluere, & condi; in-
terdum erumpere, ac lucere innoxia.
Ita diuinæ psalmodiæ codex alluden-
te magis, quàm lædente flama illæsus
permanfit, & intactus; quod rari pro-
digij loco habitum est. Constat rem
totam à Socijs tum visam, & multo-
rum postea testimonijs confirma-
tam.

Tribus in itinere mensibus iam
exactis, S. Paulum suis cum Neophy-
tis Ioannes peruénit, fractis adeò vi-
ribus, æstu confectus, & fame, vt vix
ab amicissimis agnosceretur: eam ta-
men in ore lætitiā, eam in oculis
alacritatem præferebat, vt omnibus
palam faceret, se labores, & erumnas
animarum causā perpeffas in summis
habere delicijs. Cæterum quia alie-
næ vtilitatis cura antiquissima illi
erat, egit protinus cum primoribus
Lusitanorum, vt commodas nouis
hospitibus sedes constituerent; agros
etiam ipsis assignarent, in quibus va-
ria frugum genera, mandiòcam præ-
sertim, ad victum sererent (genus id
est

est herbæ, portulacæ magnitudine, cuius radicem Brasili contundunt, contusam exprimunt; tum ad Solem exsiccant, molis deinde conterunt, & in farinam non ingrati saporis redigunt) eaque vitæ ratione contenti in fide pariter, ac sede persisterent, & strenuam Lusitanis operam, si fortè aduersus hostes bellandum esset, amicorum more, præstarent. Plura quàm petebat, à Lusitanis obtinuit. Ergo dum Neophyti nouis ad S. Paulum fundandis Colonijs, & colendis insistent agris, Almeida excolendis illorum animis diligentem cœpit nauare operam, pari iuxta labore, ac prouentu.

CAPVT NON VM.

Quatuor simul pagorum curam gerit; & rem Christianam valdè promouet.

EX ijs quæ superiori capite narrauimus, satis constat Brasilos, qui nostrorum hominū secuti consilia interiora deserunt regionis loca, in quibus olim ferarum ritu per montes syluasque sparsi habitabant, in paucos ad mare cogi pagos propter vr-

bes, cultaq; Lusitanorum oppida, quò
faciliùs propria, sibiq; apta institutio-
ne a Socijs excolantur: & licet Curio-
nũ munus assumere sit ab instituto So-
cietatis alienũ; Brasiliæ tamen Episcē-
pis, & quod caput est, pijs̃simis Lusita-
nię Regibus, qui pro suo egregio pro-
pagandę religionis studio, illud de Sũ-
mi PP. cõsensu, munus Societatis ho-
minibus demandarunt, morem gerere
opus fuit, & pagorũ curam sustinere,
non minori obedientiæ laude, quã ani-
marũ lucro. Nam promulgare Euan-
gelium, & conscribere in Christi mili-
tiam populos, nec deinceps excolere,
perindè est atque vineam conserere,
quam deindè patiari syluescere. Ho-
rũ pagos quatuor in S. Pauli confinijis
positos, nec ignobiles, nec infrequētes
ad Christianam pietatem formandos
Ioa. suscepit. Omnes identidẽ percur-
sabat, pedibus sepè nudis, sic vt breui
intervallo singulos in orbẽ reuiferet.
Baptismo lustrabat infantes: pueris, ac
rudibus fidei elemēta tradebat: egros,
& afflictos leuamētis varijs recreabat:
morientibus aderat: mortuos sepelie-
bat. Neq; verò animis solũ, sed etiã
corporibus, quoties res, locusque po-
fceret ferebat opem. Dominicis, &
festis

festis diebus rem diuinam semel, atq;
iterum facere cogebatur, vt omnes
misſe ſacrificio Neophyti intereſſe vl-
lo ſine incommodo poſſent; quòd ipſe
tam diſiunctis inter ſe pagis aſſe ne-
quibat in tempore, ijs verò optimi pa-
rochi officijs aſſiduam dabat operam,
adeò cibi & ſui met oblitus, vt talibus
cum miniſterijs paſci crederes. Illud
autem præ oculis ſemper habebat, vt
vitæ innocentis exēplo omnes ad vir-
tutem accenderet, offenderet verò ne-
minem: quo fiebat vt Neophyti il-
lum, ceu hominem cælo delapſum re-
uererentur; & ad ſuos venientem pa-
gos proſtratis humi corporibus vene-
rabundi exciperent. Eam ipſam de-
nique, quam olim ad Spiritus S. Colo-
niã agendi cum Neophytis rationem
tenuit, niſi quòd adaucto ad S. Paulum
pagorum numero, & incolarum, vbe-
riorem exercendę in proximos chari-
tatis, & diuinæ quærendæ gloriæ ma-
teriem naſtus, totum ſe in illorum
commoda liberius effundebat.

Quidquid verò temporis aſſidujs
occupationibus eripere poterat, re-
rum cæleſtium meditationi dabat,
tam in ſe collectus, & mente in vno
fixa Deo, acſi in ſumma ſolitudine

viue-

viueret nullis hominum congressibus, negotijsque distentus. Ab hoc igitur fonte tantas hauriebat illius spiritus vires, vt nullis vnquam cederet laboribus; nullis periculis terre- retur quò minùs in curanda commissa- rum sibi ouium salute strenuum se, & vigilantem exhiberet pastorem.

CAPVT DECIMVM.

*Sinum Ianuarium reuersus Paticam ag-
greditur missionem.*

Millesimus sexcentessimus deci-
mus septimus currebat annus,
cùm Ioannes à suorum Neophyto-
rum pagis, in quibus mentem, curas-
que defixerat, Maiorum imperio ius-
sus discedere, Flauio Ianuario sered-
didit. Paucos hic menses moratus
expeditionem Paticam agitare ani-
mo cœpit. Postulauerat paulò ante
Saluator Correa de Sâ Benavidius,
clarissimi sanguinis Dynasta, & Ia-
nuariæ Coloniae Præfectus à Prouin-
ciæ Præsidente, qui tum erat Petrus de
Toleto, duos è Societate Presbyte-
ros, qui Patorum gentem Euangelij
prorsus ignaram ad vnius Dei cogni-
tio-

tionem adducerent, ratus Christiani Præfecti nomine se dignum non esse, nisi eos populos, quibus imperabat, in Christi redigeret ditionem. Prouincialis, & sua sponte iam incitatus, & tanti viri autoritate permotus, binos ad id Socios destinavit, Ioannem de Almeida, de quo scribimus, & Ioannem Fernandes, spectatæ virtutis virum, Almeida non minùs nomine similem, quàm animi magnitudine clarum. Erat plena laborum, ac ærumnarum prouincia, & certis vitæ periculis exposita, dubius verò missionis euentus: ceterum vtriusque Ioannis animus periculis, & laboribus maior erat; nec dubitabant vbi Dei cultus, & animorum causa ageretur, in omnia se vitæ discrimina conijcere: nihil enim poterat ærumnarum iuxta, atque animarum sitientissimis viris optatius euenire; cum iamdiù laboriosam id genus aliquam ad infidelium terras expeditionem, & omnibus votis expeterent, & postulando sine fine perseverarent. Et quidem Almeida per aliquot dies hominum conspectui se subduxit, vt familiarius cum Deo ageret, & idonea sibi compararet arma quibus humani generis

neris hostem debellaret, & innumeros ad Ecclesiæ castra Ethnicos compelleret.

Cæterum Carigios, ad quos fide imbuendos duo Socij peregrinationem instituunt, ab alijs eiusdē nominis distinguamus (constat enim non vnā in Brasilia gentem hoc nomine appellari) *Patos* Lusitanorum more vocabimus, cuius imponendi causa nominis anseres fuerunt, quibus illorum abundat regio, & Lusitani, qui primi eandem regionē explorarunt, maternā lingua *Patos* dicunt. Suas hi habent sedes in mōtibus Oceano mari proximis, centum ferē leucas Austrum versūs à sinu Ianuario semotis: facili, ac miti sunt ingenio, corporibus firmis, & procēris. Contracto non ita pridem cum Lusitanis commercio, idēque inter vtramque gentem pacis fædere, sanctē amicitiaē leges seruant. Colendis agris dant operam, quos tamen reliquæ per Brasiliam nationes perpetuo torpentes otio, & mactandis hostibus, vorandisque illorum carnibus assuetæ, neglecto prorsus cultu, sinunt syluescere. Etsi arte sagittandi excellant, pacis tamen studio tenētur; nec vnquam, nisi

gra;

grauibus irritati, iniurijs aut damnis affecti, aduersus hostes bella suscipiunt. Vnum, sed multis inuolutum erroribus colunt Deum, quem Tupam, hoc est, Tonantem appellant; eumque maiorum omnium authorem esse existimant. Tam sunt dediti veneficijs, ut ab ijs auelli, & ad Christianam religionem adduci, diuturno & operoso nostrorum labore vix possint. Hi mores gentis.

CAPVT VNDECIMVM.

Ad S. Catharinæ Insulam primum; mox ad Patos peruenit; usque annuntiat Euangelium.

Mense igitur Febr. anni 1618. in Ianuario sinu, Fernandez Socio, Canoam Ioannes conscendit. (Canoam vocant indigenę genus linternium, quod maximè ad sinus maris traiciendos paratum habent; & sunt excavae pinus oblongę & angustę, sed quę leuissimo momẽto inuersę effundant in mare vectores.) Littus legendo (alto quippè se committere illo nauium genere Brasili nõ audet) prospero vecti cursu ad Sanctorum portum incolumes appulerunt; vbi corrigendis oppidanorum mori-

moribus, ijsque ad pietatem excitandis dierum aliquot traxere moram. Indè Austrum versùs nauigare pergentes, Martio exeunte mense Sanctę Catharina Insulam tenuerunt. Angusto hæc freto à continenti dirimitur: quinquaginta ferè milliaria ambitu complectitur: mari eminet admodum piscoso, & ingentis pretij vnionibus opulento. Incolę simplici, & aperto sunt ingenio ad Christianam religionem suscipiendam, bonosque mores illi conformes induendos valdè idoneo: cæterum fidei magistris destituti alta iacebant barbarie consepulti.

Excensione in terram factà diligentem confestim promulgando Euangelio dare operam Socij instituerunt audiores scilicet animarum, quàm cæteri vnionum: & magnum facerent illarum quæstum si diutiùs inter Insulanos morari liceret. Verùm dicta iam profectiōni instabat dies, & secundus ad nauigandum ventus afflabat. Inchoatum igitur prædicationis laborem intermittere opus fuit, eumque in commodius tempus differre. Indè digressi modico maris traiectu superato, continen-

tem

tem attigerunt, quam variæ Carigiorum Nationes inhabitant, dispersis per agros latè mapalibus, Nomadum more, sedem pabuli ratione mutant. Has, quia nondum matura res erat, Almeida tenui quadam Evangelij cognitione præstrinxit magis, quàm informavit, & gentis ferociam Christiana mansuetudine deliniuit. Quo liquidò apparuit nullam tantam esse feritatem, quæ non possit vnus hominis vsu, & comitate mitescere. Ad portum demùm quem petebant *Boigpatibam* nomine, Deo benè iuuantem peruenerunt. Hic magno incolarum plausu, & gratulatione excepti, id se facere confirmantes, quò beatum ducerent illum diem, quò Societatis homines de Brasiliica gente optimè meriti in eam regionem aduenerent, vt rectam ad cælum viam edocerent.

Paucis ad quietem corporū diebus datis, cæpere Socij Christianæ fidei præceptionibus Barbaros erudire, permultos baptismo abluere: nullis laboribus parcere, vt errantes ouiculas à Satanæ faucibus eriperent, & ad Ecclesiæ caulas adducerent. Dumque totus in id Almeida maiori, quàm

magis in singula momenta lue, Ioannes diuino, vt euentus docuit, spiritu afflatus, præcepit, vt omnes, qui illo morbi genere tenebantur impliciti, incisâ venâ sanguinem mitterent: factum vt imperauerat; moxque sanguine misso, omnibus est restituta salus. Quo diuinæ virtutis experimento venefici pudore suffusi latebras quæsierunt, eoque amoto obice res Christiana è sententia fluere, & vberior operarum culturæ fructus respondere, in finitimas quoque gentes prædicationis fama peruadere, ac multas excire studio videndi Ioannem, & rectam salutis viam, eoduce ingrediendi. Sed exeunte iam præscripto à maioribus missionis tempore, & maturo in Sinum Ianuarium reditu, diutiùs inter Patos versari Euangelij præconibus non licebat. Itaque, compositis utcumque rebus, & consilio profectiois Neophytis patefacto, incredibile dictum est, quàm grauem animis dolorem ceperint, quantum profuderint lacrymarum, quòd parentum loco Patres habebant; seque, ouium instar, horridas inter sylvas manere luporum dentibus fraudibusque expo-

expositas vehementer dolebant. Almeida tamen, & Fernandes Superiorum mandata Neophytorum dolori, ac lacrymis prætulerunt; eosq; blandè solati, recipientes breui se iterum affuturos, discessum vt quamprimùm fieret, vrgebant. Illa demum lege abire permissi, vt feni Paticæ gentis legati cum ipsis in Fluuium Ianuarium simul irent, qui de muniendo nostrorum ad eos reditu apud Urbis Præfectum, & Societatis Prouincialem seriò agitarent: ab ijsque suppliciter orarent, vt suæ orbitati, ac solitudini consultum irent. Martio igitur iam adulto mense anni millesimi sexcentissimi decimi noni, consensu cum Brasilorum legatis naue, secundis admodum ventis vsi Fluuium Ianuarium, è cuius portu superiori exierant anno, incolumes redierunt.

CAPVT DVODECIMVM.

Aliam ad Goitacazos missionem obit.

Confecta ad Patos expeditione, aliam ad Brasilos Goitacazos (sic vocant) Ioannes suscepit; quam gentis ingenium ferox, & mixta cum
feri-

feritate barbaries, longè difficiliorem reddebat. Fusam in longum tractum planitiem hi habitant modico à mari spatio recedentem, quam duo nobiles fluuij Paraiba, & Macae, ceu Tygris, & Euphrates Mesopotamiam, cingunt. Alij præterea non ita clari nominis amnes multa riparum amœnitate vestiti varijs per campos meandris serpunt, donec in Oceanum se exonerent. Ab vno latere Regio Spiritus Sancti Coloniam, ab altero Sirius Ianuarij Præfectorum attingit. Incolæ, non hominum more, sed beluarum ritu viuunt. Plurimum herbis sponte nascentibus, piscatuque vescuntur radunt anteriorem capitis partem, reliquum prolixo capillitio tegunt, humeris, quò terribiles appareant hostibus, inundante. Nullos omninò colunt Deos, augurijs ad insaniam dediti vt futura prælagiant; intestinis sese atterunt, ijsque continentibus bellis, nec vnquam fessa per inducias arma deponunt. Captos in prælijs hostes multorum dierum cura benè saginatos solemnibus mactant cæremonijs, & occisorum carnes habent in delicijs. Perpetuis licet inter se incensi odijs discordias alant, & bella,

bella, si fas est dicere, plusquam ciuilia, gerant, si tamen externorum vis ingruat hostium, coniunctis de repente inter se viribus, animisque in vnum collectis aduersus illos omnes conspirant. Procedente die, anno redempti orbis M. DC. XXX. cuiusdam navis Lusitanæ causâ, quæ ad proximum Goaitacazijs littus vi tempestatis abrepta in syrtes impigit, laxatisque compagibus miserè perijt, finitimæ Brasilorum nationes Lusitanis amicitiaæ fœdere coniunctæ, id illorum arte & præstigijs factum racæ, sumptis in eos armis, vniuersos ad internecionem dèleuerunt. Hæc de ijs commemorasse Barbaris operæ pretium duxi, vt omnibus palàm fiat ad quas in altero orbe nationes Societatis homines, prædicandi Euangelij causâ, expeditiones suscipiant; in quas ærumnas, & vitæ pericula se conijciant vt vnius Dei gloriæ, & animorum saluti consulant.

Porro Goaitacazij cruenta per id tempus quo Ioannes ad illos iuit cum finitimis Lusitanis bella gerebant; neque hi gentis ferociam armis contundere, neque animos beneficijs ad
pacem

pacem allicere poterant . Ergò Societatis Prouincialis è re Christiana & publica fore putauit, duos è nostris Sacerdotes virtute præstantes ad eos mittere , pacis & religionis tractandæ causâ : quiquè raræ exemplo modestiæ ferinam possent domare barbariem: cui summa erat rerum omnium pro lege licentia: vsus enim quotidianus docet ad inferendam in barbaris etiam mentibus mansuetudinem & humanitatem , breuem ac compendiariam viam esse ijs maximè virtutibus fidei præcones excellere . Re Deo impense commendata , huiusmodi prouinciam imposuit Ioanni Lobato eximiæ probitatis viro , qui multis postea clarus prodigijs in Sinu Ianuario fato concessit anno Christi M. DC. XXIX. & Ioanni Almeidae , cuius prudentiam & paternam in Brasiliis charitatem non semel expertus erat .

Exeunte Septembri mense , Anni M. DC. XIX. Caput frigidum petierunt ; id est nobile promontorium , quòd à positione loci , & frigoris inclementia nomen traxit , à Ianuario Sinu in Orientem tendentibus

D

obie-

obiectum, & paucorum dierum navigatione disiunctum. Hic se nostris comitem addidit Stephanus Gomez, Capitis eiusdem Præfectus, & Brasiliæ gentis valdè studiosus. Eo duo Ioannes aucti socio, cantis vecti vicina stringentes littora ad Bagrum, usque fluuium prospero sunt cursu delati, ibique in terram egressi, itinere satis Longo, & sylvis obsito, non sine magno labore confecto, ad optatam regionem peruenerunt. Ab incolis maioribus quàm præferret gentis barbaries, amoris significationibus sunt excepti, & ad suos admissi vicos, variisque munusculis, regionis more, donati. Explorata gentis beneuolentia aggressi Patres Christianæ legis vulgare mysteria, & veri Dei cognitionem obcæcatis superstitione mentibus ingerere; easque paulatim ab innata feritate ad humanitatem traducere. Addebat prædicationi pondus morum integritas, & modestia oculorum, index continentiae, quæ in Sociorum facie emicabat, & Barbaros vitiorum quamquam cæno immerfos, in sui admirationem rapiebat; & quemdam aperiebat aditum, ut radium Euangelicæ

licæ veritatis admitterent. Igitur breui gens illa , qua nulla vsquam aut minus culta , aut magis immanis ad eam diem fuerat , non modò mitis & facilis , sed magna ex parte erudita fidei mysterijs cæpit esse . Tantum Christi disciplina ad humanitatem valet. Cæterum quia Brasiliæ genti mobile & versatile ingenium est ; & nisi assiduus ac præsens operarum accedat labor , qui illam in officio contineat , in pristinos facilè ritus , moresque reuoluitur ; huius vitandi causâ periculi, totis viribus institere socij , vt quos baptismo nuper abluerant, ij data quamprimum commoditate, solum verterent , & in proxima Capiti frigido regione, quæ Lusitanicæ ditionis est , sedes fingerent , ibique in pagos & oppida distributi , leges sibi conderent, agros colerent , & institutum vitæ Christianæ cursum tenerent constantes , sub idoneis Societatis nostræ rectoribus & magistris .

Ad extremum de ineundo cum Lusitanis pacis fædere tractatum ; quod nullo ferè negotio imbutis iam vera religione animis, sancitum fuit. Compositis in hunc modum Sociorum industria rebus, quoniam præstituta iam

à maioribus dies instabat, ab eā regione, non sine multis incolarum lacrymis, discesserunt. Conscensa nauī, Frigidi primum Capitis Promontorium feliciter præteruecti Sinum Ianuarium salui & incolumes tenuerunt, vbi lætis de constituta cum Barbaris pace, & propagata inter illos religione multiplex ciuitati vniuersæ gaudium attulerunt.

C A P V T X I I I.

Redit ad Patos: biennium inter illos moratus ad S. Pauli collegium reuertitur.

ALias ex alijs missiones serere videbatur Ioannes, vt vberiore periculorum & ærurnarum messem colligeret: famam siquidem, sitim, æstum, de fatigationem, rerum omnium inopiam, ipsam denique mortem, vt animarum saluti consuleret, in summis habebat delicijs. Idcirco vixdum reuersus à Goaitacazijs, de repetenda ad Patos, quorum supra mentionem fecimus, expeditione cogitauit, vt nostrorum opera hominum, & remedio destitutis,
omni

omni cura & studio subueniret. Vifa res superioribus maturâ consultatione digna, propter multas & graues, quæ per id fortè tempus inciderunt, difficultates. Coacto ea de re domi concilio, alij in aliam abierunt sententiam Patres; & tempus consultando trahebant. Dirimendæ controuersix causâ, nonnulli ex ijs optimum factu iudicarunt, rem totam Patris Generalis arbitrio committere, qui tum erat Mutius Vittelleschus, vir doctrina pariter & religione insignis. Is, causâ Romam delata, ritè examinatis in omnem partem rationibus, decreuit, vt duo è nostris Sacerdotes prudentia, & pietate insignes, & rebus Brasiliensis benè versati, Paticam repeterent missionem, ibique sedem figerent, quò vtiliùs in posterum, & commodiùs in illa Domini vinea laborarent. Explorata Generalis volûtate, duo fuerunt ad eâ expeditionem Socij designati; Antonius Araùsius, & Ioannes de Almeida: non sine pia quadâ æmulatione cæterorû, qui illâ suis humoris prouinciam imponi multis cum lacrymis postulabât.

Præcipitâte iam anno 1622. ambo se cômiserunt mari, vel vitâ si res, posceret,

pro Dei gloria, & adiumento proximorum parati fundere. Ad obuiam primum Insulam *Bouicuacampam* nomine, quæ medio ferè spatio inter Sinum Ianuarium & sanctorum oppidum iacet, secundis ventis delati: ibi dum vectores curandis parumper corporibus immorantur, Ioannes insolitarium locum littori proximum, orandi causà, secessit; abstractoque à sensibus animo, totus Deo fruebatur. Magna diei parte ita meditando consumpta, instante iam profectio- nis tempore, sensere comites vnum illum desiderari. Diù igitur per totam Insulam diligentissimè perquisitus, nec vspiam inuentus, non leuem cunctis sollicitudinem iniecit. Demum vbi sese ille à suauissimis cum Deo colloquijs expediuit, hominibus se reddidit, & in medio littore, socijs rei nouitate attonitis, repentè apparuit: quasi in ipsius esset potestate hominum aspectui se subducere, & red- dere cum vellet.

Paucis post diebus res longè illustrior, & mirabilior contigit. Sereno cælo & tranquillo nauigabant mari. Ecce tibi in medio ferè cursu visum vastæ molis monstrum magno hia-
tu

tu caput in altum attollere , & toto ad glutendam canoam , qua vehèbantur , impetu ferri . Cuncti imminentis periculi metu terreri , expallescere , despondere animos ad mortem se comparare ; vni Ioanni mens , animusque constitit : itaque pauore solutus ad puppim sedens , defixa in superis mente , diurni pensum officij persoluebat . Animaduerso tamen sociorum periculo , hilari vultu procedit in medium , & bono illos animo esse iubet , & timorem prorsus omittere ; statumque manu ducta in modum Crucis , ubi se ad canoam monstrum satis applicuit , immaniter hianti benedictionem impertijt . Mirum visu , dictuque : sensit in cruce diuinæ virtutis pondus inesse : confestim conuerso in alteram partem cursu , ingentem è naribus reflans aquæ vim , modò saltibus se super vndas attollens ; modò aquis se immergens , ludentis more , innocuum à vectorum oculis se longè proripuit : at illi Ioannis beneficio , tantò periculo erepti vicinum Barbaris portum , secunda tempestate , subierunt incolumes .

Excepere illi nostros ingenti læti-

ria & gratulatione, confluente è vicinis pagis multitudine omnium ordinum vestes eorum, manus, pedes, impressa etiam solo vestigia exoculari certantium: inde quasi humeris, triumphantium more, sublatis, & in apertam campi planitiem deducti; vbi seuocatis à reliqua turba natu maioribus, Patres exponunt, se in eam, sponte venire regionem, tot mari teraque exantlatis laboribus, vt sedem in illa figant, tamdiuque moram trahant Euangelium prædicando, donec Creatorem mundi omnes agnoscant, eiusque legem obseruent, quò paratam bonis in cælo gloriam consequantur. Visi sunt Angelos audire loquentes, dictaque auidis auribus excipere, & summo assensu probare. Continuo extructa domus, in qua habitarent Patres, (tugurium verius appellares, cum ex aggestis tumultuaria operatuncis, transuersisque lignis constaret) huic politiori opere Ædicula, Sacra ad rem diuinam faciendam adiecta. Tum Socij in illorum conuersionem totis viribus incumbere: diu, noctuque cum rudioribus agere, vt eos Christi mysteria edocerent: nullis laboribus parcere, vt errantes quiculas
ad

ad vnius veri Dei cognitionem adducerent; nec minùs sermone, quam vitæ religioſe exemplo legis, quam prædicabant, innocentiam & ſanctitatem oſtendere, quæ tantò ſalubrior & efficacior prædicatio eſſe ſolet ad lucrandos Eccleſiæ Ethnicos, quanto pulchrior eſt forma pietatis rebus, quàm verbis, expreſſa.

Cæterùm laborioſi magis, quàm vtilis & fructuoſi noſtrorum conatus erant: tum quia Euangelij curſum veneficorum, qui multū apud illam gentē authoritate valent, morabatur improbitas: tū quia Antonius Ioānis ſocius, & miſſionis præſes, aliam ab illo agēdi cum Barbaris rationem inierat: quippè qui cū eſſet ſibi ipſi aſper & inſenſus, quā apud ſe formauerat virtutis ideam, ad eam conformare Neophytos vellet, cū ijs ſeueriùs & vehementiùs, quàm teneræ illę mentes ferre poſſēt, alieno tēpore agebat; eo euētu vt ab alienatis à Chriſtiana religione animis, indigenę tātę cōparandę virtutis ſpe deiecti, ad priſtinos errores, barbariēq; redirēt. Ioānes cōtrā ſuapte natura mitis & humanus, haud ignarus nimia ſeueritate ingenia exalperari, & à ſuſcipiēda Chriſti fide auerti:

Xauerij prætereà Indiarum Apostoli memor consilij. Non alia re magis ad Christum conuerti Ethnicos in suscepta iam religione contineri, quàm clementia & comitate: his maximè virtutibus ad conciliandos Patrum animos vtendum esse censebat; & gradatim cum eisdem procedendum, donec tractu temporis haustam à maioribus feritatem deponerent, & ad Christianam viuendi rationem mores accomodarent. Cùm suspecta valdè earum sint incrementa rerum, quæ subitos habent profectus; & citò ruant quæ breuì crescunt. Neque ab hominibus in America paulòantè ferarum ritu viuentibus, atque in alta natis barbarie, tantam conuersionis initio vitæ innocentiam exigendam, ac si in media Europæ luce nati, educatique fuissent.

Antonius nihilominus in sua persistebat sententia, & Ioannis consilia improbabat, quasi Barbaris conniueret, & nomen indulgentia sanctitati Christianæ religionis officeret. Quo satis constitit, præstanti sæpè virtute viros, & animorum contentione concordēs, inter se iudicijs, ac sententijs

rentijs ex ingenio , ac indole diffi-
dere.

In his rerum angustijs Almeida re-
dè se facturum putauit , si rem to-
tam Patri Prouinciali, qui tum erat
Dominicus Coëllius , per litteras si-
gnificaret , & illius exploraret sen-
tentiam , vt quidquid is sibi facien-
dum præscriberet , sine cunctatione
perficeret. His acceptis litteris Pro-
uincialis rescripsit , vt Ioannes data
quamprimum commodà nauigandi
facultate , nauem conscenderet , &
Sancti Pauli domum repeteret. An-
tonium verò iustis de causis diutius
inter Patos morari iussit Ethnicis
conuertendis , Neophytisque pro vi-
rili parte iuuandis; seriò tamen admo-
nitum, vt mitius in posterum & beni-
gnius cum illis ageret , quò maiores
caperet animorum fructus. Vtrique
autem idoneos itineris , & stationis
socios assignauit.

Biennium , & eo ampliùs , in illa
regione consumpsit Almeida: & li-
cet ex macro & sterili illo solo parem
suis laboribus fructum non college-
rit , permultos tamen ex omni sexu,
atque ætate mortales , qui grauib;
affecti morbis morti iam erant pro-

ximi , Christianis sacris , prout fe-
rebant temporum angustia , vtcum-
que instructos salutari fonte lauit ,
& ad cælum , vti fas est credere ,
breui defunctos transmisit . Idem
pietatis officium peregit erga pue-
ros & infantes , quos immatura
mors ad sempiternum raptura foret
interitum , nisi baptismo lustrati
æternum sibi vitæ aditum aperuis-
sent , quorum ingentem fuisse nu-
merum comperimus : horumque
salutem suorum illa in expeditione
laborum pretium æstimauit , ex qui-
bus splendidissimam sibi patientiæ
coronam in cælo contexuit . Rebus
igitur , quoad eius fieri potuit ,
compositis , profectiorem in Lus-
itanorum coloniam adornauit . Con-
scensa nauicula , secundis admodum
ventis vsus , ad Sanctorum portum
celerrima paucorum dierum nauig-
atione peruenit : cuius aduentus ,
quò diutiùs longiùsque abfuerat ,
eò maius vniuersæ coloniae gaudium
attulit .

Plures annuntiandi Euangelij
causà in Brasiliæ mediterranea Ioan-
nes fecit excursiones , quarum cer-
tam & accuratam cognitionem per
lon-

longissima regionum interualla affe-
qui non potui Romæ, in qua à mul-
tis iam annis dego : ab ijs proinde
describendis abstinere volui :

quoniam mihi est animus

certa tantum & ex-

plorata, non du-

bia, aut in-

certa,

litteris pro-

dere.





LIBER SECVNDVS

CAPVT PRIMVM.

In Domo S. Pauli confessorium agit: multa scitu digna edit prodigia.



Raſtis iam ab affiduis laboribus, & à longa ætate viribus, in S. Pauli Domum, Superiorum mandato, Ioannes conceſſit; ubi nouo animi impetù capto, ad excolendam Domini vineam, quæ ſylueſcere cum vitijs cæperat, totum ſe contulit; quanto cum rei Chriſtianæ commodo, ab emendatione morum, a malè parti lucri reſtitutione, à frequentî Sacramentorum vſu, à pace grauiffimis allata diſcordijs, ſatis apparuit. Porro etſi altioris ille doctrinæ, quæ Theologiæ ſcholæſticæ nomine continetur, præſidijs munitus non eſſet, præclaris tamè rectæ vitæ exemplis

plis, & pijs de rebus diuinis sermonibus, quos passim cum Brasilis, & Lusitanis habebat, omnes ad pietatis officia incitabat; nimirum rapit animos virtus eximia, tumque maximè cum per exempla illustria cælestem suam pulchritudinem prodit. Accessere complura prodigia naturæ viribus maiora, illius ope, precibusque patrata, quæ omnium mentes hominis veneratione iam captas, pronas ad secunda Christi vestigia reddiderunt. Ire per singula opera pretium erit, ne si ex ijs quædam in lucem demus; quædam silentij tenebris inuoluamus, communi rempublicam vtilitate fraudemus, & tanti viri gloriæ detrahamus.

Puella quædam cognomine *Grimalda* videndi facultatem amiserat; ingrauem etiam morbum inciderat: multos iam annos in perpetua nocte mæstissimam tolerabat vitam: vocatus Ioannes, vbi decumbentis confessionem excepit, & manum capiti imposuit, preces quasdam recitando, tenebris ægra repentè discussis, optatam cum sanitate oculorum lucē recepit, integrisq; è lecto viribus surgens, domesticis cepit vacare ministerijs.

Trans-

Transuersus in vtero cuiusdam fæminæ fætus hærebat, neque maturo iam tempore in lucem edi, neque brachio- lum, quod extulerat, contrahere poterat; interim fæmina acerbis cruci- batur doloribus, & in apertò vitæ di- scrimine versabatur. Ioannes rei con- sciùs eò accurrit, vt periclitantis è partu confessionem audiret: peracta confessione, brachiùm cruce signauit, eoque adhibito remedio tam facilem illi partum præstitit, vt protinùs in- noxià fætum effuderit.

Blasius Mendez graui, & periculo- so iamdudum morbo laborabat: huic Ioannes diuino illustratus lumine ali- quando prædixit, illum præsentì qui- quam ægritudine liberandum, cæte- rum insequenti anno grauiori corre- ptum iri, ex qua vltimam obiret diem. Prædictioni fidem fecit euentus; æger breui conualuit; sub finem tamen se- quentis anni iterùm decubuit, & de- cessit.

Sebastianus Gillius brachij alterius patiebatur dolores, quod propterea alba obuolutum fascia de collo su- pensum gestabat. Semel contigit, vt se offerret viæ comitem Ioanni rei Christianæ causa, vicinos Brasilo- rum

rum pagos periurrere cogitanti ,
qui vt hominis vrbauitati se gratum
ostenderet , & officium rependeret
beneficio , manu illius brachium leui-
ter tetigit , eoque tactu dolores se-
dauit .

Pergebat aliquandò in villam à S.
Pauli oppido parùm distantem , vt
cuidam mancipio grauter ægrotanti ,
& confiteri volenti aures daret : itine-
re ferè toto importunus imber , quòd
pluuium tempus esset ipsius vexauit
Socium ; isque totus pluuiâ madidus
ad infirmâ casam peruénit : sicco
prorsus , & intacto Ioanne a cuius ,
vel extremo villo vestis imber absti-
nuit .

Vitulus natus erat tibijs in arcum
recuruatis : non ijs insistere ; non loco
mouere se poterat : opus erat vt bubul-
cus bestiæ perindè , ac nutrix infantis ,
curam haberet . Igitur tantę redimen-
dæ causâ molestiæ vitulum accipit in
brachia , & Ioannem conuenit , mul-
tisque ab illo precibus contendit , vt
rectas vitulo suo tibiae , pedesque re-
stituât . Ille rustici fiducia , & simpli-
citate captus , re-prius Deo commen-
data , imperauit adstanti , vt vitulum
suis vti pedibus fineret , & aperto cāpo
vaga-

vagari: res mira: vitulus explicatis de repente tibijs, pedibusque iusto loco restitutis integer, & sanus extitit: mox è bubulci brachijs saltu defiliens ludere, currere, & toto lasciuire campo cæpit, cunctis, qui aderant, rei nouitate attonitis.

Vigente ad multos dies solis æstu, soloque nullis è cælo effusis imbribus arescente, languebant faseoli, quos in suo seuerat horto Maria Pedrosa, fœmina Lusitana: ad Ioannem supplex confugit: & suos illi faseolos valdè commendat: is lustrali aqua hortum adspersit, eique, ac si rationis compos esset, iubet pro imperio, vt Mariam voti sui compotem faciat. Tri-duo exacto, hortus imperantis dicto, & Mariæ votis abundè respondit: tantamque illius generis leguminum fudit copiam, vt fidem penè excederet.

Excurrebat aliquandò ad confessionem ægrotantis in rusticana villa, mancipij, affecta quamquam tum esset valetudine: optimum quipvè ducebat sibi deesse, ne deesset ægrotis: peracta confessione, villæ dominus officij sui esse duxit rete pensile, baiulis mancipijs, quo domum reuehere-
tur,

tur, illi offerre, qui commodissimus habetur per Brasiliam iter agendi modus. Negavit Ioannes se corpore utcumque firmo, eo retis genere indigere; multaque in hanc sententiam dixit. Cœterùm importunis demùm precibus cedens se in rete composuit. Parum à loco processerat, cùm baiulis minimè sentientibus, à reti auolavit, & ad S. Paulū citissimè præcucurrit; eò cum baiuli post aliquot pervenissent horas, ad Collegij ostium illorum præstolantem aduentum Ioannem viderunt, modestè subridentem; quasi admissæ piè fraudis conscius deceptos vellet admonere de subtracto onere, & inani sarcinæ iactatione: baiulis sibi opus non esse: illorum proindè vsuram, pro arbitrato, vel admittere, vel reijcere.

Vir quidam religiosus oppidi quod *Sanctorum* dicitur de atroci patrando facinore secum, nemine confcio agitabat: quòd id flagitij genus ne subolere cuquam, vel maximè fido debuerat propter atrocitatem. Sed non tulit tacitum Deus, qui Ioanni longè apud S. Palum habitanti reuelavit: quem inde miro quodam modo oblatum in cubiculum religiosi ho-

fi hominis nihil minùs cogitantis coram per speciem exhibuit: à quo seuerè reprehensus destitit a proposito, & ad Deum ritè, ac ex animo conuersus, veniam ab eo cum lacrymis impetrauit. Re ex sententia confecta, Ioannes in suum se oppidum, cubiculumque recepit.

CAPVT SECVNDVM.

*Illustria quædam in eodem oppido
vaticinia.*

PROPRIA Ioannis fuit perennis quædam rerum futurarum cognitio diuinitùs comparata; quæ ita per omnes illius vitæ vagatur actus, vt tota perpetuis vaticinijs contexta esse videatur. Quò res fiat lectoribus notiores, singulas singulis Collegijs, in quibus contigerunt, cum alijs tamen mixtas prodigijs, iusto ordine assignabimus: A S. Pauli domicilio, quod senio iam grauis, primùm incoluit, initium ducemus.

Elisabetha Nunes Moreira,
parùm æquo ferebat animo ancil-
læ

læ cuiusdam morbum & grāuem, & diuturnum : illam Ioannes inuifit, & benignè monuit, vt fuam ad Dei voluntatem omninò componeret : a Deo quippè decretum eſſe, vt quotquot tum erant in eius domo familiares breui obirent. Vaticinatio verior fuit, quàm lætior: vix pauci decurrerant dies, cùm omnes ſunt mortui.

Oneraria Caſtellana, ex Hiſpania in Occidentis Solis Indiam ſolue- rat ; ſed ſæde tempeſtate iactata, diffracto malo, laceriſque armamentis, Sanctorum in Braſilia portum ægrè tenuit. Vectores maris ſæuitiem, nauſeamque pertæſi, reli- cta eo in portu naui, terreſtri ſe- contulere itinere ad S. Paulum, duodecim ferè leucas, vti in loco diximus, mediterranea verſus, ab oppido diſiunctum : ibique ingenti pecuniæ ſumma propoſita, peritum aliquem viæ ducem quærebant, qui illos per inuias quaſdam ſolitudines ad Buenos Aires, nobile ad Argenteum Fluiuium, Hiſpanæ gentis Emporium, deduceret : ſed quia latè in indomiti, immanesq; colebant Barbari, res erat plena diſcriminis, quod

quod adire horrebant omnes : vñus inuentus est Lusitanus, magni vir animi, qui se itineris ducem suis cum mancipijs Hispanis obtulit. Antequàm in viam se daret, Ioannis se precibus cõmendauit. Is hominem à suscepto consilio multis rationibus auertere frustra conatus, palàm confirmauit : pertimescere se valde, ne quid illi grauis in itinere accideret incommodi ; neuè ab illius Socijs diuina Maiestas secratoris alicuius delicti pœnas expeteret. Nec vanus, sed religionis plenus is metus fuit. Eius negligens Lusitanus necessarijs rebus instructus cum Socijs iter capeßijt. Post aliquot dies ventum in montes, vnde nota fiebant viarum diuortia : inde Hispani rectam ad Buenos Aires viam arripuerunt: Lusitanus suis cum mancipijs Sanctum Paulum versùs redijt. Vix mouerat loco, cùm scædum quoddam morbigenus eum, Sociosque inuasit ; & pestilentem vim morbi ægritudo animorum, omniumque rerum inopia vasta illa in solitudine augebat. Iacebant miseri suis ad arbores suspensi retibus, Brasiliæ more, macie deformes, mortuis, quàm viuus propiores, circumfremementibus diu.

diu, noctuque feris, quæ prædæ suspensis inuolutæ retibus inhiare videbantur. In his rerum angustiis subiit animum Lusitani sera penitentia facti, & cerra Ioannis prædictio: illius cæpit inuocare nomen, & auxiliū implorare. Res dictu mirabilis: sensit is leucas ferè ducetas absens miseri preces; ac repentè humana maior specie, media illa in solitudine oranti apparuit: secumque detulit vas ingens purissimum melle plenum, Brasiliæ etiam farinæ, macerateque ad fumum bubulæ quantum fame laborantibus ad multos dies satis esset: mox Lusitanum proprio compellat nomine, blandisque solatur verbis; ac mærore torpentem excitat, iubetque, vt sumpto cum Socijs cibo, Sanctum Paulum confestim repetat: eoque venturum incolumem certò denuntiat. Quibus dictis, videri desijt. Ergò Lusitanus cælesti fiducia plenus, inter Socios partitur cibum; illoque sumpto, fensere omnes illicò sibi vires restitui, & nouo quodam animos vigore roborari. Recreati, ac refecti dapibus itineri se commiserunt: ac diuina regente clementia, multis & grauibz defuncti periculis, ad oppidum Sancti Pauli

li incolumes peruenerunt. Necdum finis prodigiorum. Lusitanus antequàm domum se reciperet, & vxorem cum filijs prægaudio gestientibus, quæ sibi occurrerat in platea, salutaret; officij sui esse duxit ad S. Michaelis pagum vicinum diuertere, in quo tum Ioannes Curionis officioungebatur. Eò cùm peruenisset, ad illius se abiecit pedes; nec finem fecit agendi grates: donec ille manu alleuatum, Christo Dei filio, & humanæ salutis vindici gratiam habere, domumque redire iussit, vt vxorem, & filiolos, quos in platea oppidi obuiam sibi factos mæstos, & insalutatos reliquerat, sui aspectu, alloquioque soletur. Sic Lusitanus redditus suis; & Ioannes mirābilis omnibus visus est. Quanta hic, & quàm illustria insint, & vaticinia, & prodigia, non est mecum, qui Scriptorem ago, expendere: referre officij mei est. Erunt qui vel legendo pònderent, vel dicendo amplificent.

Nonnulli ex oppidanis iniquo valde consilio decreuerant, vicinos Brasilorum pagos inuadere, & incolas in seruitutem abducere: nec vlli mortaliū id detexerant: Ioannes tamen
rem

rem odoratus, consilij authores monere institit, orare etiam, & obtestari, ne fæderatis pagis bellum inferrent, ne publicæ pacis iura violarent; ne Lusitanæ gentis nomini, illato per iniuriam bello, turpem dedecoris notam inurerent: sed nihil apud illos tanti viri preces, & consilia valuerunt. Igitur properantibus ad bellum *Vereri se admodum*, dixit, *ne meritas ab illis diuinum Numen pœnas ex peteret*. Atque vti dixit, prorsus euenit. Brasili quippè vbi iniquo se bello peti senserunt, coniunctis interse viribus, & sumptis confestim armis, Lusitauis occurrunt; multos sagittis configunt; non paucos interimunt: reliquos, iniecto, vti apparebat, diuinitus pauore animis, in fugâ verunt: nonnulli densa vicinorum nemorū vmbra te&ti mortem euadunt. Interfuit prælio Dominicus Maciel, vir alioqui pius, & honestus, de quo fama percrebuit a Barbaris fuisse occisum: idcirco Maria Aluarenga illius coniux tã tristi perculsa nuntio vitã in lacrymis, & dolore trahabat: eã inuisit Almeida, iussitq; boni ac læto animo esse: Dominicū .n. eius coniugē ipso Natalis Christi die domū rediturū incolumem. Quæ res per

vicinos Brasilorum vicos latè vulgata suspensos omnium expectatione tenebat. Ecce tibi ea ipsa quam Almeida designauerat die, Dominicus domum redit, suosque incribili afficit gaudio: eoque plus admirationis res habuit, quòd locus vbi pugnatum fuerat, multa passuum millia aberat à Sancto Paulo.

Hoc ipso in Oppido sæua admodum tempestas aliquandò contrà Societatem exorta est, quæ nostrorum patientiam hominum valdè exercuit, & illorum ergà Brasilos incolas charitatè mirificè probauit. Oppidani coaceruandis per auaritiã pecunijs intenti, iniqua exercebant lucra, perque iniuriam parta vi retinebant: & quod deterius erat nullum delictorum genus indigenas non iustum putabant: eos dolis circunuētos excipere; iniusta detinere seruitute; modis omnibus vexare, quinetiam interdum impedimento esse ne fierent Christiani ne potestate illos diuexandi, eorumque vtendi operà in Saccararijs officinis priuarentur: quo fiebat vt Brasili Europæos homines accerrimo haberent odio; & religionem Christianam veluti talium magistram scelerum

lerum, hinc quasi ex certa nota æstimantes, vltro damnarent. Ergo Socij, ne suo Patrum, & Curionum deessent officio, iniquis oppidanorum conatibus se opponere, auaritiem reprehendere; diuini Numinis iram intentare; omnia moliri vt Brasilorum conuersioni, & religionis bono consulerent. Illi contrà, nostrorum reprehensiones ægrè ferre; flagrare in eos ira: odio furere: exilium minitari; eò procedente die res deuenit, vt cum Socij a tuenda incolarum libertate, oppidani ab opprimenda non desisterent, ac veluti ex æquo religio cum impietate certaret, vicerit tandem, vt sæpiùs contingit, virtutem vitium, & pietatem improbitas. Itaque nostris vis facta: omnes à suis sedibus pulsi, aliòque migrare coacti, non minori oppidanorum infamia, quàm exulum gloria. Affecit huiusmodi casus graui dolore Ioannem ea tempestate in alio morantem oppidum propter enormem iniuriam Societati illatam, tum propter indignum facinus a Lusitanis admissum. Cæterum quia in eo exilio fidei magis causa quàm Societatis periclitabatur, tandiù institit rem Deo enixè

commendare , donec nostrorum ad
suas sedes reditum precibus impetra-
uit . Itaque die quodam cum magno
animi ardore orasset , voti se compo-
tem factum sensit , prædixitque , mul-
tis simul adstantibus , redituram ad
Sancti Pauli oppidum Societatem an-
tequam ipse ultimam obiret diem .
Vera dixisse probavit euentus ; subla-
tis quippè tempore procedente di-
scordijs , compositisque communi
vtriusque partis consensu rebus , So-
cij paucis ante Ioannis obitum mensi-
bus , suo sunt Collegio restituti , maio-
ri cum oppidanorum gaudio ,
quàm fuerant cum ignomi-
nia eiekti ; vt publicum
decus , & gratula-
tio , publicum
dedecus ,
&
infamiam com-
pensaret .
(. .)

CAPVT TERTIVM.

*Alia in Sanctorum oppido edita à Ioanne
prodigia recensentur.*

ANnos ferè quatuor in Sancto-
rum omnium Colonia Ioannes
consumpsit, non sine ingenti Lusita-
norum bono, & Brasilorum: neque
intrà vnius oppidi, licet ampli, & o-
pulenti fines Apostolici viri charitas
se potuit continere, sed latè per vici-
nos vagata pagos, vniuersorum tum
animi, tum corporis commodis ser-
uire cæpit. In primis omnium con-
fessione constat repressam Almeidae
consuetudine, & sermonibus illo in
oppido peccandi licentiam, extincta
multorum odia, iniquas mercatorum
negotiationes sublatas; inductum fre-
quentem Sacramentorum vsum; &
morem audiendi profestis etiam die-
bus sacrum, aliaque & pietatis in
Deum, & in proximos charitatis offi-
cia excercendi. Ita paucis à Ioannis
aduentu mensibus Oppidanorum
mores sunt immutati, vt alij pror-
sùs, atque, apparerent: & tum antea
demùm iustum oppido Sanctorum no-

men conueniret. Ciuium præsertim animos ad Dei amorem accendebat concepta iampridem de illius sanctitate opinio, maximum in persuadendo momentum; innumeris illustrata prodigijs: nonnulla ex ijs seligere relatu digniora, eaque litteris tradere, instituti mei esse duco.

Iuerant piscatum initio mensis Iulij simul cum Lusitanis Brasili in quemdam maris sinum paucis ab oppido leucis disiunctum. Comitem se discedentibus addidit Almeida, ut dum capiendis illi piscibus operam darent, ipse, Apostolorum more, animarum piscatorem ageret: ea tamen a nostris lege discessit, ut antè festum Beati Ignatii Societatis nostræ parentis, quod pridie Kalendas Augusti celebrari solet, in Collegium prorsus rediret. Solidum ferè mensem Socij piscando consumpserant; piscatio ex voto successerat, & Almeida egregiè munus suum obierat. Instabat iam Ignatii peruigilium, vrgebatque Dei Seruus discessum Cæterum coorta repente tempestas profectionis consilium disiecit: & ea erat loci natura, situsque, ut nonnisi mari illuc adire, indeque redire liceret. His temporum

pòrum , & loci angustijs interclusus Almeida animum non despondit , sed fretus Deo , periculisque superior sa- uienti magis , ac magis in singula mo- menta pelago minimè cedendum ra- tus , exigua admodum canoa mari se committere decreuit , vt Superiorum mandatis satisfaceret . Tum Socij Brasili , & Lusitani illius maximè a- more ducti , & imminentis periculi metu perterriti , ad eum coire , obfi- stere , & orare , ne se insanis fluctibus velit obijcere , & cæco obedientiæ im- petu ad mortem ferri : maiorum præ- cepta rationis arbitrio temperanda esse , non præcipiti consilio exequen- da : remittendum breui pelagi furo- rem , & procellam finem facturam . Talia inculcantibus Socijs neminem minùs tangebant obiecta pericula , quàm ipsum qui erat aditurus . Illis igitur valere iussis , lætus & alacer ca- noam conscendit : indeque conuersis in irata freta luminibus , & elata in- àltum dextera decumanis pelagi flu- ctibus benedixit : res diu mirabilis : de repente mare detumuit ; venti po- suere , & tempestate sedata , tenebris- que abactis serenitas cum luce redijt : secunda palò post adspirans aura na-

uenit sub ipsum D. Ignatij peruigiliū
ad Sanctorum portum celeri cursu
prouexit.

Nobili puellæ, nomine Marcellinæ
de Siqueira tetri vis morbi loquendi
facultatem abstulerat; os etiam fœdum
in modum distorserat, & hianti simile
reddiderat. Ioannē adiere illius paren-
tes suppliciter obsecrantes, vt ad ipso-
rum domum accedere dignaretur. Eò
cū venisset, decumbentis confes-
sionem, vt potuit audiuit; animi sa-
lute procurata, corpori etiam sani-
tatem fufis ad Deum precibus impe-
trauit.

Inuifit aliquandò Michaelēm An-
dradium graui iamdudum, ac pericu-
lofo morbo laborātem: occlufę erant,
de medicorum confilio fenestrę cubi-
culi in quo iacebat, ne quid noxię au-
ra admitteret: vix Almeida id fuit in-
gressus, cū repentē cæleſti quadam
circumfufus luce, Solis inſtar, appa-
ruit, locumque perobſcurum emiſſis à
facie radijs illuſtrauit: illo indè exeun-
te, lux etiam pariter diſceſſit. Paucis
poſt diebus Andradius conualuit, vi-
ſumque à ſe Ioannem clariffima ni-
tentem luce, & facie mirum in modum
radiante affirmauit.

Vehe-

Vehebatur aliquandò naui cum nonnullis Brasilis, & Iacobo Carrilio Lusitano. Littus propemodùm radebant, tranquillo mari, sereno cælo, leni à puppi aura spirante: longè prouectos ad commodissimum maris sinum, quem valles ambiebant multa nemorum amænitate vestitæ, cepit desiderium vehemens loci commoditate fruendi, seque à maris nausea paululùm recreandi. Exscensione igitur in terram factà, & aliquot horarum quiete capta, Carrilius paucis comitatus Brasilis in proximam littori syluam, quæ gallinis syluestribus abundare ferebatur, venatum ire decreuit. Risit Almeida cùm Socios ad venationem accinctos, & magnam gallinarum copiam spe iam deuorantes animaduertit: eosque inanes ad littus redituros esse prædixit. Nec dicto fides abfuit. Die ferè toto in venatione consumpto, ne vna quidem gallina capta domum redierunt. Postero die Ioannes Carrilium monet, & Socios, vt arma capiant; tempus etiam, & certum locum in quo venentur, intento in eandem syluam digito, designat: eosque lætos ire iubet, & fiducia plenos. Factum vt præce-

perat, ac intrà aliquot horarum spā-
tium tantam gallinarum cepere co-
piam, vt ijs ad littus portandis vix
vniuersi venatores sufficerent.

Idem Carrilius plures Ioannis
Epistolas pietate monitisque cælesti-
bus plenas in vnum fasciculum colle-
gerat, quas pretiosi loco thesauri do-
mi asseruabat, noctuque cū ibat cu-
bitum capiti supponere consueuerat,
vt illarum tectus præsidio securus
dormiret. Contigit nocte quadam,
vt excitato fortè domi incendio, cu-
biculum, in quod ormiebat cum tota
suppellectili conflagraret. Vnū illum
fasciculum; quod prodigio, miracu-
loque non caruit; reliqua incensa do-
mo, flamma non attigit.

Emanuel Pirez Esquatcia, Nauar-
chus Lusitanus, è Sanctorum portu
soluere naue Brasilicis onusta merci-
bus cupiebat: sed quia importuna
tempestas erat, longiorem, quàm
vellet, moram trahebat in portu, non
leui iactura mercium. Ioannes mise-
ri precibus sollicitatus ad maris littus
se contulit: ibique furenti subinde pe-
lago, & insanos fluctus attollenti, fræ-
num benedictione iniecit: sensit Ocea-
nus potentis virtutem crucis: exem-
plo

plò venti vis, ac procellę cecidit; mox tranquillitas secuta est: secundaque afflante aura Emanuelis nauis omnium opinione celerius portum tenuit, quem petebat.

Semel inuisit Mariam Siqueiram, scēminam eximię piā: hārebat Marię lateri filia nouennis, cui maior quā pro ætate inerat prudentia, & morum probitas. Conuersis in virgunculam Ioannes oculis prædixit, fore vt breui Deiparę affideret in cęlo, eodem ferę modo, quō Matri adhærebat in terris. Paucis post diebus, præter omnium opinionem virguncula decessit, haud dubia salutis spē concepta: æquum enim erat credere eodem Almeida spiritum afflatum, & certum de obeunda morte vaticinium, & de obtinenda post mortem in cęlo gloria edidisse.

Hęc & id genus alia edita a Ioanne prodigia magnam illi apud omnes existimationem pararunt. Itaque cum vulgò haberetur vt Sanctus, & prophetię dono mirabilis existeret, Lusitani, & Brasili nihil ferę alicuius momenti, illo in consulto agebant: & cum grauius premebantur morbis salutarem illius opem implorabant.

& voti compotes passim fiebant impetrata sanitate.

CAPVT QVARTVM.

*Repetit Sinum Ianuarium: ibique multa
prebet vaticinationis, & virtutis
indicia.*

A N N O à partu Virginis
M. DC. XXXIX. senio
iam penè confectus in Sinum Ianuarium Ioannes redijt, vt frugiferam ea in Vrbe suæ, & aliorum iuuandis animis quietem ageret. Porro etsi æqualem semper innocentis vitæ tenorem seruasset, in vltima tamen senectute positus, cen nihil anteacto tempore profecisset, ita omnes animi, & corporis vires ad profectum intendit. Ergò ad summa quæque concitatissimè ferri: volare magis, quàm eurrere: altius in rerum diuinarum contemplatione mentem defigere: rigidiùs tractare corpus: ad religiosæ perfectionis metam impetu

petu maiori contendere ; nec quicquam de charitatis ardore remittere , qua fouendæ inter proximos pietati , & illorum confessionibus audiendis assiduam dabat operam : in hoc totus esse ; hoc omnibus expetere votis , vt Christum omnes colerant , & amarent . Nec verò splendore virtutum , quàm prodigiorum multitudine fuit illustrior , vt quos ad Deum non traheret virtutis amore , rerum mirabilium nouitate alliceret.

Est animus ire per singula ; clarissima quippè cum sint , non minùs illa seruiant lectorum oblectamento , quàm vtilitati.

Ludouicus Ribeiro de Silua graui oppressus morbo , simul ac capiti signum Crucis Ioannes impressit , recreari animum sensit , morboque omni corpus leuari.

Lectò tenebatur affixus Simon Vasconcellus Soc. I. Sacerdos , is qui postea Brasiliæ fuit Prouincialis , pestilenti affatus aere , fusoque per artus humore noxio , & totius corporis membris captus , acerbos patiebatur dolores : mouere se loco non poterat ; non cibum , aut somnum capere . Tertius

tius currebat à contracto morbo iam mensis ; cùm Ioannes infirmi cubiculum ingressus , oculos in Christi è Cruce pendentis effigiem , quæ ibi erat , coniecit ; & multis ab illo precibus ingrauescenti indies morbo remedium flagitavit : atque , vt maius precibus adderet pondus Deiparæ etiam, Ignatij Soc. nostræ parentis , & Xauerij implorauit opem : vbi precandi finem fecit, Simonem bono animo esse iussit ; eumque obtinendæ salutis spe impleuit . Sequenti die summo mane reuisit ægrotum . Somno recreatum , meliùsque habentem reperit : induere sibi vestes confestim præcepit ; e lecto surgere , contractosque iamdudum artus per cubiculum inambulando explicare , & exercere . Paruit mandatis Simon : dumq; iste se domi continet explicandis a morbo gressibus intentus , ille in ædiculam B. Virginis ab Exilio dictam , paucis ab Vrbe passibus distantem , pergit , sacri faciendi causâ , in gratiarum actionem ; & ad id potestatem sibi fieri , sanitatis futuræ præscius , multis ante diebus à Collegij Rectore petierat . Peracto Missæ Sacrificio in Collegium reuersus Simonem Socium habuit, ita
la.

sanum, ac confirmatum, vt nunquam decubuisse videretur.

Ionnes Oliua rei domesticæ adiutor, lenta tabescebat febris; ingentem etiam sædi humoris copiam singulis ferè diebus per os euomebat: prope diem morituum credebant omnes. Almeida illius persanandi miro tenebatur desiderio: infirmorum quippè curam sic ille ex officio habuerat in Collegio, vt ab vnus salute omnium pendere salus videretur. Igitur à P. Rectore obtinuit vt sibi liceret, Oliua Socio, in rusticanam villam, animi gratia, per aliquot dies secedere: ibi, ceu arduam aliquam expeditionem aggredi cogitaret, & multis institit in seipsum sœuire modis: iungere cum noctibus orando dies: quotidie, nec sine lacrimis, ad aram facere. Dies nouem, quos Deiparæ, & B. Xauerio, ad impetrandam Oliuæ sanitatem, votiuos destinauit, huiusmodi viuendi ratio tenuit. Nono iam exeunte die voti se compotem factum sensit, & salutem agroto exoratum. Continuò letis Oliuam vocibus compellat, *Charissime*, inquit, *frater immortales Virginis, & Xauario grates agas, qui te mortifera laborantem febre* per-

persanare voluerunt ; latentique in hepate vlceri à quo ceu fonte perennis manabat sanies , remedium adhibere . Sub ipsum Xauerij diem (hoc est postridiè Kalend. Decembris) perfectè valebis , vt omnibus constet , te illius potissimum intercessione fuisse sanatum . Nec mora : Oliua in Collegium cum Ioanne reuersus designata Xauerij die perfectè conualuit : recuperata sanitate , & gratijs , vti par erat , Deo , & Xauerio actis , infirmorum curam gerere , & alia charitatis obire cæpit ministeria ; eò alacrius , ac diligentius quò propius morti fuerat : nempe salutem sibi redditam esse sciebat , vt aliorum saluti , commodisque seruiret .

Dominicum Garciam phtisi propemodum confectum , eadem prorsus , qua Oliuam , mendendi ratione sanauit . Huic etiam humanioribus iam exculto litteris , & disciplinis grauioribus studere cupienti seriò consuluit , vt studendi curam omitteret , & ad alia Societatis munia exercenda animum verteret . Paulò post , quod nemo putabat , omittis Theologiæ studijs alia religionis munia obire

obire Dominicus iussus est ; & in ijs reliquum vitæ tempus laudabiliter consumpsit.

Multi , & frequentes in familiaribus nostrorum colloquijs de Ioannis virtutibus sermones fiebant : alius aliam laudabat virtutem . Nec deerant qui altius iusto illius sanctitatem efferret, beatumque vocaret, & Apostolico plenum spiritu . Quidam verò qui sibi prudentior cæteris videbatur , longè ab ea fuit opinione : negavit utique dici posse perfectum , qui haud parvis erat , & animi , & corporis defectibus obnoxius . Non latuit res Ioannem in semoto admodum loco tunc orantem : ergò paucis pòst horis cùm in hunc ipsum incurrisset , extemplo ad illius se abiicit pedes ; nec finem fecit agendi grates , quòd in familiari cum Socijs colloquio iustam de suis erratis tulisset sententiam : *Vnus tu omnium* , inquit , *de me optimè iudicasti* . Ad hæc Socius erubuit , & viri sanctitatem miratus est , qui etiam absens , diuine illustratus lumine, longè dicta, factaque, Vatum more perfectè cognosceret.

Neque domi solùm , sed etiam in Vrbe Ioannis opera , & virtus enituit.

nituit. Franciscus Barretus de Faria ex tetro quodam vlcere decumbebat, quod interiorem dextri lateris partem occupauerat, & confluentibus eò humoribus noxijs mirum in modum intumuerat. Æger abiecta spe viuendi, & Ecclesiæ sacramentis ritè susceptis ad mortem se comparabat, & Ioannem accersiri fecerat, vt sibi animam agenti adesse vellet: qui tanto charitatis officio ne deesset, statim accurrit; fusisque ad Deum precibus, & B. Iosephi, Deiparæ Sponsi, ope implorata, latus dextrum, in quo latebat vlcus, Cruce signauit; & ecce tibi illo ipso, quo id egerat, momento, tumor, dolor, vlcus euanuerunt.

Elisabetha Marisia, Francisci Costæ de Barros, nobilis Lusitani coniux, ex graui morbo, ac diuturno in vltimum venerat vitæ discrimen: totos dies octo sine cibo potuq; transegerat: cæperat linq̃ui animo, & voce pariter sensibusque destitui: iamque extrema, tanquam depositæ parabantur: cùm Ioannes opportunus aduenit, Deumque pro salute Elisabethæ breuiter precatus, seriò pronuntiauit, *nequaquam ex eo morbo morituram:*

Nec

Nec vana prædictio fuit ; nec incassum fusæ ad Deum preces . De repente visa melius habere sæmina , & liberius iam meante spiritu , oculos aperire ; inde redeunte paulatim animo , circumstantes agnoscere , & sensuum usum cum voce pariter recuperare : nec multò post receptis a morbo viribus , domus gubernationi vacare cepit : quod ipsa salutis beneficium , secundum Deum , Ioannis precibus acceptum retulit .

Infantem nomine Antonium , feбри continua laborantem , imposita super caput manu , sanitati restituit .

Mancipium ex quodam vulnere in rixa suscepto stuporem paralyssi similem contraxerat : os ei distortum , & ita clausum vt nulla aperiri vi posset , nec ad inferendũ quidem cibum : post multorum dierum inedia in extremum adductus discrimen est . Hunc conclamatum inuisit Almeida ; manus ori adhibuit : de repente hiauit æger ; cibum admisit ; potum accepit ; ac deinceps suo loco os restitutum , & sanitas infirmo reddita : recreatus omninò conualuit : euentum admiratio consecuta .

Natum fuerat Antonio Coellio Oliuæ in sinistro latere ingens, & malignum vlcus, quod procedente die, instar saxi induruerat, summis patientis doloribus. Post varia, & excogitata, & applicata a Chirurgis remedia immedicabile apparuit: ventum ergò (quod in desperatis fieri solebat) ad Almeidam: is rem suscepit, & manuum tactu vlcus lustrulit, dolorem abstulit, periculum abegit.

Antonium Corream graui admodum morbo oppressum manu tetigit, & signauit Cruce; eoque ahibito remedio, morbo leuauit.

Ludouicum Perez periculosus, & molestus morbus lecto affixerat; eoque detentus redire non poterat in Sanctorum Coloniam, vbi charissimam sibi coniugem, filiosque reliquerat, vt ibi inter illorum amplexus, lacrymasque lætus obiret. Erat tum in portu nauis ad profectiorem parata; sed urgente maximè per eos dies vi morbi, æger mari se committere formidabat. Ioannes rei conscius, Ludouicū monuit, metū poneret, & nauem conscenderet ad Sanctos Colonia velificantem; eoq; venturū incomē certò denun.

denuntiauit. Dictis respondit euentus: ægrotus conscensa naui ad Sanctorum portum saluus applicuit: ibique inter amicorum lacrymas, filiorum amplexus; & quod caput est Ecclesiæ Sacramentis ritè susceptis, haud dubia æternæ salutis spe concepta, fato concessit.

Emanuel de Moura, Andreas Martines nostræ Societatis alumni, Franciscus Oliua, Franciscus Trancoso, externi; & complures alij cùm Brasili, tum Lusitani, qui morbis conflictabantur, Almeidæ precibus, conualuere protinùs.

Illud in paucis memorabile: Melchior Fonseca Nauarchus è Ianuario sinu aliò nauigare parabat. Cæterùm atris obductum nubibus cælum, tenebrisque inhorrescens mare impendentem in singula momenta tempestatem minitabantur, & Melchiorem cgebant plures, quàm vellet, dies eo in portu hærere. Ioannes, re cognita, Nauarchum hortatur, vt mari se fidenter committat, Deiparæ tamen auxilio priùs implorato. Paruit ille Ioanni: & continuó, votis Deiparæ nuncupatis, magno animo vela fecit, importuno quamquàm tempore, at ris-

atrisque nubibus incubantibus mari. Et multo magis Deo, ac Beatissima Virgine fauente, quàm ventis, ac tempestate obsecundantibus, in eum ipsum quem destinauerat portum, celeri nauigatione peruenit. Vixdum portum nauis attigerat; cùm nimbi densissimi (quasi tum venia data) ingenti fragore, impetuque, cælo effundi, micare fulgura, mugire tonitrua, furere venti, sæuire pelagus, & foeda exoriri tempestas cepit: quæ Ioannis quasi suspensa precibus tenebatur, donec Fonseca nauis tutam in stationem se recepit.

Habent animi, vti & corpora, ægritudines suas: atque longè gloriosius est, & prodigijs nobilius, reuocare illos ad sanum bonumque habitum, quàm humores corporum discordes natiuo concentui reddere, & membra perditâ instaurare. Multa in hac parte, eaque illustria Ioannes patrauit: ex ijs vnum deligam, quod omnium instar esse poterit. Versabatur in fluuio Ianuario iuuenis Lusitanus honesto loco natus, qui militiæ primùm nomen dederat, & adolescentiæ florem peccandi licentia corrumperat: conuerso postea ad mercaturam studio

studio, totus coaceruandis pecunijs, nulla habita iusti, & æquiritatione, inhiabat. Huic seculi negotijs implicito, & multorum vitiorum caligine immerso quidam diuinæ bonitatis tadius affulsit, mentemque iniecit redeundi ad meliorem frugem, & omnes antè actæ vitæ sordes apud Ioannem confessarium deponendi. Igitur per aliquot dies omnium peccatorum confessionem apud illum ritè peregit, tanto doloris sensu, vt vix posset inter confitendum à lacrymis, & gemitibus temperare. Et quia nihil se gratius Deo facturum putauit, quàm tanti viri vestigijs insistere, eumque cælestis viæ ducem, & spiritus magistrum habere, ex eo tempore totum se illius arbitrio fingendum, ac formandum commisit. Euenit paulò post vt castigandi corporis causà, ferreum cilicium ab Almeida peteret acutis totum confixum clavis, cuspidibus introrsum ad feriendam carnem conuersis, quò se aduersus hostem domesticum, Satanamque muniret; haud ignarus quantis ille viribus, dolisque contendat à sectanda virtutis via tyrones Christi auertere. Cæterum vix corpus cilicio cinxerat, cum carnis

sti-

stimulis ita exagitari sese sensit, ut nullo posset loco tutus consistere. Inops consilij ad Ioannem confugit; rem exponit: auxilium implorat. Is cognitis diaboli fraudibus, quibus nondum bene firmatam tyronis virtutem conuellere nitebatur, eisdem vtendum artibus ad salutem censuit, quibus ille ad perniciem abutebatur: ergò restitutum sibi a tyrone cilicium suo appressit corpori, & continuò iuueni reddidit, iussitque ut illo iterum se fidenter muniret: sperabat enim fore ut in posterum superatis hostibus victor euaderet, & nullis Satanæ fraudibus esset obnoxius: uti re ipsa euenit; nam in reliquum vitæ tempus (quod iure mireris) omni prorsus libidinis sensu caruit.

Contigit etiam ut eiusdem iuuenis è filice ignitabulo scintillas extundentis oculum dissiliens indè particula grauitè læserit, non sine acerbo sensu doloris. Ioannes, ne minùs esset in curandis animi, quàm corporis morbis præstans, signo Crucis super oculum effermato, filicis particulam excussit, & dolorem repentè sedauit: quædam tamen rubri coloris nota, præ-

præteriti mali index, remansit in oculo, vt iuuenis acceptum à Deo, Ioannis interuentu, beneficium præ oculis semper haberet. Eundem præterea graui auditùs dolore vexatum, verbo, *Ephpheta*, Seruatoris nostri more, pronuntiato, & signo Crucis auribus impresso confestim leuauit: eaque ratione, & Medici, & Magistri parte s in discipuli laborantis utilitatē gef-
fit.

Hæc dum Ioannes agit Fluuio Ianuario: nec minùs prodigiorum multitudinem, quàm sanctæ vitæ exemplis, & frequentibus de Deo sermonibus, omnes ad pietatem accendit: ardens inuidia Satanas, secundum rerum cursum suis, vt solet, artibus interrumpere, & Almeidam de medio tollere cogitauit: ita se res habuit. Vocatus ad confessionem cuiusdam Brasili qui morti erat proximus, nulla interposita mora, itineri se commisit, paucis comitatus indigenis: dumque laxandi animi causâ, multa cum Socijs per viam de rebus cælestibus miscet colloquia, proiectum summa vi ab alto saxum prætereuntis caput grauiter vulnerauit, & mortuo similem in terram deiecit: tum verò Socij soli-
F liciti

liciti, anxijque hinc, indè circumspicere (solitarius enim locus erat) & tanti sceleris authorem diligentissimè perquirere cunctis, circumquaque perspectis, nullus tanti flagitij author inuentus: omnibus persuasum, proiectū à dæmone fuisse saxum, qui iam pridem Almeida maximè infestus nullum non mouebat lapidem, vt eum occideret. Verùm Dei seruus sibi iam redditus, ne, dum medendò vulneri eo ipso in loco moratur, infirmus sine confessione decederet, statim circumuoluto temerè capiti sudariolo, totus sanguine perfusus, ceptum iter strenuè persecutus, ad Brasi-
li decumbentis tugurium medias inter siluas erectum, tandem peruenit: vbi, confitenti aures dedit, eumque Sacramentis Ecclesiæ, & idoneis ad bene moriendum consilijs preparauit; nec indè abscessit, donec ille animam Deo redderet. Alienà salute procuratà, ad Collegium reuersus, Chirurgis sui curam habere permisit: paucis post diebus, diuina magis, quàm humanà operantè virtute, perinde ac si nullum accepisset vulnus, ita integer fuit, ac vegetus. Porro nonnulli Sociorum religione tacti, effu-
sum

sum in via è vulnere cruorem sudario-
lis, & linteolis exceperunt, & domos
secum retulerunt; cuius postea virtus
multis graui morbo laborantibus sa-
luti fuit.

CAPVT QVARTVM.

*Referuntur illustres aliquot Ioannis
prædictiones.*

NEque verò Brasiliæ, & Ameri-
cæ finibus Almeida virtus, &
fama se tenuit, sed Oceanum trans-
gressa peruasit in Africam, & Euro-
pam: ac, ne rerum quæ nobis descri-
bendæ supersunt, magnitudini dicen-
di breuitate detrahamus, operæpre-
tium erit, eas fusius enarrare. Mille-
simus sexcentessimus quadagesimus
primus agebatur annus, cùm Hollan-
di instructa in Angolam classe delati.
(Regnum id est in ora extima Æthio-
piæ Occidentalis Lusitanorum impe-
rio subiectum) Loandam Urbem
illius primariam nullo ferè negotio
ceperunt, & imposito militum præsi-
dio firmarunt. Magnam res Lusitana
iacturam ea amissa Vrbe; Christiana

non minorem fecit ; nec tam citò poterat reparari ; tum quòd maior omnium opinione erat ; tum quia Lusitanis Hispanico per id tempus bello distentis minimè vacabat in Angolanum vires , curasque conuere. Excunte demùm anno M. DC. LVII. comparata magno impendio Vlissijppone classis in Angolam soluit , Præfeto saluatore Correa de Sà Benavidio , magni nominis Dynasta , & rei bellicæ peritissimo ; qui celeritate vtendum ratus , ineunte anno M. DC. LVIII. ad Sinum Ianuarium in Brasilia appulit , vt ibi quid optimum factu esset , exploraret . Excensione in terram factà , nihil illi fuit antiquius , quàm Ioannem , de quo multa , eaque præclara audierat , conuenire , eumquè de belli Angolani exitu consulere . Is , transactis aliquot diebus , re priùs Deo commendatà , Præfektum adiit , monuitque , vt duodecima insequentis Maij die in Angolam vela faceret , & Loandam Urbem primùm inuaderet : in ipso ardore certaminis , Assumptæ , in cælum Virginis , & D. Michaelis cœlestis militiæ principis nomen , opeinque imploraret ne desisteret :
hac

hac enim ratione fore vt insignem
de hostibus obtineret victoriã, &
antiquum Lusitanis decus, marisque
imperium cum libero commercio
redderet. Id Ioannes diuino spiritu
afflatus, vt verum postea euentus
docuit, oraculum fudit; quo Præ-
fectum reliquit rei benè gerendæ
spe, ac fiducia plenum. Ergò is,
vniuersis fausta precantibus, desi-
gnatà sibi maij die, in Angolam
soluit. Iamque multum nauigando
processerat, cum ad portum nomi-
ne *Quicombum* multis a Loanda Vrbe
milliarijs diffitum, saluus appulit;
ibique exposito in terram milite,
diutius, quàm par erat, subitici ma-
gnæ molis arcu condendæ intentus,
quæ portus faucibus immineret, &
hostium classibus eò redentibus adi-
tum præcluderet. Cæterum res eue-
rit memoratu digna, quæ Benaui-
dij consilium conatumque disiecit;
& statione relicta, aliò classem
nauigare coegit. Locatis namque
ad *Quicombum* castris, & recrea-
to paululum milite, coorta re-
pentè tempestas in Lusitanam clas-
sem intrà commodissimi portus
sinum in anchoris stantem tanta vi in-

cubuit, vt Architalassi rostratam ad scopulos allisam fregerit, ducentis quinquaginta espibatis, qui illa vehabantur, fluctibus haustis, socijs inspestantibus, neque auxilium ferre valentibus: aliorum verò nauium vela, contracta licet, dirupit, disiecit armamenta, & in ultimum discrimen adduxit. Furebat vnum intra portum tempestas, & illius finibus se tenebat, reliquo extrà portum, quàm latè patebar, mari pacato, nulloque agitante vento summa torpente malacia. Attoniti rei nouitate vectores hærebant, incerti quid consilij caperent, vel qua ratione à periculo imminentis naufragij se explicarent intrà portus angustias conclusi. Receptis demùm ab ingenti pauore animis, immissam diuinitùs in classem credidere procellam, & rostratam fluctibus haustam, vt neglecti consilij, quod illis dederat Ioannes pœnas luerent; quippè qui Loandam rectà contendere, non Quicombum diuertere præceperat. Ad vota igitur precesque conuersi diuinum placare Numen, sibique propitium reddere curant. Exauditas supplicum preces ipse rerum exitus decla-

declarauit: tumidum namque paulò post mare deferbuit, remisit vêtus, dissipatisque nubibus serenitas cum luce redijt: & classis Præfectus instauratis intrà paucos dies nauibus, solutis anchoris in Loandam vela dedit: in cuius portum secundo nauigationis cursu inuectus quintadecima Augusti die Assumptæ in Cælum Virginis Sacra, primo statim impetu Urbem cepit, vt ipsius Virginis auspicijs bellum geri, administrarique constaret. Auditis ob expugnatam Loandam militum animis, viribusque in vnum collectis, ipsam Urbis arcem, quæ totius belli summa erat, oppugnare decreuit. Illam menibus, & aggeribus vndique Hollandi cinxerant, & extructis pro locorum opportunitate propugnaculis, maioribusque tormentis ad arcendum hostem impositis, egregiè munierant. Veruntamen expugnato à Lusitanis propugnaculo Sancti Pauli, quod omnium firmissimum credebatur; de dedenda confestim arce præfidiarij agitarunt, quam paulo post iustis pro tempore conditionibus Lusitanus recepit ipsamet vicesimaquinta Augusti die, qua septem antè annis ab Hollandis occupata fuerat.

Dum hæc in Angola geruntur
sparsus incerto authore rumor per
Coloniam Ianuariam latè vulgavit,
Lusitanos insigni accepta clade a
Loandæ obsidione repullos; classis
etiam Præfectum rei malè gestæ do-
lore subitò extinctum esse: Hollan-
dos præterea illustri de Lusitanis
parta victoriâ, & opulenta præda
potitos de occupanda Brasilia iam
consilia gitare. Hic temerè diffi-
patus rumor Urbis Ianuariæ ciues
mirè sollicitos, anxiosque tenebat.
Nec deerant qui susceptæ contra
Hollandos expeditionis authores,
(nec Almeida parcebant famę) ma-
ledictis incesserent; & per vicinos
Urbi pagos indignas fide turbas
mouerent. Ille vulgati rumoris con-
sciis, ne latius is per Brasiliam ser-
pendo peruaderet, & tumultu cun-
cta compleret, consternatos me-
tu ciues, & mærore torpentes ad
fiduciam excitat, & bene spera-
re iubet, palam denuntians, com-
paratam iam a nostris de hostibus
victoriâ; & Loandam Urbem,
quæ totius erat expeditionis sco-
pus, nullo ferè negotio recupera-
tam: Benavidium item classis Præ-
fe-

fectum saluum & incolumem esse :
 Classẽ denique Lusitanam bellica
 tumentem gloria , & spolijs Hol-
 landorum onustam Sinum Ianua-
 rium redituram : ipso die , quo Vn-
 decim millium Virginum celebri-
 tas ab Ecclesia agitur , affuturum
 partæ victoriæ nuntium . Hæc
 Ioannes non semel affirmavit co-
 ram multis simul adstantibus Lusi-
 tanis ; singula vti gesta erant in
 Angola , recensens , non secus ac
 si præsens esset : eoq; plus admira-
 tionis res habuit , quòd Loanda
 duò ferè millia milliarium à Sinu
 Ianuario abest . Habita prædictio-
 ni fides est : eximia quippè viri
 sanctitas , & quedam diuini spiri-
 tus indicia , quæ in ipsa facie emi-
 cabant , nullum relinquebant ambi-
 gendi locum . Breui interiecto tem-
 pore , ea ipsa quam Ioannes de-
 signauerat , die , certus de Loan-
 dica victoria nuntius Sinum Ianua-
 rium intrauit , qui Urbem ipsam ,
 & Brasiliam vniuersam increbili
 gaudio affecit , & conceptam iam-
 pridem de Ioannis sanctitate opinio-
 nem confirmavit .

Latum huiusce classis euentum infelix classis alterius casus excipiat, vt liquidò constet nullam rebus humanis solidam inesse felicitatem; sed alternantem fortunam vices tristia, solitam lætis, secundis aduersa miscere. Anno M. DC. L. mense Iulio Lusitana classis (flotam vulgò appellant) pretiosis onusta mercibus è Fluuio Ianuario Lusitaniam repetebat: viginti numerabat onerarias, rostratas maiores tres, quæ cæteris præsidio erant: Præfectis Antonio Temudo, & Antonio Abreu de Freitas. Antequam solueret è portu monuit Almeida, Temudium, ne recta, Vlyssiponem nauigatione, contenderet, sed ad Bahiam primùm, dictumue à *Morro* portum in ipsa Brasilia, prorsus diuerteret, vt ibi quid optimum factu esset, exploraret: si suis non obtemperet monitis, malè se metuere, inquit, ne graue aliquod infortunium Lusitana flota patiatur. Temudius tamen obiectæ formidini minimè cedens, Vlyssiponem versùs altum per Oceanum ferebatur: vbi vera illum subiit, sed nimis tarda, penitentia facti. Ea namque tempestate Robertus, & Mauritius, germani fratres

tres, Caroli I. Angliæ Regis nepotes, Anglici Parlamenti hostes acerrimi, classis cui præerant, reficiendæ causa, in Vlyssipponis portum se receperant, & à Rege Lusitaniæ honorificè excepti fuerant. Grauem propterea dolorem cepit Parlamentariorum Senatus, penes quem rerum tum in Anglia summa potestas erat, facinus indignum ratus Anglici Parlamenti hostes, specioso magis, quàm sano consilio à Lusitanis hospitio excipi, & portus sinu foueri. Dolore igitur iracundiam acuate, Blakum magni tum nominis ducem, cum triginta bellicarum nauium classe in Lusitaniam misit, vt antè ipsas Vlyssipponensis portus fauces parato ad pugnam agmine consisteret, ibique hæreret, & mare commeatibus infestum redderet; eaque ratione dignas à Lusitanis ob illatam, vt ipse existimabat, Anglis iniuriam, pœnas repeteret. Blakus, data prima nauigandi facultate in Lusitaniam classe delatus, Vlyssipponensis portus fauces obsedit, & commercium ea cum vrbe maritimum impediuit.

Harum sanè rerum quæ in Europa, gerebantur, Temudius in America


prorsus ignarus, totus ad nauigandum intentus, Vlyssipponem classe petebat. Ergo iam vicinus portui in Anglorum naues incurrit omni bellico apparatu instructas. Pugna extemplò committitur. Onerariæ potissimum Lusitanæ ab Anglis præde inhiantibus oppugnantur acerrimè: rostratæ laborantibus opem ferre, tormenta displodere, & quocumque se verterent, (vt erant apprimè tormentis, ac bellatoribus communitæ) magnam stragem hominum, nauiumque hostilium edere: nec suo deesse officio Lusitani Duces, etsi nauium numero, roboreque hostibus longè impares erant. In medio ardore certaminis, peropportunè accedente maris æstu lenis à puppi spirans aura onerarias undecim, quæ magis agiles erant, in portum Vlyssipponis impulit. Septem, mercium grauantæ & morante pondere, in hostium potestatem venerunt: tres, dum fugiunt Anglos, ab Zelandis prædonibus interceptæ: è rostratis duæ passis ad liberio rem captandam auram velorum sinibus, fugiendo, pugnandoque simul, periculum, Dei beneficio, euaserunt: tertia, qua uehe-

ba.

batur Freitas, sua mole grauis, disruptis inter pugnandum velis, lacerisque armamentis, immobilis, & vniherens loco, totum prælij pondus integrum ferè diem sustinuit; nec id alia ratione confici potuit, quàm inieceto vndique in ipsam igne, quo vsque ad aquæ libellam conflagrauit. Rostrata incensa, pauci e vectoribus, qui pugnae superfuerant, in Anglorum naues recepti, & ipsorum hostium benignitate seruati. In hunc ferrè modum dissipata Brasi-liæ flota Temudius audaciæ pœnas luit, & Ioannes prædictionis apud omnes laudem meruit: quippè qui diuino afflatus numine cognouerat antequam flota e Sinu Ianuario solueret, eò appulisse exploratoriam e Lusitania nauem, quæ nuntiabat, classem illam Parlamentariam Vlyssipponis portum insedisse, & aditum omnem maritimum & commeatum sustulisse. Proinde contineret se cum flota Temudius, dum alius nuntius idoneus aduenisset; vel tandiù moraretur, donec appetente iam hyeme, oceanus Lusitanicus fœdis tempestatibus

eo maximè tempore obnoxius Blakū
cogeret in hyberna secedere, & Vly-
ssipponis portum commercio apertū,
liberumque relinquere.

Non hic vaticinandi finis fuit.
Antonio Vasæo Soc. I. alumno, qui
cum alijs quatuor Socijs ad nauigan-
dum se comparabat, non semel præ-
dixit Ioannes, illum graue admodum
vitæ periculum eò in itinere aditu-
rum; vti re ipsa euenit. Tres ferè
menses à flotæ discessu iam decurre-
rant, cū Ioannes in familiari cū
Socijs colloquio seriò affirmavit. *Te-
mudū flotam aduersam admodum fortu-
nam expertam esse*: cū tamen nullus
per eos dies internuntius ex Lusitania
in Brasiliam peruenisset. Ex quo li-
quidò apparuit Deum illi quid in ma-
ri Lusitanico tum ageretur in Ameri-
ca ostendisse: idque Prophetarum
more, absens proauntiauit.



CAPVT QVINTVM.

*Futura iterum , & absentia præuidet :
hominum cogitationes introspicit .*

QUæ superiori capite narrauimus vaticinia , cæteris illustriora videntur ; plura tamen non minùs scitu digna supersunt , quæ publicæ utilitati subducere sine iniuria non possumus . Nauarchus Lusitanus è sinu Ianuario in Sanctos Coloniam vela fecerat ; sed quia fama vulgabat omnia illa maria à Batauis prædoris infestari , quidam Societatis Presbyter nauarchi patruus curis anxius erat ; timebat enim ne in pyratikas naues nepos incideret . Ergo de nauigationis exitu Ioannem consuluit : qui re priùs Deo commendata , ita respondit : Tuus , inquit , mi Pater , nepos in medio nauigationis cursu in Batauos pyratas incidit ; & quia oneraria , qua rehebatur , nec ferrei nec mentis ad pugnandum satis erat instructa ; nec ad fugiendum , merorùm tardante pondere , satis apta , capto ad animi magnitudine consilio ad obuias syrtes nauem impegit , ne in hostium veniret manus : naue lacera , cum sese

sese in mare eiecisset , inter natandum , multum , diuque fluctibus eluctatus , iisque sæpè inuolutus , celesti demum auxilio expeditus , in proximum litus euasit , toto licet corpore male mulctatus . Hæc Almeida , uti mari euenerant , non secus ac si præsens adesset , affirmavit . Bimestri iam elapso , huius infortunij nuntius Sinum Ianuarium intrauit , qui rem omnem ex ordine retulit , uti ille multo ante prædixerat .

Emanuel Paciecus de Mello , nobilis Lusitanus , ereptam sibi a Salvatore Correa de Sã Benavidio , classis Angolanæ Præfecto , Architalassii dignitatem ferebat ægerrimè : eam ob rem doloris impatiens in sinu Ianuario manere decreuerat , nec Angolam petere cum Præfecto . Dum secum tacitus hæc mente voluit , graui tentatus est morbo , quem conceptus ob illatam sibi iniuriam dolor vehementius aggrauabat . Cæterum quia vir erat pius ac prudens ut animæ salutem in tempore consuleret , in societatis collegium se recepit , ut si moriendum esset , inter sociorum manus , & preces animam Creatori redderet . Si verò conualesceret ,

Lusitaniam quàmprimum p̄r valetudinem liceret, se repetiturum, promisit: quam cogitationem nulli mortalium aperuit: hanc Ioannes diuino illustratus lumine introspect. Itaque cum iam mors esset in limine, & Emanuel a medicis pro desperato habitus, palam denuntiavit, fore vt ægrotus breui meliùs haberet in gratiam cum Præfecto rediret, neque Lusitaniam, vti destinarat animo; sed Angolam in eadem prorsùs cum Præfecto naui tenderet. Obstupuit Emanuel cum sua vidit consilia alto tecta silentio in lucem prodi. Ioannemque diuinitùs (neque enim humanitus poterat) suas cogitatione agnoscere. Et fuit prædictioni fides; nec defuit euentus. Paucis post diebus æger conualuit; in gratiam cum Præfecto redijt; eadem cum illonau in Angolam soluit, vbi suscepto contra Hollandos bello strenuam reipublicæ nauauit operam. Antonius Azeredus Coutinius nauigationem adornabat in Coloniam Spiritus Sancti, cau-

causâ indagandi smaragdi fodinas, quibus illa regio abundare ferebatur. Sed quia Capitis Frigidi Promontorium, quod necessariò superandum erat, ab Hollandis hostibus obsidebatur, nauigationem aggredi formidabat. Almeida hominem curis anxium letus affatur, iuberque timorem ponere, & celso animo mari se committere, die sabbati Deiparæ sacra: sperabat enim fore ut exorta repente caligo, intendentibus se mari tenebris, conderet lucem, quæ Lusitanæ navis conspectum hostibus eriperet; vitatoque hac ratione periculo, Promontorium feliciter præteruectâ ad destinatum portum breui apelleret. Ea vaticinatione Antonius in spem felicitis euentus erectus, solutis prius Dei matri votis, sequenti sabbato vela dedit. Iamque multum secundis ventis nauigando processerat, cum propè Caput frigidum in hostiû nauium conspectum venit; cæterum Ioannis vaticiniij memor, ad vota, precesque conuersus Deiparæ exposcit opem, ut imminens vitet periculum. Nec incassum fusæ ad illam preces: nam densa confestim nebula mari offusa, incumbensque Hollandis

Antoniane nauis conspectum prorsus ademit, eosque haud secus, quam in cæcis tenebris, errare coegit, & ab illa insequenda omninò desistere: quæ B. Mariæ Virginis patrocínio magis, quam nebula maris tecta, pyratis bellè delusis, & promontorio facillimè superato, Spiritus Sancti portum tenuit incolumis.

Puellæ recens mortuæ parabatur in templo nostro sepultura. Fodiente humiliter, & angustè humum fossore, quantum satis esse duceret ad inferendum corpusculum; præterijt casu Ioannes, & inspecto curiosius loco, fossori edixit vt altiùs, & latiùs foderet: fore quippè vt breui plura in eo cadauera conderentur. Paruit reuerentia viri. Dicto euentus fidem fecit: intra paucos dies continuatis subinde funeribus eiusdem sorores tres sublatae, ac elatae, in eam illatae sunt sepulturam.

Vidua quædam pauper & nobilis nubilem habebat filiam forma præstantem, sed destitutam dote: huic promisit Almeida fore, vt ipsamet die idoneum puellâ sponsum inueniret: ecce tibi paucis post horis iuuenis honesto loco natus viduæ domum ingre-

greditur animo a nuptijs penitus alieno ; dumque ibi paulùm moratur cuiusdam negotij causà , sensit se occulto quodam spiritus instinctu ad contrahendas cum puella nuptias impelli ; nec multo post summo fuerunt vtriusque partis consensu celebratæ .

Lusitanus , cuius nomen memoriâ excidit , in mediterranea expeditionem parabat Christiano indignam nomine , vt indigenas seu vicaptos , seu blanditij deceptos , in seruitutem abduceret : multos in id socios adiutoresque coegerat , quorum animos capiendæ prædæ cupiditas occupauerat : duos item Brasilos iuuenes , qui Sociorum curæ suberant , vt itineris duces essent , proposita ingenti summa pecuniæ , conduxerat . Ioannes rem odoratus , homines a suscepto consilio omni ope conatus auertere : imminentis periculi magnitudinem proponit ; monitis , precibus , minis instat : sed posteaquàm operam se perdere sensit , Lusitanis diuini Numinis iram , multasque & graues denuntiat clades : Brasilis verò itineris ducibus inter sylvas miserè perituros prædicit ; sepulturæ etiam honore

nore, & christianis exequijs carituros. Vaticinatio verior fuit, quàm lætior. Itum vti decreuerant. Vix Brasili iniusto se bello peti senserunt, cum sublato ingenti clamore impetum in hostes fecerunt, eosque, iniecto etiam, vti apparebat, diuinitis pauore, facile fuderunt fugaruntque. Alia aliam, vt ferme contingit, calamitas subsecuta. Lusitanorum dux collectis ex accepta clade sociorum reliquijs, iisque ad aperiendam sibi ferro viam opportuna oratione erectis, per inuios saltus, altissimosque errabat montes, vbi cum fame & siti magis, quàm cum hostibus certandum fuit. Ad hæc atrox morbi genus ægritudine animorum, rerumque omnium inopia sensim roboratum, cepit per vniuersos serpere, vagarique; & quosdam absumere, inter quos obiere etiam duo illi Brasili iuuenes, qui, neglecto Almeidae consilio, itineris duces Lusitano fuerunt. Pauci, magnis defuncti periculis, ad sinum Ianuarium redierunt. Ita per omnes ferè illius expeditionis authores per vagata cælestis ira breui tempore pænas a singulis improbæ cupiditatis exegit.

Infelicem huiuscè expeditionis euentum Ioannes a Deo edoctus agnouit, quingenta circiter milliaria absens : monuitque statim vxores defunctorum, vt illorum animas per sacrificia, precesque iuari curarent.

Non semel euenit vt qui Ioannem ex facie nondum nouerant, de illius nomine & patria a socio, submissa admodum voce, quærerent? quibus Iohannes longo quamquam interuallo disiunctus, diuinitus interrogationis conscius, contenta protinus voce responderebat : *Mihi nomen est Ioannes de Almeida. Londini in Anglia natales habui.*

Vincentius Rodericius, optimæ indolis adolescens, confectis iam humanitatis studijs, Societati se addicere cupiebat : quinquennium, ferè abierat, & sepe repulsam passus, voti cōpos fieri minimè potuerat: animo igitur in desperationem verso, Societatis homines, & scholas valere iussit; & leniendi causâ doloris, quem ceperat repulsa, in rusticanam villam secedere decreuit : instabat iam profectionis hora, cū Ioannes a Deo monitus, misso præpr operè nuntio, Vincentium ad colloquium latus accer-

cerfit: venientem peramanter excipit; & ne studiorum cursum intersum interrumpat, enixè rogat: recipitque, illum intrà paucos dies Societati daturum nomen: nec fides dicto abfuit: vix pauci effluxerant dies, cum in Societatem fuit admissus.

Vertète anno M.DC.XXXIX. res euenit memoratu digna, quam summa fide & sinceritate referam. Diuerterat Almeida in oppidum *Bonicucangam* nomine amæno propter mare loco situm, non tam laxandi animi causà, quàm rerum cælestium meditationi vacandi. Ibi intempestæ semel noctis silentio, sereno cœlo, & stellis internitentibus latè cōspicuo, inambulabat in littore vno comitatus Lusitano, cui nomen Emanuel Pirez Esquacia, viro pio & honesto; multosque cum illo de rebus diuinis habebat sermones: dumque solito attentius contemplatur stellas, drepente socium compellat, iubetque intento in cœlum digito, stellam cæteris clariorem fixo oculorum obtutu intueri (quæ semeltri ferè spatio suum in Brasilia solet cursum conficere) Tum, *Emanuel*, inquit, *antequam illa desinet apparere stella, Lusitania*

Regem habebit Lusitanum. Visa tum fidem excedere vaticinatio; quam tamen Almeida in collegium reuersus semel ac iterum ratam habuit. Mirari quì audierant, quærereque inter se: qui tandem id fieri posset, cùm Philippus Hispaniæ Rex Lusitaniæ tum imperitaret; nec vllus suspicari posset quemquam a Lusitanis creatum iri Regem. Notatur nilominus res tempusque ab ijs qui aderant: & ecce tibi semestri vix elapso nuntius ab Vlyssipone missus Sinum Ianuarium intrauit, qui Ioannem Brigantiæ Ducem Regem à Lusitanis creatum affirmavit Kalendis Decembribus Anni a Christo nato M.DC. XXXX.

Bahiæ in Brasilia portum valida nauium classe Hollandi obsederant Anno M. DC. LVII. & intercepto illius Urbis commercio rem Lusitanam in vltimum discrimen adduxerant. Præerat tum suprema cum potestate Brasiliæ Antonius Tellez de Silua clarissimæ familiæ Dynasta: is qui multis ante annis P. Marcellum Masfrillium, fortissimum Societatis nostræ in Iaponia fidei Atletam, sua in Orientis Indiam vexit naui. Ianuarij Rector collegij è re publica & Christia-

na fore iudicauit, onerariam vario
commeatu instructam Bahiensibus rei
frumentariaræ inopia laborantibus
submittere, cui præficiendum cura-
uit quemdam Societatis laicum, vi-
rum industrium, & rei nauticæ be-
nè peritum. Cæterum quia res erat
plena periculi, is antequam nauem
conscenderet, Almeida precibus, &
sanctis sacrificijs se valdè commenda-
uit: qui consulto prius Deo, oracu-
lum edidit, quod scripto mandari vo-
luit: *quandoquidem, ait, Superiorum*
mandato, mari te committere non formi-
das, certò scias per mediam Hollandorum
classem Bahiam venturum incolumem.
Dictis respondit euentus: oneraria,
duce & gubernatore laico, vndecima
die Maij e Ianuario Sinu profecta, se-
ptima Iunij sub ipsum hostium con-
spectum, clarissima luce ad Bahiæ
portum appulit salua.

Iusserat Brasiliæ prouincialis, vt
Ioannes Oliua de quo supra memini-
mus, in Bahiæ collegium se transferret:
ægrè ferebant Socij Ianuarienses Oliuæ
discesum. Ioannes rei conscius, socios
solatur, prænuntiatque. *Bahiam quidem*
breui iturum Oliuam, sed rediturum om-
nium opinione celerius. Idque propria

scriptum manu, quò maior haberetur dictis fides, descendentem fratri tradidit. Nec prædictio sefellit. Vix Oliua peruénit Bahiam, cum repetijt Fluuium Ianuarium, nostrosque ingenti gaudio affecit & Almeidae Sanctitatem commendauit.

Id longè illustrius in medio nauigationis cursu eidem contigit Oliuæ. Atrox coorta tempestas nauem quæ uehebatur cæcis in fluctibus pene transuersam egit; ac tumque de illa putabant omnes: in his rerum angustis Oliua, diuino quodam instinctu motus, chartam Ioannis manu scriptam, quam apud se habebat complicatam, ad ventos explicuit: atque eodem prorsus momento tempestas insigni sanè prodigio conquieuit: insperatam maris tranquillitatem vectorum admiratio consecuta.

Die vicesima secunda Iulij (is Sanctæ Mariæ Magdalænæ sacer est) Anni 1653. cælestis mentis impulsu præsensit certa se eius anni die moriturum; idque prædixit familiaribus: addito, à Deo item accepisse se vnum ex electorum numero esse. Ex quo ille tantum gaudium cepit, vt cum se continere non posset, Rectorem col.
legij,

legij, & fratres adiret, & ijs causam exponeret, rogans, vellent Deo secum pro illo ac par erat, gratias agere.

Sub idem ferè tempus vnus Sociorum de sua æterna salute curis anxius vix poterat vllam capere quietis partem; idque nulli mortalium detexerat. Commodum illi fit obuiam Ioannes, eumque iubet bono ac læto animo esse, & certam de sua salute spem concipere: quibus ille dictis quietior factus & hilarior, reliquum vitæ tempu vixit in summa animi tranquillitate.

CAPVT SEXTVM.

Ioannis obitus & funus.

COnfecto octogesimo secundo annorum curriculo viuendi metam Ioannes attingebat. Vltimam sibi vitæ diem esse optauerat, quam Seruator humani generis primam in terris habere voluit Bethleemi natus, idque multis a Deo precibus flagitauerat. Creuit tamen cursu temporis citius moriendi desiderium, & grauem corporis sarcinam relinquendi.

vt eo iam leuatus onere, expeditior ad cælum animus euolaret. Duodecima igitur Septembris die voti se compotem factum sensit; noxiò quipè afflatus est aere, totiusque corporis membris penè captus: vna superfuit libera ad agendum dextera: prouidente quidem Deo, ne ita contraheretur, vt signum crucis effingere non posset, & cælum intento digito monstrare non desineret, in quo ipse animo perpetuò habitabat. Atque vt in cæteris, cum grauius vrgentur morbis tum maximè vitiosa, se prodit natura; ita in Ioanne tum præcipuè solida atque excellens pietas enituit, nam lecto affixus, & acerbis doloribus cruciatus, inuictæ patientiæ documenta præbuit; morbumque, seu virtutum omnium palestram reddidit; quæ cum per omnem luxissent ætatem, postremis, quibus ægrotauit diebus, vt in deficiente lumine euenire solet, clarissimè micuerant.

Toto, quo decubuit tempore, miram in ore hilaritatem prætulit; ita ut in exilio adhuc positus, cælestis patriæ gaudia iam præcipere videretur; & lecto adstantes incun-


do illius adspectu exhilarari vix poterant suauissimis lacrymis temperare. Ingrauescente in dies morbo, Ecclesiæ sacramenta ritè suscepit, hisque munitus præfidijs ad supremum cum morte certamen animum confirmavit. Semel tantum, de medicorum sententia, incisa vena sanguinem misit; quem statim viri pij religione tacti linteolis exceperunt, futurum multis graui morbo laborantibus præsens remedium, vti suo loco videbimus. Imminente iam morte Sociorum corona cinctus, qui per vices succedentes animam agentem precibus iuuabant, & dulcissime IESU MARIE nomina repetebant, Christi è Cruce pendentis effigiem amplexus, placidissimè expirauit die XXIII. Septembris; Anno humanæ salutis M. DC. LIII. Vixit annos duos supra octoginta, quorum duo supra sexaginta in Societate exegit, vno semper & æquali innocentis vitæ tenore. De mortui vultus adeo hilaris, lætusque mansit, vt species ipsa corporis animi Deo iā fruuentis beatitudinē indicaret: & omnes lecto assidentes celesti quadā dulcedine, gaudioque perfunderet.

Vulgata per Urbem Ioannis morte ingens omnium ordinum concursus ad Societatis collegium fieri cepit; venerandi cadaueris causâ: hic omnes lacrymas fundere, vel ex amissi patris dolore, vel ex pietate, qua religio animos imbuebat: & vota nuncupare, seu certa fide crederent illum inter cœlites iam versari. Continuo parari funus, solemnis instrui pompa, & innumeri è sacris familijs viri, princepsque Urbis templo ad collegium confluere, vt iusta defuncto persoluerent. Interfuit exequijs Antonio Marifius Laurerius, qui *Administrationis* nomine in Sinu Ianuario Australibus Brasiliæ Ecclesijs præerat, & Ludouicus Almeida antiquæ prosapiæ Dynasta, Colonia eiusdem Præfectus, cum vniuersæ nobilitatis flore. Iusti solemnî ritu persolutis, mansit in feretro corpus expositum integrum ferè diem, vt illius contemplandi copia per otium cuicumque fieret. Tum verò vniuersa ciuitas ad id visendum accurrere; atque hi manus, hi pedes certatim exosculari: hi precarijs globulis corpus contingere, mox oculis admouere: multi flores spargere: omnes in loco hære, nec inde auelli. Et quidem

Præ-

Præfecti Almeidae Satellites ad sub-
mouendam turbam de industria vo-
cati, vix poterant ad feretrum populi
impetum cohibere. Ægrè tandem
turbâ submotâ, adulta iam nocte, ab
sinistrum Aræ maximæ latus sepul-
chro raptim est illatum cadauer, in
arca lignea ad speciem monumenti
composita inclusum: nulla prorsus
addita inscriptione, quæ tanti viri ge-
sta, & virtutes lectoribus indicaret.
Hoc scilicet gentis nostræ Lusitanæ
genuinum vitium est (quæ fuit alio-
rum iusta de illa iam ante me queri-
monia) quàm est ad agendum prom-
pta, tam esse ad scribendum tardam:
ac si nihil intersit posterorum nosse,
quid ipsorum maiores præclarè gesse-
rint, vt eorum viuendi ratione, ceu
speculum intuentes, vitam quoque
ipsi laudabiliter instituant suam. Ioan-
nis effigiem vulgaris quidam pictor
vt potuit, penicillo adumbravit, fu-
turam nostris memoriæ causam, & in-
citamentum virtutis: magni quippè
interest clara domi exempla, tanquam
faces habere, quarum splendore ad
pietatem accendaris. Fuit Ioannes
indole mitissima, moribus suauissi-
mis, quibus omnium amorem sibi

conciliabat : statura corporis iusta, facie liberali, lata fronte, colore candido, rubore interfuso, oculis cæruleis, capillo subflauo ; sed matura iam ætate canitie venerabilis. Nocte funus consequenti, dum Socij diurnis fessi laboribus necessariam corporibus quietem caperent, ingens ciuium Ianuariensium turba, nimio pietatis incensa studio, intempestæ noctis usa silentio, & illius tenebris tecta, sensim ingressa templum, aperto sarcophago, sacerdotalem habitum, quo ritè indutum fuerat, dum terræ mandaretur corpus, crepidasque detraxit pedibus, capillos etiam ex capite, & pilos ex mento nouaculis abrasit : qui pio ablati furto, domumque relati, ad depellendos postea è corporibus morbos dæmonesque fugandos, potissimum ualuerunt.






LIBER TERTIVS

CAPVT PRIMVM.

De Cbaritate in Deum & proximos.



QVONIAM imitandi Ioannis longè maior nobis incumbit necessitas, quàm de ipso scribendi, legendique operæ pretium me facturum puto, si virtutes, quibus maxime excelluit, quasi pulcherrimam religiosi viri speciem ante oculos proponam, ut ad eam se conformare Societatis nostræ homines curent, illique quàm simillimos imitando reddere. Initium à charitate faciam, quæ inter cæteras uirtutes primatum habet.

Societatem ingressus nil Ioannes duxit antiquius, quàm arctissimo se amoris uinculo cum Deo stringere; unum ardentissimè diligere.

cuncta ad ipsius honorem, gloriamque referre. Siuè domi se contineret, siue prodiret in publicum, aut cum Deo erat, aut de Deo pios sermones habebat: cum hominibus verò agebat illius dumtaxat gratia, non animi laxandi causà, temporisue fallendi. Nihil erat in humanis, cuius voluptate, aut desiderio tangeretur: & perinde habebat ijs prorsus carere, quàm supremo iure omnibus dominari: præter Deum enim flocci omnia pendere, extra illum cuncta quantacumque hæc forent infinitis sub illo abiecta spatijs spectare, ac pro nihilo ducere. Summa eius votorum apud Deum, solaque ambitio Deum diligere, & in eius amoris pretium, amando crescere. Cuicumque rei operam daret, Deum semper gerebat in oculis, in quo totus animo habitabat; quod inter homines rara quoque virtute præditos, est valde rarum. Interdiu noctuque audiebatur idemtidem repetere Sanctissima IESV MARIÆ nomina, quæ altè animo habebat impressa: totusque ideo sic ardebat, ut corde incitatus palpitante, concuteretur corpus, & rumpendum pectus, venæque laxanda

da

dæ viderentur. Hinc ille fundendi pro Christi fide sanguinis ardor, quem continuis alebat, & prodebat suspirijs: neque enim illi integrum erat affectus amoris immodicos premere, & inflammati cordis indicia inhibere. Vel illo mortis genere pro IESV cupiebat oppetere, quo Ioannes Sousa & Petrus Corrêa nostræ Societatis alumni, de quibus in loco meminimus, sagittis videlicet a Barbaris confixus, quarum pennis elatus ad Beatorum sedes euolaret: vel in vasta aliqua Brasiliæ solitudine, dum quærendis, Euangelij causâ, indigenis, sylvas, montesque pererrat, lassitudine, æstu, fame, ac siti consumptus, abiecto ad arboris alicuius truncum corpusculo, animam exhalare; quæ tam teneris, ac mollibus promebat verbis; vt in eundem amoris sensum, & vehemens martyrij desiderium circumstantes impelleret.

Quo diuino æstuabat igne, eo proximorum corda corripere, & inflammare cupiebat. Multa visuntur in Colonia Sinus Ianuarij, vti & in reliquis Brasiliæ Colonijs, sparsa per agros latifundia, & conficiendi saccari officinæ, in quibus Lusitani opulenti

familias habent magnas, partim Brasiliis indigenis, partim Æthiopibus aliundè aduectis, in conficiendo saccharo, quo Brasilica negotia præcipuè continentur, occupatas Vilissimum id hominum genus est; ingenio tardo, & ad capienda fidei Christiana mystéria omninò plumbeo: cum his, ceu cum filiis charissimis, agebat pater: horum commodis diu, noctuque seruiebat alacriter; nihil prætermittebat, quo illorum subleuari, siue corpora, siue mentes afflictæ possent, quoniam pretioso Christi sanguine redemptos esse sciebat, & a demonum seruitute in libertatem filiorum Dei assertos. Hos pertinaci labore institit ad humanitatem excolere, & Christianis simul præceptionibus erudire, ne suarum more regionum instar ferarum viuerent, & in crapulam, libidinemque proiectis satanæ magis animis, quàm Lusitanis corporibus seruire contingeret: tantumque assiduis profecit laboribus vt mirum videretur ex tam barbaris ante hominibus tam cultos euadere potuisse: sed nimirum Christianæ religionis hoc est, manufacere feros; & ex
lapi-

lapidibus duris Abrahæ filios excitare. Iam pudebat sine vestibus, quod solent, conspici; iam tractare incipiebant negotia, seruare ciborum tempora; salutare se inuicem in occurso; diligenter dominis operam locare: & quod caput est, frequentare diuina officia, ieiunia, flagellationes; & hominibus Europæis nec pietatis studio, nec vrbauitatis laude concedere. Amabant porro cuncti Ioannem vti parentem, audiebant vti magistrum, venerabantur vti sanctum.

Annuntiandi Ethnicis Euangelij, eosque ab errorum suorum tenebris ad veritatis lucem perducendi miro flagrabat studio: neque vllam suæ, vel infirmæ valetudinis, vel vltimæ senectutis rationem haberi volebat, cum de missionibus obeundis ad Brasiliæ mediterranea agebatur: susceptis quippè animarum gratiâ laboribus, integras sibi vires restitui affirmabat, & fessos artus roborari. Nonnulla charitatis in proximos exempla subiiciam, e quibus pronum erit de reliquis coniecturam facere.

Accitus semel ad excipiendam mā-
cipij

fit. Sic Ioannes lucrum animæ cum periculo iacturæ sui & sociorum fecit: quòd sciret quam pretiosa illa merx esset.

Singulos de more Brasilorum pagos, doctrinæ causa percurrenti aliquando euènit, vt imminente iam nocte in rusticanam præbyteri cuiusdam villam diuerteret: ibi tenui iam cæna refectus, in cubiculum iaterius se recepit non tam capiendæ causa quietis, quàm vt aliquot eo tempore rerum cælestium meditationi horas tribueret: cùmque iam ad multam orasset noctem, sensit ancillam quandam quæ domi erat in obsequio, ab hero ad turpia sollicitari: graui eam ob causam dolere, affectus alienam culpam sanguine proprio luere decreuit: nudato protinùs tergo cæpit se, quam acerrimè flagellis cædere, magnamque fundere sanguinis copiam, vt ardorem alienæ libidinis eo profluvio restingeret. Audiit flagellorum sonum, crepitusque plagarum sacerdos impurus, & sui causâ flagitij sumptum de infonte supplicium. Ergò pudore suffusus, ad Ioannis se abiicit pedes, errati veniam petit; fluentibusque vbertim lacrymis maculam

lam diluit, quam peccando contraxerant: nec prius indè surrexit, quam Ioannes suo punire supplicio aliena peccata defineret. Cæterum ne periclitaretur in posterum penitentis continentia, author illi fuit Almeida, vt ancillam domo eijceret, eamque apud honestam sæminam collocari curaret.

Rarum aliud, & inauditum, ni fallor, charitatis exemplum commemorare volo, vt religiosi præsertim viri discant nullum proferre verbum, quo aliorum fama, honorue lædatur. In pago, cui *Sancto Xaueio* nomen, cum esset, accidit vt in familiari cum domesticis confabulatione, eò Socij deuenirent, vt certi hominis famam arroderent; nulla conscientia, quòd res leuis, nec occulta erat. Haud tamen id tulit Ioannes; nec distulit quin vetaret precibus: cum parum apud eos, quibus nihil pensi esse videbatur proficeret; in genua procumbens, enixissime rogauit, ne ire vltèrius obtrestando pergerent. Aliter visum Socijs, qui recte factum, si culparent merètem, existimabant: itaque maledicendo perseuerauerunt. Tum visu, & dictu mirum: inflatæ Ioanni vehementiùs venæ crepuere, & vbertim sanguis effluxit, qui per

per totam se faciem diffudit, & rubore suo obtrectantes arguere visus est. Tacuere attoniti, & pudore suffusi soluerunt cōuentum, & alij aliò concessere: stetit sanguis: & venę ad statum redierunt: magno certè quanti sit faciendæ proximorum fama documento.

Et si ætate iam grauis esset, & morbis obnoxius, in omnem tamen iuuandi proximos occasionem excubabat animo, nullamque è manibus elabi sinebat. Summæ illi deliciæ, somno se accibo fraudare vt ad ægrotantium, & morientium confessiones excipien- das diu noctuque statim accurreret. Nec verò dum mitteretur expectabat; sed hac in re, moderatorum præcurrebat nutum, sedulò instans, vt si quem cuiusquam necessitas, maximè importuno vocaret tempore, eum sibi quæstum nemo præriperet. Cùmque admoneretur interdum, ne se laboribus enecaret: Vitam, inquit, vacuam caritate non emo: ingentis prætereà noxę reus fierem, si ab audiendis infirmorum confessionibus iisque ad benè moriendum præparandis desisterem, cùm in eo temporis momento summa rei vertatur; nec pauci, quia idoneo tum confessario de-

destituuntur, æternæ salutis iacturam faciant.

CAPVT SECVNDVM.

De studio orandi.

ET si mentem in Deo, rerumque diuinarum cognitione defixam perpetuò habebat: statum tamen ac certum quotidie seponebat tempus, quod ereptum negotijs meditationi dabat. Singulis diebus antequàm illucesceret, quatuor continuatas horas, totidem antè noctem consumebat orando: quòd si per occupationes continentis orationis filum abrumpere cogeatur, ijs expeditus primo quoque tempore illud resumebat, continuabatque, donec meditandi spatium conficeret. Inter faciendum sacrum tanta spiritus dulcedine perfundi se sentiebat, vt vix posset à suauissimis lacrymis temperare. Porrò is in-celebranti facie emicabat ardor, vt oculos iuuentium fulgore præstringeret, & animos adorantium religione imbueret. Peraçto missæ sacrificio agendis diuino numini gratijs integram dicabat
ho-

horam: duas soluendo quotidie officij diuini penso. Pias etiam iutra singulas horas affuevit concipere meditationiunculas, vt mentis aciem ad ecclesiasticam psalmodiam attentius percurrentam acueret, altiusque defigeret in vno Deo mentis intuitum. Non semel euenit vt cum in secretiori oraret loco a sensibus penitus abstractus, & euecto sursum, suspensoque in aere corpore, in cælum animo raperetur, & terrenis rebus superior diuinæ adhæreret bonitati. In missionibus quas frequenter obibat, vt supra vidimus, ad Brasiliæ mediterranea, solitus erat magnam noctis partem meditando consumere, somnoque detrahare, vt precibus adderet tempus: tumque maximè in noctis silentio suauissima cum Deo miscere colloquia, & cælestibus gaudijs affluere. Quamquàm orandi consuetudo loca iam omnia in facella verteret, quoties tamen copia dabatur, orabat in templo antè aram maximam, sanctissimamque Eucharistiam, vel in priuato Collegij sacello; haud ignarus quin Deus in sacris locis benignius andiret orantes. Ferè semper orabat flexis genibus; tanto spiritus ardore,

re, vt ei cor è pectore exilire, animus deficere videretur. Nihil ferè alicuius momenti aggrediebatur, nisi consulto prius, & propitiato per sacrificio, precesque Deo: tantumque meditando diuini hauriebat luminis, vt & futura prædiceret, & longe posita, ceu præsentia intueretur, nec raro cogitationes hominum intropiceret. Familiare Ioanni fuit difficillimarum rerum intelligentiam assequi, & recondita patefacere. Sacræ Scripturæ mysteria: deque fidei Christianæ articulis tam scitè & copiosè differere, vt quamquàm altioribus non esset disciplinis instructus, eximios tamen Theologos in scholis diù, multumque verlatos in admirationem adduceret: cogeretque fateri, quæcumque ille sentiret, diceret ve ab æternæ sapientiæ fonte orationis studio hausta esse. Iuuandis licet hominibus assiduam daret operam, perennem tamen agendi cum Deo consuetudinem intermittebat nunquam. Nec hominum, qui ad eum consilij causà ventitabant, congressibus impediri se sustinebat, quominus sermones de Deo suauis quadam dexteritate insereret: venustèque
exem-

exempla Sanctorum è Vitis deprompta narraret, quæ fouendæ suæ, & aliorum pietati seruirent: ijs rerum diuinarum colloquijs tantum valebat, agebatque, vt traditum legamus vix quemquam cum eo egisse, quin aut alius omninò ac venerat, aut propè alius, indè recesserit.

Simon Ribeiro Castanho, vir pius & honestus, iuratus affirmavit, visum a se Ioannem dum sacris operaretur, a sensibus alienatum cœlesti quadam nitentem pulchritudine, & faciè mirum in modum radiante. Beatissimam Virginem Mariam unicè diligebat, solitus eam summa religione colere, & *Matrem Admirabilem* in omni sermone appellare, illiusque opem suis in laboribus & periculis exposcere: ac tam indulgentem habere, ut nihil ferè a Deo peteret, quin eius intercessione impetraret. Nobilis quidam Lusitanus uir summæ fidei & probitatis, narrabat sæpè ab se repertum Ioannem in pago Conceptionis, in quo parochum diù egit, multa iam nocte submissis orantem genibus antè arā tēpli maximā, in qua Deiparæ imago colebatur ibiq; immoto corpore perseverantem; donec, ingruente

gruente somno , naturæ necessitatī paulisper cedens, humi procumberet: aliquando Deiparam & Ioannem multos vtrò citròque sermones habere ; & a media ferè nocte ad lucem vsque familiariter inter se colloquendo , tempus trahere. Archangelum etiam Michaelē , cælestis militiæ Principem , studiosissimè coluit , & B. Iosephum, Sanctissimæ Virginis sponsum: secundum hos Ignatium & Xauerium quorum vitas ceu speculum , ad quod se componeret, ante oculos semper habebat .

CAPVT TERTIVM.

De animi submissione , & sui contemptu .

PRincipio maximè incubuit eò , vt ædificij, quod in summum euehere perfectionis Euangelicæ culmen moliebatur , altissima iaceret fundamenta humilitatis: huc meditationes, huc piorum lectionem librorum : huc sermones , huc denique curas conferbat omnes . Ita de se , suisque rebus humiliter sentiebat, vt se mortaliū omnium infimum iudicaret. Nihil.

hil in sermone frequentius vsurpabat,
quàm Londini se natum esse, regnan-
te Elisabetha, cùm maximè per An-
gliam grassaretur hæresis: indè pro-
fectum in Lusitaniam vilissimi instar
mendiculi, omni prorsus humano
subsidio destitutum: Vianæ, (id est
nobile & opulentum in Prouincia
Bracharensi Emporium) a viro quo-
dam pio, Dei amore, comiter susce-
ptum, & in Brasiliam missum, vt vi-
uendi sibi quæreret facultatem: ibique
diuini Spiritus instinctu, Societatem
ingressum, & innumeris a Deo bene-
ficijs cumulatum, de nulla re minus,
quàm de gratijs; vti par erat, ipsi
Deo agendis, & de procuranda animi
salute cogitasse: quos cùm ex intimo
cordis sinu traheret humilitatis sen-
sus, ad ipsos quoque audientium ani-
mos trans mittebat: eò etiam effica-
cius, quod perfectius multo in agen-
tis manu, quàm in ore dicentis ex-
pressa demissio eminebat. In paupe-
rum quippè tugurijs frequens erat vt
illorum seruiret commodis: nullum
loci squallorem, nullam sordium fæ-
ditatem, vt absideret benignissimè
miseris, refugiebat. Virorum verò
nobilium domos & aulas Principum,
nec

nec nisi uocatus, adibat: dictitare solitus: quisquis in aula frequens est, ferme plus domum reportare de aulico, quam in aulam tulerat. Franciscum de Sotomaior Flauij Ianuarij Præfectum, sui amantissimum, non nisi pij alicuius negotij causâ uiscebat: serio affirmans se minimo etiam temporis momento indigere ut æternitatem lucraretur, procul a principum familiaritate, & aulæ usu. Ludouicus de Almeida Ianuariæ item Prætor Coloniz, Ioan-nem sibi delegit confessarium; quod ille munus, superiorum mandato, in-nitus licet suscepit. Cæterum quia id honoris magis, quam oneris habere uidebatur, breui interiecto tempore, tantum apud Ludouicum precibus, lacrymis, modisque alijs institit, ut is importunis demum, precibus cesserit, & suam ad illius uoluntatem conformare coactus fuerit, & alteri ex Socijs litteris & probitate conspicuo onus imponere.

Laicis etiam fratribus summa cum animi demissione obedire consueuit, iisque loco cedere, & primas ubique tribuere, quippè qui se nullius inter homines nominis æstimabat, opus fuit, ut maiores rei conscij, ni-mio

mio se demittendi studio modum ponerent, ne Sacerdotis persona, quam gerebat, contemptui esset; & sui desipientia in iniuriam cederet publicę dignitatis. Modum namque virtutes habent, ac in medio quodam versantur; quod si excedant in vitia degenerant. In more habebat suam coco per aliquot horas operam deferre: idque singulis ferè diebus, atque in uilissimis culinæ ministerijs se exercere: lances extergere; & quidquid in vsus mensę patinarum, lebetumque sorduerat, repurgare; nec facilè dictu est, quanta iubenti cum alacritate & religione pareret; quasi in eo Dei loquentis uocem audiret. In ualetudinarijs, & nosocomijs infirmorum curam gerere solitus sternere lectulos, euertere sordes, nec officia abiectionis defugere: undecumque occasionem & materiam abiicendi sese captare. Talem uerò, tantamque modestiam & submissionem necessariam esse dicebat, cum ad diabolum, superbix caput, debellandum; tum ad Dei gratiam promerendam, & hominum beneuolentiam comparandam. Negabat enim quemquam è Societate Deo, ac proximis fideliter & fructuosè operā nauare posse, nisi cō-

tēptorem sui, & de se, suisque rebus humiliter sentientem.

CAPVT QVARTVM.

De vitæ asperitate, & corporis castigatione.

FVit quidem Ioannis vitæ absoluta vndique, & consummata cunctis virtutum ornamentis ad Euāgelicam perfectionem comparatis, sed imprimis voluntaria corporis, & animi mortificatione, vt vulgò dicimus, mirabilis. Nam vbi primum se addixit Societati in suam sæuire corpus institit, nunquam intermisso castigandi rigore, nec prius sæuiendi, quàm viuendi finem fecit. Perpetuas agebat excubias aduersus carnis illecebras; haud ignarus intra nos esse hostem perpetuum, a quo dum viuimus tuti esse non possumus, qui eò perniciosior est, quò familiarior: eòque pugnare audacius, quò arma pugnanti faciliùs tribuimus, dum sensui & voluptatibus indulgemus. Hunc sibi Ioannes hostem proposuit, quem acerri-

mo

mo persequeretur bello : illius expugnandi causa arctissima quodam modò seipsum obsidione cinxit : ferrea quippè catena sæpiùs circumducta corpori , fortiterque constricta , non sine acerbo sensu doloris se cruciare didicit , Xauerij , qui id suæ ad Deum conuersionis initio præstitit , exemplo motus , & licet ob necessariam in domesticis occupationibus corporis agitationem , dirissimam vexationem sentiret , patiendi tamen amor , sui que ipsius odium cruciatus superabat ; cùm sibi persuaderet prauas animi & corporis affectiones illa quasi catena vinctas , in potestate habendas . Ab inita Societate assueuit his quotidie se flagellis cedere : in nudo , vti erat vestitus , cubare solo : somnum verò crebris interrumpibat suspirijs , quæ in cælum , ceu amoris iacula , emittebat ; ne illo etiam tempore , quod necessariæ corporis quieti impenditur , animus rerum cœlestium meditatione vacaret . Horrenti , textoque in modum indusij cilicio ferreis aculeis armato , carnem domabat . Tam nouas , ac multiplices se cruciandi artes excogitabat , vt omnes in eo curas , cogita-

tionesque consumere uideretur. Totius uitæ cursum ita instituit: ut singulos Lunæ, Iouis, & Saturni dies ab omni cibo prorsus abstineret: Martis uerò, Venerisque simplici pane, atque ubi sitis urgebat, frigida contentus esset. Ab esu carnum ad multos se continuit annos. Vlteriùs in seipsum sæuiendo procederet, nisi currentis impetum superiorum imperium retardasset, qui certas illi leges, terminosque quos non excederet, præscripserunt.

Semel tantum, ut alijs morem gereret reti: equo nunquam usus est: perpetuò iteragendi pedibus morem tenuit, siue ad audiendas infirmorum confessiones per uicinos Vrbi pagos, uillasque itaret; siue in Prouinciæ mediterranea prædicandi Euangelij causa ad multas leucas excurreret, siue ab uno ad aliud collegium se transferret. Viatorio utebatur baculo, ut affectum morbis, & senio iam graue corpusculum sustineret: tantaque celeritate iter agebat pedibus sæpè nudis per loca difficilia, & saxis aspera, ut Brasiliis ipsos itineris socios, duros alioqui homines, & cursu uelocissimos longo interuallo præiret: cumque ad occurrentes passim lapides offenderet, &

tribuli altè infixi plantas læderent, decurrendi tamen ardore nihil remittebat, perinde ac si incomoda illa, vulnereque calcaria currenti admouerent. Interdū insertas pedibus ocreas iniectis de industria scrupulis asperabat, vt hi plantas fauciarent, nec sine acerbosensu doloris cōficere viam posset. Hæc, & id genus alia Dei famulusui castigandi corpōris causā, illudq; in officio cōtinēdi, nō modo præstabat alacriter, sed in sūmis habebat delicijs; idētidē repetens; *Acerbā sibi futurā vitā*, si vel vnus dies vacuus cruciatib. abijset.

Est in Brasilia enormium quoddam culicum genus (*marigui* ab incolis dicuntur) ad immanitatem molestum ac importunum. Solent hi maximam anni partem vias & domos obsidere, transeuntibus & stantibus iuxta infestis, visu tetri, sonitu ingrati, morsum terribiles: ceu bellum denuntient, primum sibilant, mox aculeum exerunt, & pungunt altè ac tenaciter: nec mora nec requies: vbi insidunt, hærent, & sugunt sanguinē, incredibili lēsorū dolore, qui eos modis omnibus conantur abigere, ne lanienam illam patiantur. Hos Almeida auidus expectare, hilaris excipere, immotus sustinere, perti-

hax negligere: cū tamē flueret sanguis & tumor ex morſu exiſterit, doloris uehementiſſigna, ſed nullo ſenſu dolētiſ: vt cū mollis ad accipiendum i&ū eſſet ad reddendū gemitū ſaxeus videretur. Magna certē aliorum & cōmiſeratione & admiratione, qui malo ſuo quantus ex eo morſu doloris ſenſus exiſteret probē nouerant: ſed Almeida animum vel contemplatione auerte rat, vel patientia indurauerat.

Illius flagra pro ſacris habita pignoribus, in argentea incluſerunt theca Almeidae gentis Dynaſtæ, & maioratui ea lege addixerunt, vt nullo vnquam tempore ad alterius familie Principes quauis ratione transferri, vel dono dari liceret. Alia afflicti corporis instrumenta alijs ceſſere viris nobilibus, quorum tactu mortales innumeri depulſis repente morbis, & ſanitate receptā, præſentem ſenſerunt diuini Numinis opem.

Verūm nihil fuit antiquiūſ Ioanni, quā motus animi a ratione abhorrentes quammaximē frangere: ſequē ipſum (quod præſtantiffimum victoriæ genus eſt) vincere: argumento ſit, quod etiam læſus neminem vnquam
facto

facto, vel dicto læsit: quidquid sibi incommodi accideret æquo, & imperturbato ferebat animo, idem semper, sibi que similis: nullo aduerso casu mobilis: ad eum ferè modum, quo subuectæ medio cælo aquæ non sunt tempestatibus & ventis obnoxia, quibus hæ nostræ inferiores agitantur: sed cælestem veluti naturam indutæ, cæli motus sequuntur constantes & ratos. Vt verò animo, ita & facie, quæ mentis speculum est, cælestem quamdam præferebat serenitatem, adeò vt a multis diceretur os Beati representare; nimirum vbique, ac perpetuò serenum & lætum.

CAPVT QVINTVM.

De paupertate, & Castimonia.

NON minùs enituit in Ioanne paupertatis amor, quàm animi moderatio: ex quo enim Christo in cruce confixus est, præter Christum sibi nihil reliquum fecit. Sic paupertatem amauit, nemo vt esset domi pauperior: dictitare solitus cum Regio Psalte: *Quid mihi est in cælo; & a te quid volui super terram? & cum B.*

Francisco Minoritarum parente: *Deus meus, & omnia*. Vestitus ei vilis ac detritus erat: pallio utebatur varijs temerè assutis pannis deformato, vetusto item Breuiario. Paucos ad excolendum ingenium, & tuendam religionem libellos in cistella quadam è viminibus rudi opere contexta, domi asseruabat. Raræ cubiculi parietibus affixæ pendebant Sanctorum è simplici charta imagines, fouendæ pietatis gratia, & mentis ad Superos reuocandæ. Quinetā ipia munuscula, videlicet rosaria, sacras icunculas, agnos ex cera consecratos, & id genus alia, ita non habere studuit, vt siquando ab alijs sibi offerrentur, gratum donantis animum multa humanitate collaudans, gratiæ remitteret, ne earum rerum ipsius animus teneretur. Nullam in nudo cubiculo habebat sellam, qua sederet; ceu militis perpetuò excubantis, ceu peregrini ad patriam properantis habitum, moremque indueret, & a cella in cælū profectiōem quotidie adornaret. Præcipuo sēper honore coluit nascentis in stabulo Pueri IESV mysteriū, in quo summæ paupertatis, & clarissimū rerū omnium inopiæ dedit specimē, vt ab illo mortales disce-

rent,

rent, quàm sibi cordi esset paupertas, quam ipse statim uitę initio amplexus erat: & illius exemplo ducti caduca despicerent, & amarent æterna.

Cæterùm licet Almeida Euangelicam paupertatem unicè diligeret, aliorum tamen inopiam, quibuscumque poterat modis, subleuare curabat. Miserrimum quemque studiosè complectebatur. Multa sibi a viris pijs & opulentis donata pauperibus distribuebat: eaque ratione diuitum charitatem fouebat, & egentium consulebat necessitatibus. Solatia, & remedia ægrotis, vestimenta seminudis, alia egentibus subsidia subministrabat. Cùmque alius non dabitur miseris benefaciendi modus, seipsum illorum obsequio, seruitioque dicebat, & miras ad id benè præstandum excogitabat artes; maximè vt pupil- lis, & viduis, omni destitutis ope, victum & vestitum quæreretur. Maiori curà puellarum, quarum pudicitia ob angustias rei familiaris periclita- batur, honori prospiciebat, & comodo: dabatque operam, conquisi- tis per Saccararias officinas eleemosy- nis, ut illę, cōstituta ex ijs dote, idoneis viris nuberent. Dicebatur iam vulgò

pauperum pater: quò titulo gaudebat maximè, illumque egregijs implebat, & illustrabat factis.

Par euangelicæ paupertati cordis mundities fuit, & castimonia. Ab ineunte ætate didicit Deiparam eximia religione colere, vt illius patrocinio tectus domesticum superaret hostium hostem, & virginitatis florem ad extremum vsque spiritû custodiret illesum. Accessit intenta sensuû omniû custodia, & insignis amor continentix pari cum libidinis odio coniunctus, adeo vt minimas huius generis labeculas, ipsumque horreret libidinis nomen. Londini in Anglia, vti huius operis initio diximus, in primo adhuc ætatis flore, salacis fæminæ, quæ illum deperibat, dolos elusit, & victoriam fugiendo comparauit, ratus vnicam, certamque salutis viam, periculi fugam esse, eamque maturam. Iterum in Brasilia alterius audaciam fæminæ, quæ multis eum illecebris & lenocinijs ad turpe flagitium incitabat, acri obiurgatione repressit. Sed cum Satanæ mancipium, casto Dei timore abiecto, serpentem in pectore amoris foueret flammam, semel prætextu pij negotij

tij Ioannem ad se vocari iussit, & occasione capta, sollicitavit ad turpia: cohorrui is, & surrexit discessurus: illa verò amens apprehenso abeuntis pallio retinere conata ire tentando perrexit. Tum ille periculi memor, Iosephum Patriarcham imitatus, reiecto, vt liberiùs fugeret, ab humeris pallio, celeri se fuga domum proripuit, pallijque iacturam fecit, vt candidam innocentiae vestem retineret.

Quam habebat cordis munditiẽ, eã externo etiam corporis habitu præferebat. Modestia in eo summa elucebat, quæ latentis in animo florem honestatis explicabat: erat vultus grauitas, non tetrica, aut tristis, sed suaui quadam hilaritate temperata. Cauebat etiam, atque etiam ne superuacanea locutione, curioso oculorum iniectu, alioue leuiori gestu vel minimam peccati labem contraheret, qua purissimi candorem animi aliqua ex parte fædaret. In decora item oris specie adeo sanctitatis fulgebat color, & quoddam Angelicæ lumen integritatis, vt intuentibus cùm cæterarum virtutum, tum potissimum pudicitiae amorem quasi afflaret. Narrabant

quàm ut illi mentis corporisq; munditie integritatem imitarentur Angelicam. Idcirco ad huius præsertim virtutis studium omnes tum sermone, tum exemplo incitabat, & idonea tradebat documenta, quibus impuri dæmonis vitarent insidias; nec se in obscænas effunderent voluptates. Sæpè contigit, (quod ingentis prodigij loco haberi debet) vt ex ijs nonnulli fædis & importunis tentationibus agitati applicito corpori cilicio, quo Ioannes utebatur, senserint subito repressam carnis tyrannidem, depulsumque peccandi periculum, quasi illud a castissimoviri corpore virtutem traheret ad affectos etiam aliorum animos persanandos.

CAPVT SEXTVM.

Eiusdem Obedientia.

V Nam præ cæteris obedientiæ uirtutē coluit eo nomine quòd religiosę perfectionis sumam contineret: & quòd illius potissimum rationē haberi uoluit Sanctissimus Societatis nostrę parens Ignatius. Colebat etiam obedientiam eam ob causam religiosius, quòd peculiarem Christi humani generis seruatoris uirtutem esse sciebat.

bat : quamquam enim cæterarum virtutum formam hominibus seipsum ad imitandum proposuit ; tamen singulari quodam priuilegio primas obedientiæ detulit, vltimūque vitæ actum obediendo conclusit : *Factus obediens vsque ad mortem.* Vt primū Almeida in sacram tyrocinij palestram intulit pedem , & acrem aduersus veterem hominem pugnam suscepit , omnem quicquam volendi, omnem quicquam iudicandi facultatem exuit , in quo summa obedientiæ laus ponitur . Totum se ad Superiorum arbitrium finxit , Diuinum in illo numen venerans, ex eorum voluntate omninò pendebat , non modò ad imperium , sed nutum intentus . Non Superioribus solū , quos Dei loco in terris habebat , sed inferioribus etiam , qui ab illis imperandi facultatem acceperant seruiebat ea alacritate , & religione , vt apertè ostenderet Christo se magis , quàm hominibus obedire . Ad eum , huius exercitatione virtutis , euasit apicem per tres gradus ascendendo , in quos Sanctus Pater Ignatius obedientiam digेरit , vt difficillima perinde ac facillima , suauiter obiret . Non erit ab instituto nostro
alie-

alienum exempla aliquot commemorare, e quibus pronum erit de reliquis coniecturam facere.

Loandam, Urbem Angolæ principem, de qua in loco meminimus, Hollandi cum occupassent Anno M. DC. LI. Franciscus de Scotomaior, Lusitanæ in Brasilia classis Præfectus, idoneam militum manum nauibus eò conuehere decreuit, vt rei Lusitanæ extremo laboranti periculo subueniret. Vnum à nostræ Societatis Præuinciali Sacerdotem postulauit, qui audiendis militum confessionibus, sedandis inter illos discordijs alijsque pietatis Christianæ officijs obeundis nauaret operam: eaque ratione diuinum sibi numen placaret: neque enim nisi propitiato Deo, sperari posse de molestissimo hoste victoriam. Satis constabat illam expeditionem non minùs periculosam esse, quàm longinquam; virumque exigere Apostolico plenum spiritu, qui Præfecti votis, & Lusitanorum expectationi responderet. Ergò Prouincialis, vt Francisco morem gereret, domi in publico Sociorum conuentu retulit, velle se vnum ex ijs ad missionem Angolanam deligere; proinde

inde si quis ad ferendos illius labores ,
& iuuandos milites diuino se spiritu
sentiret impelli, id palam significaret.
Tum verò pulcherrima multorum
ambitio se prodidit Angolanam pe-
tentium missionem : cuncti ad illam
certatim dare nomina, seque vtrò pa-
ratos offerre ad maris nauseam, ad fa-
mem; ad sitim, ad æstum, ad mortem
ipsam Christi amore, & animarum
salutis causâ tolerādam. Omnibus ta-
men Almeida palmam præripuit &
Prouincialis vota alacritate præuenit.
Illicò effectum corpus trahens ad il-
lius se pedes abiecit : eamque prouin-
ciam suis humeris imponi multis cum
lacrymis postulauit : seque ad labo-
res omnes & ærumnas terrâ marique
ferendos paratissimum obtulit : nec
quicquam deesse, (affirmabat ille)
ad diuini Numinis instinctum, quo
se iamdudum ad Angolanam expe-
ditionem sentiebat impelli, nisi eius,
quem diuinæ voluntatis interpre-
tem ducebat, imperium. Gratissi-
mum cunctis fuit flexis ante Præsi-
dem genibus Ioannem videre senio-
iam penè confectum, & morbis ob-
rutum lacrymas vbertim fundere,
& multis illam precibus expeditio-
nem

nem ambire; maiore sanè animi ardore, quàm vigore corporis. Voti tamen compos non est factus:habita quippè vltimę senectutis,qua grauabatur, ratione domi iussus est sancto vacare otio, & obtemperandi studium, multaque pro Christo patiendi ardorem ad agendum cum Deo, Cælitibusque transferre. Alteri è Socijs ætate & viribus firmiori illud tum fuit onus impositum, qui multis postea laboribus in Angolam consumptus ex hac vita ad cæli patriam emigravit. Sux tamē virtutis nō cōtemnēdū fructum Ioānes tulit: nam domi, forisque & admirationi fuit vniuersis, & documēto.

Iam suo loco narrauimus qua animi alacritate, Socijs, qui aderant, stupore defixis furenti se Oceano exigua canoa commiserit, vt ex superiorum mandato, sub ipsam Ignatij parentis diem, in Sanctorum Collegio Sacris 'adesset solemnī: quod reis ipsa præstitit, sedata repentē procella, marique pacato. Iterum vectus equo cū rapidissimum fluium transire vellet, tentandi causā vadi, præcessit, vt Prouinciali, qui ponē sequebatur, illūque præire iusserat, qua transeūdū esset ostēderet. Ecce tibi medio

in fluuio ingens arboris truncus ;
quem radicibus auulsum rapidus vol-
uebat amnis , tanto in equum im-
petu incurrit , vt sefforem sella excus-
ferit , præcipitemque in profundum
effuderit alueum : iamque vorticibus
implicitus hauriendus uidebatur ,
cùm repentè , addito diuina ope ani-
mo , profundo emerfus fluuio , ad ul-
teriore ripam saluus euasit , tam-
sibi constans , & præfens , ac si nul-
lum prorsus adiisset uitæ periculum .
Quod ille Dei beneficium obedientiæ
meritis acceptum retulit .

CAPVT SEPTIMUM.

Non nulla post obitum Ioannis prodigia.

ET si multā , eaque præclara in
omnibus Ioannis uitæ partibus
eniteant prodigia ; non pauca , nec
obscura mortem proximè secuta sunt ,
quibus diuini Numinis prouidentia
famuli sui sanctitatem illustrare uo-
luit , & partā in cælo gloriam , uti par
est credere , hominibus palām facere .
Singula recensere nimis operosum es-
set,

set, & fastidium lectoribus afferret: quæ magis eminent referemus, ne officio deesse nostro uideamur.

Immane quoddam tuber cuiusdam fæminæ oculis incumbens faciem mirum in modum deformabat, & uidendi usum impediēbat; & quod periculosius erat, serpebat in singula momenta malum, nec multæ medicorum arti, remedijsque cedebat: ergo sudariolum Ioannis tinctum cruore fronti applicitum tuber confestim depulit, & uidendi facultatem expeditam reddidit.

Dominicus Goncaluez Urbis Ianuariæ ciuis, membris iamdudum captus, & lecto affixus erat; & corporis morbum mentis ægritudo cumulabat: tentatis omnibus frustra remedijs, Antonius à Rosa, uir pius & honestus, partem indusij, quo Ioannes indui solebat, quodque is ingentis loco thesauri, domi asseruabat, contractis infirmi membris admoovit: è uestigio Dominicus mentis se compotem factum sensit: nec multò post corporis sanitatem recuperauit.

Ioannes Teixeira Coutinius in eadem Vrbe Præsbyter ex continuo &
co-

copioso sanguinis fluxu in apertum venerat vitæ discrimen: exhaustis iam cum sanguine viribus, corpore deficere, animo linqui cæperat; & ex ipso oris pallore, & ex recedentium albore oculorum mors esse in limine videbatur. Itaque humana ope desperata, vertere se ad diuinam Ferreiræ familiares. Linteolum, quo iacentis in fetro Ioannis facies cooperta fuerat, moribundo applicant: illius tactu stitit cōfestim sanguis, redijt color uiuus & vires etiam integræ decumbenti redierunt.

Infans, *Maria* nomine grauiori, quàm pro ærate, feбри correpta, eiusdem ope linteoli conualuit protinus.

Intererat aliquādo Missæ Sacrificio in Societatis tēplo Beatrix de Aguiar cum subitum passa animi deliquium, mortuæ similis in terram corruit. Ceterum ubi auulsus a capite Almeidæ capillus iacētis caput attigit, nulla interposita mora, omnem sensuum usum recepit: deinde mentis compos facta, suis ipsa pedibus domū redijt. Tam uehemēs capitis dolor Lusitanū uexabat puerum, ut de potestate mentis sepe deijceret. Humani inops præsidij diuinum à Ioanne deposcit: uittam ipsā, quæ

quæ illius brachium ligauerat, cùm extremo laborans morbo incisa uena sanguinem misit, cingi sibi caput curauit: eoque adhibito remedio depulsus est dolor, & mens etiam restituta.

Ignatio de Abreu inter edendū spina transuersum hæsit in gutture, adeoque tenaciter, vt nulla humana opem excuti, extrahiue posset: morti iam proximus Ioannis auxilium implorauit; & Deiparę coronam, quæ demortui contigerat corpus, de collo suspēdit. Ecce tibi faucibus auulsa in stomachum spina descendit eaque ratione periculo explicatus Ignatius grates Ioanni referre non destitit.

Duo germani fratres non minùs moribus, quàm morbis similes, diuturna languebant febris: medicamentis complura ne quicquam experti erant: ergo Ioannis vestem sæpiùs osculantur, fronti, & pectori apprimunt non minori fiducia, quàm pietate: nec spe frustrantur sua recuperata protinùs sanitate.

Ingens noxi humoris copia in sinistrum Antonij Corree latus defluerat ibique collectū instar saxi induruerat; nulla chirurgorum arte ab eo quem
semel

semel infederat loco, pelli poterat. Accessit tumoris 'appēdix dolor acerbus, cui ferendo infirmivires nō erant. Destiterāt a curatione chirurgi, quōd & inutilem, & malo peiorem aduerterent: quare Antonius illorum destitutus ope, intercessorem apud Deum Ioannem adhibuit, ac eius reliquias affecto lateri applicauit: harumque virtute statim sensu doloris caruit, & tumore evanuit; nec doloris vllum, nec depulsi mali vestigium remansit.

Erat de mancipij Angolanī salute prorsus conclamatum: ceperant iam obrigescere pedes, pectus intumescere spiritus viæ ingenti pituitæ copia obstrui: tenuis tantum cordis pulsus vitæ restabat indicium. Acerbam miseri vicem dolens Ioannes de Lago, Christianæ catechesis libellum, quo Almeida, dum in viuis esset, utebatur, capiti decumbentis admōuit: simulque præcepit adstantibus, vt abiecti in genua orationem Dominicam cum Salutatione Angelica semel pronuntiarent. Quam deplorata salus, tam prompta pietas fuit: & suus pietati fructus respondit: finitis precibus, penè mortuum reuixit mancipium,

ocu-

oculos aperuit, bene valuit.

Costa quidam Lusitanus ex collecto circa digitum manûs dextræ noxio humore malignum vlcus contraxerat. Periculum erat ne sensim serpendo manum corripere, & brachium inficeret, quod aut secari necesse esset, aut neglecto mori: magna vi medicamentorum nihil profecit: itaque decretum ut amputaretur digitus, quod maxime horrebat ægrotus. Ad Ioannem igitur prouocauit à medicis: minori impendio salutem recepit: immitti iussit eius reliquias ossium in vas aquæ: hanc bibit; vix dum biberat cum vlcus resedit, virus euauit, digitus ad statum redijt, & manus digitum no uit, & suum fecit.

Non minùs illustria Bahiæ patrata quàm in Fluuio Ianuario prodigia. Carnosum tuber Sacerdoti e nostris, cui cui Simon Costa nomen, occupaue- rat occiput, & lapidis instar indu- ruerat: ex eo periculum quòd radices egerat, seque diffuderat: nec præci- di sine multarum iactura partium po- terat. In arcto positus nouemdiale sacrum Ioanni instituit; eo pera- to cum conclamatum dicerent chirurgi, mollescere tuber visum est detume-
sce-

scere, donec emissio pure dimisit insolentiam, & reliquis se partibus æquabile reddidit: eoque admirationem exciuit, & pietatem ergà Ioannem excitauit.

Ancillæ cuiusdam filiola graui oppressa morbo nullis poterat artis medicæ leuari subsidijs: actum de illa putabant omnes: huic Maria Bulliona fæmina Lusitana, Ioannis effigem admouit, & illius tactu sanitatem reddidit.

In quadam conficiendi sacchari officina *Pitanga* nomine, infans annos non ampliùs duos natus, morti iam proximus, semel, ac iterum tactis *Almeidæ* reliquijs, mortem euasit; ita geminato beneficio viri Sanctitas clariùs confirmata.

In *Portu securo* (sic Lusitani appellant a tutissima nauium statione *Emporium*) ossis cuiusdam tactus quod ibi summa veneratione colitur multis morbo laborantibus saluti fuit.

Spiritus Sancti Coloniam, quam Ioannes olim multos incoluit annos, ad Superos iam translatus beneficijs cumulare non destitit. Illud in paucis memorabile quod anno a Christo nato M. DC. LVIII. in oppido eiusdem

dem Coloniae nomine *Victoria* contigit. Dionisius Brauo iam destitutus a medicis non tam cum morbo, quam cum morte luctabatur: illi quippe laxato peritonæo in scrotum intestina defluerant, & concepto extra destinatum sibi à natura locum frigore obriguerant. Tentatis omnibus frustra remedijs vt suum se colligerent in finem, mortem opperiebatur in horas. Aderat illi Collegij Societatis Rector, vt institutis ab Ecclesia precibus animam agentem iuaret: is diuina plenus fiducia scriptam Ioannis manu epistolam, quam apud se habebat, moribundo admouit, & Pater & Ave a lecto assidentibus attentè dici præcepit: vix orandi initium factum, cum effusa intestina in suum se recepere locum: & ægrotus qui mortuo similis omnibus iacebat sensibus destitutus, & loquendi facultatem amiserat, reuiuiscere visus est, factusque iterum loquendi potens, liberiùs iam meante spiritu, oculos aperuit, & contenta protinùs voce sanum sese, & salutem sibi a Ioanne exoratum exclamauit, vti reipsa compertum est.

Catharinam Alurz vlcerosus cancer inuaserat, & quàm molliores & carnosiores

ñosiores sunt partes, se infinuās, vnā
ē mammis infederat. Emicabat foras
per ingentem tumorem periculum, se-
que cum horrore prodebat: quin & re-
spirandi potestatem miseræ ademerat;
cui demū expirandum esset, nisi
Ioannes, quem inuocauerat, opem tu-
lisset. Recessit cancer, nullo sui vesti-
gio relicto ad securitatem.

Serua quædam nobilis Lusitani
Francisci Bullonij, in ipsomet puerpe-
rio cum morte conflictabatur: mor-
tuus quippè illi fuerat in vtero fatus:
nec is aut a parturiente eiici, nec ab
obstetrice extrahi sine præsentis discri-
mine poterat, quod situ transuersus
erat. Octo iam dies acerbis cruciata
doloribus, & inedia confecta penè a-
notis derelicta propter intoleran-
dum fætorem, quem cadauer illud
emittebat, mortem habebat in visce-
ribus; cū illius misericordia motus
Rector Collegij Societatis ad eam in-
uisendam venit, deferens litteras Al-
meidæ manu scriptas: easque mori-
bunde applicuit. Rem miram: Subi-
tò fætum eiecit, & melius habere cæ-
pit, donec breui conualuit.

Alterius pectus fæminæ vlcus infe-
cerat omnium iudicio insanabile: vl-
ceri

ceri accessit tumor ingens & febris vehemens. Chirurgus remedia nescio quæ præscripserat: vicit tamen curam omnem, artemque malum pro desperato a cunctis habitum. Ergò infelix Ioannem in auxilium vocat, eiusque epistolam adponit ulceri: ac eo ipso momento temporis perfanata est.

Ad Capitis Frigidi promontorium Brasila fœmina è partu periclitans, e-pota frigida, quam Ioannis reliquiæ tinxerant, nullo negotio fœtum edidit.

Quidam religiosus Carmelita, Thomasia de Lima, duæ puellæ Lusitanæ, & complures alij ex omni ordine, atque ætate mortales varijs affecti morbis, Ioannis ope sunt restituti.

Ioannem Diaz. S. I. laicum, vehementis ac diurna febris lecto affixerat: accidit aliquando vt occulto quodam spiritu motus solito vehementiùs salutem a Deo exposceret, & Ioannis auxilium, vt voti compos fieret, imploraret. In medio orationis ardore audiit Almeidam clara sibi voce dicentem: *Xerapim* quod Brasilicæ linguæ vocabulum, *Vis mecum venire*, significat: cui infirmus, *Præstò sum*, mi Pater subito respondit: subiunxit Almeida: patienter feras morbi dolores: His

dictis a diuturna febris se liberum sensit, nec multò post perfectè conualuit.

Æthiopis cuiusdam pes putridus, proximèque resecandus ne reliquum corpus inficeret, Ioannis ope pristinae sanitati & vsui restitutus est.

In oppido Sancti Pauli famina quædam ex partus difficultate deplorata, appensis ad collum eiusdem Almeidae reliquijs, facili ac felici partum fætum edidit.

Recifj (ita vocant munitissimam ad Pernambucum arcem) laborabat calculo Ioannes Mendoza: die quodam cum se vehementiùs dolores intenderent, nec quidquam multis adhibitis remedijs de rigore remitterent, vestem, qua Ioannes viuens utebatur, affecto admòuit corpori: confestim mitigatis doloribus e lecto surrexit, ualetudine in posterum gaudens integra & constanti.

Maria Cæsar, Ioannis Fernandez clarissimi Ducis coninx, Paschalis Pereira, Ioannes Pimenta, Antonius de Silua, & permulti alij Lusitani, & indigenæ grauibz affecti morbis, partim tactis Almeidae reliquijs, partim illius inuocato nomine, conualuere protinùs.

Non

Non minùs enituit Ioannis virtus in liberandis energumenis, quàm in depellendis à corporibus morbis. O- lindam propè fœmina quædam diù, multumque a malo exagitata dæmo- ne, sano dèmmum consilio Ioannis of- fis particulam collo sibi alligari cura- uit; cuius uirtute effectum est, vt dæ- monis confestim tyrannidem excusse- rit.

In pago Iguáricù ingens demonum turba puellam quandam arripere soli- ta nullum vexandi miseram finem fa- ciebat. Solemnes non semel adhibitæ adiurationes; quarum vim hostiù per- tinacia, occulto Dei iudicio, elude- bat: saxei ad sacras induruerant pre- ces. Ignatio Societatis nostræ paren- ti, & Almeidae eius filio, liberatæ puellæ decus reseruari videbatur. Ita- que Collegij. S. Rector, postquàm Socij multas ad Deum fuderant pre- ces, & ipse diuinam hostiam ad aram immolauerat, Sacrum numisma Igna- tij effigie insculptum, & Almeidae re- liquias ad energumenæ collum amu- leti loco, appendi iussit; quibus illa, munita præfidijs, molestum protinùs abegit hostem; & in posterum Ignatij & Ioannis tutelæ se commisit; haud

ignara quantis apud Deum, & quàm propitijs intercessoribus niteretur.

Illud longe illustrius & mirabilius Pernambuci contigit Anno Salutis humane M.DC. LVII. Quidā optime indolis adolescens in Societatis gymnasio humanioribus litteris nauabat operam: huic aliquando Satan se spectandum præbuit religiosi viri habitu, grandi macie deformis, & oculis ad modestiæ normam compositis. Ac primū se illi ostendere valde benignum & affabilem: quin etiam multa consulere, quæ speciem præ se ferebant honesti, vt ijs deceptum facilius posset in fraudes, exitiumque induceret. Pauci abierant dies, cū deposito religionis habitu, Æthiopis personam assumpsit; illaque studiosi oculis repente obiecta, Satanam se prodidit. Exinde detracta iam larua comparere specie varia; inculcare passim turpia: nullam quietis partem misero concedere. Horrendis sæpè illum visis perterrere vt exanimaret; & a contemplatione cælestium ad curam & tutelam sui abduceret. Semel ei per ingentem terræ hiatum vastam & profundam ostendit foueam; flammis, fumoque fætido vndantem, partem scilicet

licet inferorum in qua volui vidit certos quosdam homines sibi notos, flagitijs famosos, qui tum in Brasilia vivebant, specie horribili damnationem præferente: quo perculsus speculo vehementer cohorrui: sed, uti solebat, cum in eiusmodi ostenta incideret, magistrum spiritus adiit, & uisi participem & timoris fecit: qui ut erat imprimis cautus, & probè nouerat quàm timeret dæmon Ignatii Societatis nostræ parentis nomen; & quàm tum rebus miris per Brasiliam gestis Almeida clarus esset; diuino, ut euentus docuit, instinctu motus, consuluit adolescenti, ut illorum nomina inuocaret, & pileolum, quo Ioannes uiuens usus fuerat, præ manibus teneret, cum ipsum hostis inuaderet: quibus ille, munitus armis sic ab se abegit Satanam, ut nunquàm se illi quandiu vixit, spectandum dederit.

Plures certè menses huiusmodi Satanā inter & studiosum pugna tenuit; quam illustris Cælitum apparitio paucis post diebus clariorem reddidit. Nam cum domi orationi vacaret adolescens, cælo repentè delapsi affuere multa nitētes luce Ignatius & Almeida, qui orantem iucundo intuitu, mirèque

rèque benèuolo solati, videri desierunt. Rursum die xxvi. Augusti insequentis Anni M. DC. LVIII. cum Missæ Sacrificio interesset in Societatis templo eisdem vidit Cælites instar Solis consulgentes: & Almeida ita ipsum est allocutus: *Vt quæ tibi euenierunt hæctenus, ea apud omnes certam fidem faciant, tuum ne moreris adire magistrum, illique meo significabis nomine, in cubiculo P. Rectoris bursam ex holoserico asseruari, quæ corporis mei particulam continet recenti adhuc imbutam cruore.* Hæc dixit, & cælo cum Ignatio receptus, templo afflauit diuinam fragrantiam. Adolescens verò illa Beatorum specie mirificè recreatus, Magistrum confestim adiit, eumque de re tota certiore fecit: qui adhibita statim diligentia, comperit ita se rē prorsus habere ac Ioannes dixerat. Affecit hic casus ingenti admiratione vniuersam Pernambuci Coloniam; multumque Ioannis famæ & sanctitatis gloriæ adiecit; vt pote qui Ignatio solemnī Ecclesiæ ritu inter Cælites iam relato, comes additus apparuit adolescenti clarissima circumfusus luce, eumque iuuit sui ope pileoli ad tartareas sugandas potestates: quo satis constitit
mul

multum apud Deum gratia & auctoritate valere; filiumque proximè secundum parentem Ignatium esse apud superos, & plurimum inter nos posse.

Et quidem de Vita & gestis Almeidae haftenus. Hic quasi in termino longæ confectæ viæ positi oculos ad decursum spatium reflectentes, quæ ad lectorum profectum facere possunt breui periodo colligamus. En Almeida qui ex Anglia in Lusitaniam diuina prouidentia missus, & hæresis periculis explicatus, doctrinam fidei & morum alieno in solo hausit: adultus Societatem iniit, eiusque instituti rationes ritè seruauit: studijs operam dedit; & ijs absolutis, sacris initatus communi animorum saluti ex officio vacauit. Remotam ac barbaram gentem longè ab Europa excoluit, non minùs documentis, quàm moribus. Domi perfectus, foris utilis: sibi intentus, alijs inuigilans: maioribus curis Deo impensis, cæteris in proximos deriuatis: rationem sui imprimis habuit; aliorum non neglexit: obiuit religionis munia, conuersionis exercuit: virtutibus iuxta, & rebus mirè gestis clarus. Vitam illibatam sancta mors excepit, quam eximia est fama consecuta, pignore

im-

immortalis gloriæ, quæ piè creden-
dum apud Deum frui, relicto. Eius
ego memoriam custodire, & propa-
gare scribendo studui, vt cum illius
gloriæ, tum nostræ vtilitati serui-
rem; quorum alterum si minùs conse-
qui per inelegantiam styli potui; alte-
rum propter narrationem rerum con-
sequi me spero: ea quippe sola species
exempli obiecta oculis legentium, si-
ne vllis illecebris, lenocinijsque elo-
quentiæ ad imitationem tum dome-
sticos, tum externos inuitabit, qui
mihi præter Dei Opt. Max. gloriam,
quam præ oculis habere Ignatij filij
debemus, est palmarius & præcipuus
in hac scriptione finis propositus est;
quo certè obtento, iustam, imò & v-
berem laboris impensi in scribendo
mei mercedem accipiam; quam in lu-
cro ponam ad noua in publicam vti-
litatem saniora exercenda.



F I N I

